



JABATAN PERPADUAN NEGARA DAN INTEGRASI NASIONAL
KEMENTERIAN PERPADUAN NEGARA

KOMPILASI SOALAN DAN JAWAPAN PARLIMEN 2023



DISEDIAKAN OLEH:
Bahagian Dasar dan Perancangan (BDP)
JPNIN, KPN

RINGKASAN KANDUNGAN

2023

A. JUMLAH SOALAN MENGIKUT KATEGORI

BIL.	KATEGORI	JUMLAH SOALAN	MUKA SURAT
1.	HAL EHWAL PERPADUAN	15	II
2.	HAL EHWAL AGAMA	2	IV
3.	INTEGRASI NASIONAL	4	IV
4.	AKTA / UNDANG-UNDANG	4	V
5.	ISU-ISU 3R (RACE, RELIGION AND ROYALTY)	6	VI
6.	KAWASAN RUKUN TETANGGA (KRT)	5	VII
7.	RUKUN NEGARA	2	VIII
8.	TABIKA PERPADUAN	1	VIII
9.	INDEKS PERPADUAN NASIONAL	4	VIII
JUMLAH		43	

B. SENARAI SOALAN MENGIKUT KATEGORI

1. HAL EHWAL PERPADUAN

BIL.	SOALAN	MUKA SURAT
1.	Minta MENTERI PERPADUAN NEGARA menyatakan pelan rekonsiliasi nasional yang bertujuan menghakis politik dendam dan membanteras politik mengikut sentimen kaum dan agama.	1
2.	Minta MENTERI PERPADUAN NEGARA menyatakan: I. Sejauh mana pencapaian Pelan Tindakan Perpaduan Negara 2021-2030? II. Apakah cabaran perpaduan yang dihadapi oleh Kementerian? III. Apakah kaitan Indeks Negara Rahmah dengan Indeks Perpaduan Negara (IPNas)?	28
3.	Minta MENTERI PERPADUAN NEGARA menyatakan pendirian Kerajaan terhadap Dasar Perpaduan Negara dan Rangka Tindakan Perpaduan Negara 2021 - 2030 yang telah dilancarkan oleh Kerajaan sebelum ini.	33
4.	Minta MENTERI PERPADUAN NEGARA menyatakan menyatakan sejauh manakah pencapaian Pelan Tindakan Perpaduan Negara 2021-2030 yang dilancarkan pada November 2021, dan senarai inisiatif yang telah dilaksanakan.	66
5.	Minta MENTERI PERPADUAN NEGARA menyatakan hasil garis panduan dan hala tuju Majlis Penasihat Perpaduan Negara yang merupakan panduan Kementerian dalam mengurus perdana agenda perpaduan negara.	73
6.	Minta MENTERI PERPADUAN NEGARA menyatakan bagaimana cara Kementerian memperkukuh perpaduan di kalangan rakyat Malaysia yang berbilang kaum dan agama, terutama dalam konteks yang semakin berubah dan kompleks dengan adanya isu-isu sosial dan politik yang sensitif.	77
7.	Minta MENTERI PERPADUAN NEGARA menyatakan prestasi terkini dan hala tuju semua program dan inisiatif untuk memupuk dan memperteguh perpaduan, permuafakatan, kebersatuan dan kebersamaan di peringkat akar umbi terutama di semua peringkat sekolah,	95

BIL.	SOALAN	MUKA SURAT
	pendidikan tinggi dan dalam komuniti serta strategi penambahbaikan untuk mencapai <i>outcome</i> yang ditetapkan.	
8.	Minta MENTERI PERPADUAN NEGARA menyatakan apakah kemajuan yang telah dicapai bagi program dan aktiviti yang terkandung dalam Dasar Perpaduan Negara dan sejauh manakah dasar ini diguna pakai oleh Kementerian/jabatan lain untuk menangani isu perpaduan seperti diskriminasi dalam pelbagai bidang seperti sukan, perkhidmatan awam dan pendidikan.	105
9.	Minta MENTERI PERPADUAN NEGARA menyatakan sejauh manakah usaha bagi memupuk perpaduan pelbagai kaum dalam bentuk program atau aktiviti telah berjaya mencapai objektifnya pada setakat ini.	119
10.	Minta MENTERI PERPADUAN NEGARA menyatakan apakah pelan tindakan kesungguhan Kementerian menyeru rakyat Malaysia yang berbilang bangsa dan agama supaya bersifat damai, mengajak kepada perpaduan dan kesejahteraan.	124
11.	Minta MENTERI PERPADUAN NEGARA menyatakan apakah tindakan, pelan dan aktiviti peringkat persekutuan yang telah diadakan oleh Kementerian dalam urusan mempromosikan perpaduan dalam kalangan rakyat Malaysia, dari Disember 2022 hingga kini. Jelaskan secara spesifik.	137
12.	Minta MENTERI PERPADUAN NEGARA menyatakan apakah masalah utama yang mengekang perpaduan di antara kaum di Malaysia dan apakah inisiatif yang akan dilaksanakan oleh Kementerian untuk mengatasi masalah tersebut.	146
13.	Minta MENTERI PERPADUAN NEGARA menyatakan langkah yang diambil oleh Kerajaan bagi melindungi seluruh rakyat Malaysia, pelbagai bangsa dan agama daripada dihina oleh mereka yang tidak bertanggungjawab demi kepentingan diri. Adakah Kerajaan bercadang untuk meningkatkan kecekapan penguatkuasaan/pencegahan dengan menubuhkan badan penasihat yang merangkumi pelbagai bangsa dan agama.	158
14.	Minta MENTERI PERPADUAN NEGARA menyatakan adakah Kementerian Perpaduan Negara berhasrat untuk mengembangkan lagi peranannya dalam mengadakan	173

BIL.	SOALAN	MUKA SURAT
	lebih banyak aktiviti dan menambah peruntukan bagi memupuk perpaduan yang lebih baik dalam kalangan rakyat Malaysia yang berbilang kaum seperti mana yang dizahirkan melalui Titah Kebawah Duli Yang Maha Mulia Seri Paduka Baginda Yang di-Pertuan Agong semasa merasmikan Minggu Perpaduan pada 21 Mei 2023 yang lalu bahawa perpaduan adalah aset negara.	
15.	Minta MENTERI PERPADUAN NEGARA menyatakan apakah Petunjuk Prestasi Utama (KPI) termasuk pencapaian bagi program Kembara Perpaduan Malaysia MADANI yang telah diperuntukkan jutaan ringgit dalam menggalakkan perpaduan dan integrasi sosial dalam kalangan masyarakat.	181

2. HAL EHWAL AGAMA

BIL.	SOALAN	MUKA SURAT
1.	Minta MENTERI PERPADUAN NEGARA menyatakan adakah Kementerian mempunyai bantuan dana atau peruntukan khusus buat mana-mana pertubuhan keagamaan selain agama Islam untuk mereka membuat sebarang bentuk aktiviti-aktiviti dan juga program pembangunan agar pertubuhan minoriti di negara turut aktif berkembang.	45
2.	Minta MENTERI PERPADUAN NEGARA menyatakan adakah Kerajaan bercadang mewujudkan satu Jawatankuasa Tetap Khas yang mengkaji isu-isu berkaitan dengan Agama Islam dan Bukan Agama Islam bagi menangani isu-isu sensitif antara agama agar kekeliruan dalam masyarakat tidak berlaku. Contohnya, isu pembesar suara azan yang pernah berlaku di Selangor tidak lama dahulu dan terbaharu berlaku lagi di Pulau Pinang.	178

3. INTEGRASI NASIONAL

BIL.	SOALAN	MUKA SURAT
1.	Minta MENTERI PERPADUAN NEGARA menyatakan apakah langkah yang telah diambil bagi memastikan bangsa Siam khususnya tidak tercicir dalam aspek pembangunan mahupun bantuan yang disalurkan Kementerian.	8

2.	Minta MENTERI PERPADUAN NEGARA menyatakan langkah yang telah diambil bagi memastikan bangsa Siam khususnya tidak tercicir dalam aspek pembangunan mahupun bantuan yang disalurkan Kerajaan.	86
3.	Minta MENTERI PERPADUAN NEGARA menyatakan berapakah jumlah peruntukan yang disediakan untuk kaum minoriti Siam bagi tujuan pembangunan kebudayaan dan pembelajaran bahasa ibunda mereka. Apakah mekanisme yang akan digunakan untuk menyalurkan peruntukan dan syarat yang dikenakan dalam penggunaan peruntukan tersebut.	129
4.	Minta MENTERI PERPADUAN NEGARA menyatakan butiran dan berapakah jumlah peruntukan di bawah Belanjawan 2023 yang disediakan untuk pembelajaran bahasa ibunda dan kebudayaan golongan minoriti, termasuk masyarakat Siam. Adakah peruntukan tersebut disediakan dalam bentuk sumbangan kepada Pertubuhan Bukan Kerajaan (NGO) mewakili masyarakat Siam iaitu Persatuan Siam Malaysia sebagai badan pelaksana atau ada kaedah lain yang harus masyarakat Siam lakukan untuk memanfaatkan peruntukan tersebut.	167

4. AKTA / UNDANG-UNDANG

BIL.	SOALAN	MUKA SURAT
1.	Minta MENTERI PERPADUAN NEGARA menyatakan apakah Kerajaan bersedia untuk menggubal semula akta perhubungan kaum untuk mengawal ketegangan kaum yang semakin meruncing di negara ini.	38
2.	Minta MENTERI PERPADUAN NEGARA menyatakan apakah Kementerian bercadang untuk mewujudkan Akta Keharmonian Negara bagi memastikan terdapat keseimbangan untuk memupuk keharmonian merentasi pelbagai budaya dan agama, di samping mengawal selia pihak yang tidak bertanggungjawab menyalahgunakan kebebasan bersuara dan menjejaskan suasana harmoni dan sensitiviti perkauman dalam negara.	62
3.	Minta MENTERI PERPADUAN NEGARA menyatakan usaha untuk menggubal Akta Kebencian Agama dan Kaum bagi mengekang usaha memecahbelahkan masyarakat dengan sentimen perkauman.	170
4.	Minta MENTERI PERPADUAN NEGARA menyatakan :-	192

BIL.	SOALAN	MUKA SURAT
	<p>a) Apakah langkah-langkah Kerajaan dalam menangani isu-isu berkaitan perkauman yang kian merisaukan; dan</p> <p>b) Adakah Kerajaan bercadang mewujudkan sebuah akta/undang-undang sebagai badan penguatkuasa dalam melindungi kepelbagaian serta mengambil tindakan ke atas mana-mana individu yang menggugat perpaduan negara.</p>	

5. ISU-ISU 3R (RACE, RELIGION AND ROYALTY)

BIL.	SOALAN	MUKA SURAT
1.	Minta MENTERI PERPADUAN NEGARA menyatakan sering kali disebarkan tentang berlaku provokasi yang menyentuh sensitiviti antara kaum di negara kita. Apakah langkah yang telah dan akan dilakukan oleh pihak Kementerian untuk mencapai aspirasi membentuk 'Masyarakat Madani' yang sedang diusahakan oleh pihak Kerajaan.	18
2.	Minta MENTERI PERPADUAN NEGARA menyatakan adakah Kementerian sudah membuat kajian terperinci mengenai punca utama wujudnya ketegangan kaum pasca merdeka dan apakah hasil dapatan kajian tersebut.	35
3.	Minta MENTERI PERPADUAN NEGARA menyatakan saban hari kita mendengar isu rasis dan ekstrem dijadikan modal tuduhan berkaitan perkauman dan agama oleh pihak-pihak tertentu dan ini telah mempengaruhi sentimen sesuatu kaum di negara ini. Adakah dalam masa terdekat Kerajaan akan mengusulkan suatu undang-undang seperti anti perkauman <i>hate speech</i> atau undang-undang <i>minority protection act</i> dan sebagainya.	53
4.	Minta MENTERI PERPADUAN NEGARA menyatakan Kementerian Perpaduan Negara terlibat dalam proses pemantauan dan suntingan drama dan filem bagi memastikan nilai-nilai kerukunan dalam karya-karya yang dihasilkan serta tidak menyentuh isu sensitif yang melibatkan sensitiviti kaum dan agama.	57
5.	Minta MENTERI PERPADUAN NEGARA menyatakan senarai program-program yang memupuk semangat perpaduan di seluruh negara. Apakah strategi	81

	Kementerian untuk mengatasi masalah ketegangan perkauman dan agama dalam kalangan masyarakat kita.	
6.	Minta MENTERI PERPADUAN NEGARA menyatakan apakah langkah-langkah yang diambil oleh Kerajaan dalam usaha bukan sahaja memupuk perpaduan negara, tetapi menangani ekstremisme yang nampak semakin serius dari segi agama dan kaum.	113

6. KAWASAN RUKUN TETANGGA (KRT)

BIL.	SOALAN	MUKA SURAT
1.	Minta MENTERI PERPADUAN NEGARA menyatakan bilangan Kawasan Rukun Tetangga (KRT) yang ditubuhkan di seluruh negara untuk memperkasa komuniti setempat mengikut negeri, dan apakah usaha Kementerian untuk menggalakkan penyertaan anak muda dalam aktiviti kesukarelawanan di Rukun Tetangga.	48
2.	Minta MENTERI PERPADUAN NEGARA menyatakan: a) <u>Senarai KRT</u> di seluruh kawasan Parlimen Kapar; dan b) <u>Senarai Tabika Perpaduan</u> di Kapar untuk memupuk perpaduan dan mengintegrasikan masyarakat antara kaum sejak usia muda.	70
3.	Minta MENTERI PERPADUAN NEGARA menyatakan: a) Senarai KRT di seluruh Parlimen Temerloh; dan b) Senarai Tabika Perpaduan di Temerloh untuk memupuk perpaduan dan mengintegrasikan masyarakat antara kaum sejak usia muda	89
4.	Minta MENTERI PERPADUAN NEGARA menyatakan berapakah jumlah OKU yang terlibat dalam Kawasan Rukun Tetangga serta apakah usaha Kementerian dalam meningkatkan penglibatan OKU di peringkat KRT dan nyatakan program-program yang akan dilaksanakan oleh KRT bagi pembangunan OKU pada tahun ini.	133
5.	Minta MENTERI PERPADUAN NEGARA menyatakan apakah terdapat kenaikan jumlah Geran Rukun Tetangga bagi tahun 2023 untuk setiap Kawasan Rukun Tetangga (KRT) yang berjumlah RM6,000 sebelum ini atau	142

	Kementerian mempunyai cadangan alternatif lain bagi terus memperkasa KRT di seluruh negara.	
--	---	--

7. RUKUN NEGARA

BIL.	SOALAN	MUKA SURAT
1.	Minta MENTERI PERPADUAN NEGARA menyatakan lebih lanjut inisiatif yang diambil oleh Kementerian yang bernama “Ini Malaysia Kita” yang berdasarkan prinsip-prinsip Rukun Negara.	11
2.	Minta MENTERI PERPADUAN NEGARA menyatakan sejauh mana Rukun Negara yang menjadi inti pati Kerajaan Perpaduan berjaya dilaksana dan diterapkan dalam masyarakat pelbagai kaum di negara ini supaya menjadi teras Malaysia Madani.	100

8. TABIKA PERPADUAN

BIL.	SOALAN	MUKA SURAT
1.	Minta MENTERI PERPADUAN NEGARA menyatakan apakah langkah-langkah yang diambil oleh Kerajaan untuk memperkasa Tabika Perpaduan dari segi kualiti perkhidmatan dan jumlah bilangan.	186

9. INDEKS PERPADUAN NASIONAL

BIL.	SOALAN	MUKA SURAT
1.	Minta MENTERI PERPADUAN NEGARA menyatakan sejauh manakah keberhasilan Indeks Perpaduan di Malaysia yang dijalankan oleh Institut Kajian Etnik, UKM dalam menangani masalah perpaduan di Malaysia.	4
2.	Minta MENTERI PERPADUAN NEGARA menyatakan indeks perpaduan negara terkini dan apakah pihak Kementerian bercadang memperkenalkan undang-undang atau akta bagi membendung elemen permusuhan antara kaum dan agama.	21
3.	Minta MENTERI PERPADUAN NEGARA menyatakan Indeks Perpaduan Nasional Negara dan apakah situasi perpaduan negara pada masa ini. Apakah jenis program yang efektif, yang telah dirancang oleh Kementerian	41

	untuk mengeratkan lagi perpaduan, persefahaman dan penerimaan rakyat negara ini yang terdiri daripada pelbagai kaum dan agama.	
4.	Minta MENTERI PERPADUAN NEGARA menyatakan Indeks Perpaduan Nasional (IPNas) dan apakah situasi perpaduan pada masa ini selepas pelancaran Minggu Perpaduan Negara Malaysia Madani.	153

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 6 MAC 2023

**DARIPADA : DATUK SERI IR. DR. WEE KA SIONG
[AYER HITAM]**

SOALAN :

Minta **MENTERI PERPADUAN NEGARA** menyatakan pelan rekonsiliasi nasional yang bertujuan menghakis politik dendam dan membanteras politik mengikut sentimen kaum dan agama.

JAWAPAN:

Tuan Yang di-Pertua,

1. Sistem politik negara kita pada masa ini terbentuk hasil daripada Dasar Pecah dan Perintah yang diamalkan sejak zaman penjajahan British di Tanah Melayu.
2. Dasar ini telah membahagikan kaum mengikut fungsi dan peranan mereka dalam pembangunan ekonomi, tempat tinggal dan sistem pendidikan yang berbeza.
3. Implikasi dari dasar tersebut telah **mempengaruhi corak kegiatan berpolitik setiap kaum selepas kemerdekaan**. Sistem politik negara kita yang berasaskan kaum menjadi salah satu cabaran yang perlu ditangani dengan baik bagi memastikan ia tidak mencetuskan perselisihan antara kaum.
4. Duli Yang Maha Mulia Seri Paduka Baginda Yang di-Pertuan Agong juga telah bertitah sempena Istiadat Pembukaan Penggal Kedua Parlimen Ke-15 pada 13 Februari 2023 supaya semua wakil rakyat **mengetepikan agenda politik sempit dan bersatu hati** atas nama perpaduan.
5. Dalam sistem politik federalisme mengikut kaum dan etnik, negara tetap mampu bergerak ke arah landskap politik yang menggalakkan perpaduan serta meningkatkan amalan saling menghormati dan toleransi dalam kalangan rakyat, dengan contoh teladan yang baik daripada pemimpin kepada rakyat.

6. Antara strategi yang digariskan melalui Dasar Perpaduan Negara adalah memperkukuhkan **peranan pemimpin sebagai pemangkin perpaduan**. Untuk itu, semua peringkat kepimpinan bermula dari peringkat persekutuan, negeri, daerah sehingga peringkat akar umbi perlu menjadi teladan dan contoh terbaik kepada rakyat.
7. Kerajaan Perpaduan yang diterajui oleh YAB Perdana Menteri, Datuk Seri Anwar Ibrahim pada masa ini merupakan satu konsep pentadbiran Kerajaan yang menekankan aspek perpaduan dengan penglibatan semua parti. Konsep ini juga merupakan salah satu rekonsiliasi bagi mengelakkan politik dendam.

Sekian, terima kasih.

**PEMBERITAHUAN PERTANYAAN LISAN/ BUKAN LISAN
DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 16 FEBRUARI 2023 (KHAMIS)

**DARIPADA : DR. HAJAH HALIMAH ALI
[KAPAR]**

SOALAN NO. 8:

Minta **MENTERI PERPADUAN NEGARA** menyatakan sejauh manakah keberhasilan Indeks Perpaduan di Malaysia yang dijalankan oleh Institut Kajian Etnik, UKM dalam menangani masalah perpaduan di Malaysia.

JAWAPAN:

Tuan Yang Di-Pertua,

1. **Indeks Perpaduan Nasional (IPNas)** adalah sebuah indeks nasional yang menjadi kayu ukur terhadap keberkesanan pelaksanaan inisiatif dan program oleh Kerajaan untuk memastikan sumbangannya kepada tahap perpaduan dan keharmonian negara.
2. IPNas telah dilaksanakan sebanyak dua (2) kali iaitu pada tahun 2018 dan 2022. Pelaksanaan kajian IPNas menggunakan kaedah model struktur (*structural model*) iaitu mengenal pasti dan menguji secara bersama-sama dalam satu acuan model meliputi semua faktor penyumbang yang mempengaruhi pencapaian tahap kesepaduan sosial.
3. Lima (5) indikator yang mempengaruhi **tahap kesepaduan sosial** yang diuji iaitu:
 - (i) Tahap Keetnikan;
 - (ii) Hubungan Sosial Rentas Etnik;
 - (iii) Etos Bangsa;
 - (iv) Tadbir Urus dan Pembangunan; dan
 - (v) Defisit Sosial (isu dan cabaran).
4. Nilai Indeks Perpaduan Nasional (IPNas) pada tahun 2018 adalah **0.567**. Pada tahun 2022, IPNas mencatatkan peningkatan iaitu dengan **skor 0.629**.

5. Sepuluh (10) defisit sosial atau cabaran dalam perpaduan yang dinilai adalah:

- (i) **Etnisiti**
- (ii) **Agama**
- (iii) **Kelas Sosial**
- (iv) **Pendidikan**
- (v) **Bahasa**
- (vi) **Jurang Generasi**
- (vii) **Gender**
- (viii) **Politik Federalisme**
- (ix) **Ruang Bandar-Desa**
- (x) **Media**

6. Berdasarkan penemuan IPNas 2018, Kementerian telah bangukan **Dasar Perpaduan Negara (DPN), Rangka Tindakan Perpaduan Negara (Blueprint) dan Pelan Tindakan Perpaduan Negara 2021-2030**. Pelan ini menggariskan program perpaduan yang perlu dilaksanakan bagi mengukuhkan tahap kesepaduan sosial melibatkan kerjasama pelbagai agensi.

7. Dapatan IPNas 2022 pula menunjukkan **dua (2) perkara yang perlu diberi perhatian** bagi mengukuhkan lagi perpaduan di negara ini iaitu **tadbir urus dan pembangunan serta aspek hubungan sosial rentas etnik**.

8. Untuk itu, Kementerian Perpaduan Negara telah **merangka program Kembara Perpaduan Malaysia MADANI** selari dengan Dasar Perpaduan Negara (DPN) yang dihasilkan. Program ini merupakan

program flagship bagi tahun 2023 yang meliputi tiga (3) kluster program iaitu:

a) Semarak Kenegaraan

Program yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

b) Semarak Perpaduan

Program ini untuk menyemarakkan semangat perpaduan dalam kalangan masyarakat berbilang kaum, agama dan budaya. Aktiviti yang dilaksanakan untuk menambah dan mempelbagaikan tapak integrasi dan medium interaksi sosial.

c) Komuniti Rahmah

Program yang dirangka bagi membina komuniti yang mampan dan rahmah yang menjunjung tinggi nilai-nilai kemanusiaan melalui penggemblengan tenaga semua pihak termasuk agensi Kerajaan, swasta, NGO dan komuniti.

9. Program yang dirangka ini adalah sebagai kesinambungan kepada inisiatif agenda perpaduan sebelum ini dengan pelaksanaan yang lebih inklusif dan bersepadu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 16 FEBRUARI 2023 (KHAMIS)

**DARIPADA : DATUK HAJI AWANG BIN HASHIM
[PENDANG]**

SOALAN NO.14:

Minta **MENTERI PERPADUAN NEGARA** menyatakan apakah langkah yang telah diambil bagi memastikan bangsa Siam khususnya tidak tercicir dalam aspek pembangunan mahupun bantuan yang disalurkan Kementerian.

JAWAPAN:

Tuan Yang di-Pertua,

1. Kerajaan melalui Kementerian Perpaduan Negara telah menyediakan beberapa inisiatif bagi memperkasa agenda perpaduan nasional. Agenda ini dilaksanakan melalui pelbagai **usaha untuk membina dan memperkukuh tapak integrasi sebagai landasan hubungan muhibah dalam kalangan rakyat.**
2. Penghasilan **Dasar Perpaduan Negara dan Rangka Tindakan (Blueprint) Perpaduan Negara 2021-2030** merupakan dokumen dasar yang menjadi kerangka asas dan hala tuju agenda perpaduan negara. Inisiatif ini diperkukuhkan lagi melalui penghasilan **Pelan Tindakan Perpaduan Negara 2021-2030** yang merupakan pelan induk tindakan perpaduan bagi menterjemahkan Dasar Perpaduan Negara dan Rangka Tindakan Perpaduan Negara 2021-2030 ke dalam bentuk **program dan inisiatif yang lebih terancang dan terangkum tanpa meminggirkan mana-mana pihak.**
3. Dengan penghasilan dokumen dasar dan pelan tindakan ini, agenda perpaduan dapat dilaksanakan dengan lebih terancang dan tersusun melalui program-program yang dilaksanakan meliputi semua golongan masyarakat **tanpa mengira kaum, budaya dan agama** bagi memastikan keamanan, keharmonian dan perpaduan dapat dicapai.

4. Berdasarkan maklumat daripada Unit Penyelarasan Pelaksanaan (ICU), Sistem eKasih merupakan pangkalan data kemiskinan nasional yang bertujuan untuk mendaftarkan golongan miskin di Malaysia berdasarkan Pendapatan Garis Kemiskinan (PGK) semasa (2019). Sehingga **9 Februari 2023**, rekod dalam Sistem eKasih menunjukkan bilangan Ketua Isi Rumah (KIR) etnik Siam adalah seramai 1,603 orang. Di samping itu, terdapat **15,843 bilangan bantuan** dengan nilai sebanyak **RM19,143,159** telah disalurkan.

Sekian, terima kasih.

**PEMBERITAHUAN PERTANYAAN LISAN/ BUKAN LISAN
DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : LISAN

DARIPADA : TUAN HASSAN BIN ABDUL KARIM

TARIKH : 21 MAC 2023 (SELASA)

SOALAN NO. 11

Minta **MENTERI PERPADUAN NEGARA** menyatakan lebih lanjut inisiatif yang diambil oleh Kementerian yang bernama “Ini Malaysia Kita” yang berdasarkan prinsip-prinsip Rukun Negara.

Jawapan

Tuan Yang Dipertua,

1. Preamble Rukun Negara mempunyai cita-cita masyarakat yang bersatu-padu, hidup cara demokratik, makmur dan saksama, liberal dengan kebudayaan pelbagai corak, progresif dengan menggunakan sains dan teknologi moden. Kesemua cita-cita Rukun Negara ini juga terkandung dalam nilai-nilai masyarakat MADANI iaitu Kemampanan, Kesejahteraan, Daya Cipta, Hormat, Keyakinan dan Ihsan.
2. Seiring dengan pengumuman dasar pembangunan Malaysia MADANI oleh YAB Perdana Menteri, cadangan inisiatif "**Ini Malaysia Kita**" telah diteliti semula dan Kementerian Perpaduan Negara dan menghasilkan Kerangka Membangun Malaysia MADANI melalui konsep Perpaduan dalam Kepelbagaian (*Unity in Diversity*) dengan fokus utama iaitu Kebudayaan dan Kemasyarakatan.
3. Program *flagship* yang diperkenalkan adalah **Kembara Perpaduan Malaysia MADANI** yang menerajui inisiatif di bawah agenda perpaduan nasional dengan matlamat menyebarkan pengetahuan, kefahaman dan penghayatan terhadap usaha-usaha Kerajaan dalam membangunkan Malaysia MADANI.
4. Kembara Perpaduan Malaysia MADANI memayungi tiga (3) kluster program yang berpaksikan kepada objektif dan teras Dasar Perpaduan Negara iaitu patriotisme dan demokrasi, identiti nasional dan ekosistem perpaduan, melalui penglibatan dan kerjasama semua pihak termasuklah pemimpin, agensi Kerajaan, pihak swasta, NGO, CSO dan masyarakat secara keseluruhannya.

5. Tiga (3) kluster program tersebut adalah:

(i) Semarak Kenegaraan

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

Contoh program:

- a) Citra Nusa@Muzium (sejarah dan tamadun)
- b) Apresiasi Rukun Negara (peringkat sekolah)
- c) Ikrar Setiaku (Rukun Negara)

Dan lain-lain.

(ii) Semarak Perpaduan

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dgn konsep perpaduan dalam kepelbagaian.

Contoh program:

- a) Sambutan Minggu Perpaduan,
- b) Galeri UNITI,
- c) Showcase Rumah KAMI,

Dan lain-lain.

(iii) Komuniti Rahmah

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling

menghormati, mengasihi dan menghargai melalui penggemblengan tenaga semua pihak KPN, agensi Kerajaan, swasta, NGO dan komuniti.

Contoh program:

- a) Bantuan Bakul RAHMAH,
 - b) Tuisyen RAHMAH,
 - c) Gerak RAHMAH: Jom Ronda SRS,
- Dan lain-lain.

6. Kerangka Perpaduan Malaysia MADANI yang dihasilkan oleh kementerian ini merupakan usaha penyatupaduan yang berterusan untuk mendidik dan membentuk peribadi serta tingkah laku masyarakat Malaysia selari dengan cita-cita dan prinsip Rukun Negara.

Sekian, terima kasih.

MAKLUMAT TAMBAHAN

1. **Penerapan semangat cintakan negara sepatutnya bermula dari seawal usia kanak-kanak. Bagaimana Kementerian Perpaduan Negara melaksanakan perkara ini?**

Kementerian Perpaduan Negara telah mengambil inisiatif membangunkan **Pelan Pendidikan Awal Kanak-Kanak Tabika Perpaduan 2021-2030** yang dilancarkan pada 24 Julai 2021.

Matlamat pelan ini adalah untuk memperkukuh dan memantapkan peranan Tabika Perpaduan sebagai institusi pendidikan awal kanak-kanak dalam memperkembangkan potensi serta melahirkan murid yang mempunyai semangat cintakan negara dan mengamalkan nilai-nilai murni dalam kehidupan seharian.

Pelan ini memberi fokus kepada **penghayatan pendidikan Rukun Negara dan penerapan nilai-nilai murni dalam diri murid** seawal usia 4 hingga 6 tahun yang merangkumi usaha pemantapan dalam aspek Kurikulum untuk membina potensi murid secara holistik dari aspek jasmani, emosi, rohani, intelek dan sosial.

Antara inisiatif baru yang diperkenalkan oleh pelan ini ialah:

- i. **Pengajaran Modul Pendidikan Rukun Negara**

Murid diberikan pengetahuan dan pemahaman bagaimana prinsip-prinsip yang terkandung dalam Rukun Negara boleh diamalkan dalam kehidupan seharian.

ii. **Pengajaran Komunikasi Asas Bahasa Ketiga**

Pengajaran asas **Bahasa Mandarin, Bahasa Tamil, Bahasa Kadazan di Negeri Sabah dan Bahasa Iban di Negeri Sarawak.**

iii. **Pengajaran Modul Jom Urus Diri**

Program ini memberi **pendedahan kepada murid tentang kemahiran asas pengurusan diri di rumah** seperti pengurusan tempat tidur dan mengurus kebersihan diri.

MAKLUMAT TAMBAHAN

Adalah didapati nilai-nilai MADANI yang disebutkan tadi boleh dikaitkan dengan mukadimah Rukun Negara, iaitu:

- (i) Mencapai perpaduan yang lebih erat dalam kalangan seluruh masyarakat – **dengan nilai MADANI ihsan**
- (ii) Memelihara satu cara hidup demokratik – **dengan nilai MADANI hormat**
- (iii) Mencipta satu masyarakat yang adil di mana kemakmuran negara dapat dinikmati bersama secara adil dan saksama - **dengan nilai MADANI kemampanan dan kesejahteraan**
- (iv) Membentuk satu sikap yang liberal terhadap tradisi kebudayaan yang kaya dan berbagai-bagai corak – **dengan nilai MADANI keyakinan dan hormat**
- (v) Membina sebuah masyarakat progresif yang akan menggunakan sains dan teknologi moden – **dengan nilai MADANI daya cipta**

Bagi menyokong hasrat membangun Malaysia MADANI, Kementerian ini telah menghasilkan Kerangka Perpaduan Malaysia MADANI melalui konsep Perpaduan Dalam Kepelbagaian.

Kerangka ini disusun seiring Dasar Perpaduan Negara yang berteraskan Perlembagaan Persekutuan dan Rukun Negara sebagai asas pembentukan negara dan penyatupaduan masyarakat.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 28 FEBRUARI 2023 (SELASA)

**DARIPADA : TUAN ONN BIN ABU BAKAR
[BATU PAHAT]**

SOALAN NO. 3:

Minta **MENTERI PERPADUAN NEGARA** menyatakan sering kali disebarkan tentang berlaku provokasi yang menyentuh sensitiviti antara kaum di negara kita. Apakah langkah yang telah dan akan dilakukan oleh pihak Kementerian untuk mencapai aspirasi membentuk 'Masyarakat Madani' yang sedang diusahakan oleh pihak Kerajaan.

JAWAPAN:

Tuan Yang di-Pertua,

1. Tidak dinafikan bahawa ada isu provokasi yang menyentuh sensitiviti antara kaum dan agama di negara kita, khususnya di media sosial. Kenyataan sebegini boleh mencetus ketidakharmonian dalam masyarakat.
2. Kementerian sentiasa memantau isu-isu yang boleh menggugat perpaduan dan keharmonian masyarakat melalui sistem e-SEPAKAT yang dibangunkan sejak tahun 2010. Hasil laporan daripada sistem e-SEPAKAT, Kerajaan mengambil langkah-langkah intervensi sosial berdasarkan isu atau insiden seperti melaksanakan program-program dialog, perbincangan kefahaman antara agama dan sebagainya.
3. Selain daripada program tersebut, dilaksanakan juga sesi mediasi oleh Mediator Komuniti yang ditauliah oleh Kementerian. Bagi kes-kes yang memerlukan tindakan bersepadu antara agensi, isu atau insiden akan dirujuk kepada agensi-agensi yang berkaitan seperti PDRM, MCMC dan PBT.
4. Di bawah pentadbiran Kerajaan Perpaduan, konsep Membangun Malaysia MADANI telah menjadi iltizam YAB Perdana Menteri Malaysia dan bertindak **sebagai ikhtiar yang menjelaskan strategi bagi mentadbir negara dengan berkesan.**
5. Bagi menyokong agenda membangun Malaysia MADANI, Kementerian ini telah **menghasilkan Kerangka Perpaduan Malaysia**

MADANI yang menjurus kepada dua fokus utama iaitu Kemasyarakatan dan Kebudayaan.

6. **Di bawah *flagship* Kembara Perpaduan Malaysia MADANI** tiga kluster program akan dilaksanakan iaitu:

(i) Semarak Kenegaraan

- **Meningkatkan pengetahuan, kefahaman dan penghayatan tentang cita-cita dan prinsip Rukun Negara** serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

(ii) Semarak Perpaduan

- **Menyemarakkan semangat perpaduan** dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian.

(iii) Program Komuniti Rahmah

- **Membina komuniti yang mampan dan rahmah** khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling menghormati, mengasihi dan menghargai melalui penggemblengan tenaga semua pihak KPN, agensi Kerajaan, swasta, NGO dan komuniti.

Sekian, terima kasih.

**PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEDUA,
PARLIMEN KELIMA BELAS,
MAJLIS MESYUARAT DEWAN RAKYAT**

PERTANYAAN : LISAN

DARIPADA : YB TUAN AZLI BIN YUSOF [SHAH ALAM]

TARIKH : 30 MAC 2023

YB TUAN AZLI BIN YUSOF [SHAH ALAM] minta **MENTERI PERPADUAN NEGARA** menyatakan **indeks perpaduan negara** terkini dan apakah pihak Kementerian **bercadang memperkenalkan undang-undang atau akta** bagi membendung elemen permusuhan antara kaum dan agama.

JAWAPAN:

Tuan Yang di-Pertua,

INDEKS PERPADUAN NASIONAL (IPNAS)

1. IPNas adalah sebuah indeks nasional yang menjadi kayu ukur terhadap keberkesanan pelaksanaan inisiatif dan program oleh Kerajaan untuk memastikan sumbangannya kepada tahap perpaduan dan keharmonian negara.
2. Tahap perpaduan rakyat diukur berdasarkan nilai kumulatif dalam **konstruk kesepaduan sosial** yang disumbang oleh **lima faktor penting iaitu Tahap Keetnikan, Hubungan Sosial Rentas Etnik, Etos Bangsa, Tadbir Urus dan Pembangunan dan Defisit Sosial**.
3. Kajian pembangunan **Indeks Perpaduan Nasional (IPNas)** dalam tahun 2018 menunjukkan perpaduan dalam kalangan rakyat Malaysia adalah pada tahap 0.567 (berdasarkan skala pengukuran di antara 0 hingga 1). Pencapaian ini adalah pada tahap sederhana.
4. Pencapaian tahun 2022 merekodkan nilai indeks masih dalam tahap sederhana, namun telah meningkat sebanyak 6.2% kepada 0.629 dalam tahun 2022. Pencapaian ini menunjukkan bahawa **tahap perpaduan dalam kalangan rakyat Malaysia adalah baik dan terkawal** walaupun mereka telah mengharungi kehidupan yang sukar akibat pandemik COVID-19 yang melanda negara sejak tahun 2020.

5. Pencapaian tahap perpaduan ini adalah hasil sumbangan signifikan faktor-faktor berikut iaitu **Tadbir Urus dan Pembangunan, Etos Bangsa dan Hubungan Sosial Rentas Etnik**. Sumbangan Tahap Keetnikan adalah kecil dan tidak signifikan.

PERUNDANGAN

6. Berhubung soalan tentang undang-undang bagi membendung elemen permusuhan antara kaum dan agama, **Perlembagaan Persekutuan** merupakan undang-undang tertinggi yang menjadi asas pembentukan negara ini serta identiti rakyat Malaysia. Sejarah penggubalan Perlembagaan Persekutuan perlu dihayati dan difahami oleh semua rakyat kerana melibatkan tolak ansur, kompromi dan pengorbanan semua pihak serta berlandaskan proses persetujuan timbal balik atau perkongsian kuasa antara pelbagai etnik. Antaranya ialah **Artikel 10** mengenai kebebasan bercakap, berhimpun dan bersatu, dan **Artikel 11** mengenai kebebasan beragama.
7. **Undang-undang sedia ada pada masa ini sudah memadai** bagi memastikan perpaduan kaum kekal terpelihara. Antara akta dan perundangan yang berkuat kuasa adalah:
 - i. **Akta Hasutan 1948 [Akta 15]** iaitu akta bagi mengawal kesalahan menghasut.
 - ii. **Akta Komunikasi dan Multimedia 1998 [Akta 588]** bagi mengawal kesalahan penggunaan tidak wajar kemudahan atau perkhidmatan rangkaian.

- iii. **Kanun Keseksaan (Penal Code) [Akta 574]** – iaitu akta yang digubal bagi membolehkan seseorang dihukum atas kesabitan jenayah, di mana ia terdapat **7 Seksyen yang berkaitan dengan perpaduan kaum dan keagamaan.**
1. Akta-akta sedia ada telah mengambil kira pelbagai aspek kawalan bagi mengekang unsur-unsur yang boleh menjejaskan keharmonian. Justeru, Kementerian ini berpendapat **tiada keperluan untuk menggubal atau memperkenalkan suatu undang-undang baharu** pada masa ini, dan memadai dengan **meningkatkan penguatkuasaan** undang-undang sedia ada.
 2. Walau bagaimanapun kalau keadaan mendesak dan Kerajaan memikirkan bahawa undang-undang sedia ada perlu dibuat semakan semula untuk pindaan bagi mengekang elemen permusuhan antara kaum dan agama, maka Kementerian akan menyokong penuh hasrat tersebut.

Sekian, terima kasih.

MAKLUMAT TAMBAHAN

Kanun Keseksaan (Penal Code) **Akta 574**, ada tujuh (7) seksyen:

- a. Seksyen 295 iaitu kesalahan membencana atau mencemarkan tempat sembahyang dengan niat hendak mengaibkan agama mana-mana golongan;
- b. Seksyen 296 iaitu kesalahan mengganggu perhimpunan yang menjalankan sembahyang;
- c. Seksyen 298 iaitu kesalahan menyebut perkataan-perkataan atau melakukan perbuatan-perbuatan lain dengan niat sengaja hendak melukakan perasaan agama seseorang;
- d. Seksyen 298A iaitu kesalahan menyebabkan, atas alasan-alasan agama, suasana tidak harmoni, perpecahan, perasaan permusuhan, benci-membenci atau niat jahat, atau memudaratkan pemeliharaan keadaan harmoni atau perpaduan;
- e. Seksyen 504 iaitu kesalahan dengan sengaja mengaibkan dengan niat hendak membangkitkan pecah keamanan;
- f. Seksyen 505 iaitu kesalahan mengeluarkan kenyataan-kenyataan yang mendatangkan khianat awam; dan
- g. Seksyen 506 iaitu kesalahan menakutkan secara jenayah.

Kesepaduan Sosial Rakyat Malaysia

- Rakyat Malaysia mempunyai **Rasa Kekitaan** yang tinggi sehingga **90%**.
- Rakyat Malaysia memperlihatkan **penyertaan** yang tinggi dalam NGO atau badan komuniti dan politik (**88.7%**).
- Rakyat Malaysia bersetuju bahawa **peluang kesamaan** telah meningkat dalam pelbagai aspek (**83.6%**).
- Rakyat Malaysia bersetuju mereka diberi **pengiktirafan** oleh pihak kerajaan (**81.6%**).
- Rakyat Malaysia bersetuju Tindakan **legitimasi** diambil serius oleh pihak kerajaan (**79.7%**).
- Rakyat Malaysia telah mendapat **peluang keterangkuman** (**79.6%**).

Pencapaian Tahap Perpaduan Berdasarkan Kesan Langsung dan Kesan Tidak Langsung Kategori Defisit Sosial

- Defisit Sosial adalah perkara-perkara yang perlu diuruskan supaya tidak menggugat pencapaian tahap perpaduan dalam kalangan rakyat Malaysia.
- Dalam IPNas 2022, hanya empat daripada sepuluh kategori Defisit Sosial iaitu **Pendidikan, Agama, Jurang Generasi dan Bahasa** didapati menggugat pencapaian tahap perpaduan rakyat secara tidak langsung melalui empat faktor kajian ini iaitu **Tahap Keetnikan, Hubungan Sosial Rentas Etnik, Etos Bangsa dan Tadbir Urus dan Pembangunan**.

- Kesimpulannya, kerajaan telah berjaya menguruskan pelbagai defisit sosial dalam negara ini sehingga dapat menggerakkan pencapaian tahap perpaduan ke tahap yang lebih baik.

Kepentingan IPNas

- Menjadi penanda aras dalam mengukur pencapaian tahap perpaduan negara.
- Mewujudkan konstruk yang komprehensif dalam mengukur tahap perpaduan di Malaysia.
- Mengukur tahap perpaduan masyarakat pelbagai etnik di Malaysia bagi melihat trend perubahan bersesuaian dengan isu semasa dan perubahan masyarakat.
- Memandu pembentukan Pelan Tindakan bagi meningkatkan tahap perpaduan.
- Menyediakan input bagi pelaksanaan program perpaduan dan integrasi nasional di Malaysia berdasarkan data empirikal.
- Membolehkan Malaysia dipetakan setaraf dengan negara-negara maju yang mempunyai indeks bagi mengukur kestabilan masyarakat berasaskan prestasi dan pencapaian kesepaduan sosial.

**PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEDUA,
PARLIMEN KELIMA BELAS,
MAJLIS MESYUARAT DEWAN RAKYAT**

PERTANYAAN : LISAN

**DARIPADA : YB DATO' DR. ZULKAFPERI BIN HANAPI
[TANJONG KARANG]**

TARIKH : 30 MAC 2023

**YB DATO' DR. ZULKAFPERI BIN HANAPI [TANJONG KARANG] minta
MENTERI PERPADUAN NEGARA menyatakan:**

- I. Sejauh mana pencapaian Pelan Tindakan Perpaduan Negara 2021-2030?
- II. Apakah cabaran perpaduan yang dihadapi oleh Kementerian?
- III. Apakah kaitan Indeks Negara Rahmah dengan Indeks Perpaduan Negara (IPNas)?

JAWAPAN:

Tuan Yang di-Pertua,

1. **Dasar Perpaduan Negara (DPN)** dan **Pelan Tindakan Perpaduan Negara 2021-2030** merupakan antara dokumen utama Kementerian dalam merangka halatuju agenda perpaduan nasional dan dokumen dasar yang dihasilkan adalah **selari dengan Kerangka MADANI** yang **menekankan kepada Perlembagan Persekutuan dan Rukun Negara** sebagai asas pembentukan negara dan penyatupaduan masyarakat.
2. Program-program yang dilaksanakan oleh Kementerian di dalam Kerangka Perpaduan Malaysia MADANI juga adalah berdasarkan kepada **tiga (3) teras utama Dasar Perpaduan Negara** seperti berikut;
 - a. Patriotisme dan demokrasi;
 - b. Identiti nasional; dan
 - c. Ekosistem perpaduan.
3. Dalam masa yang sama, Kementerian juga akan sentiasa membuat semakan terhadap dasar dan pelan tindakan yang dihasilkan untuk tujuan **penambahbaikan dari masa ke semasa**.
4. Jawatankuasa yang bertanggungjawab untuk menilai sejauh manakah pencapaian Pelan Tindakan Perpaduan Negara 2021-2030 berjalan lancar dan tercapai ialah **Jawatankuasa Pemantauan Pelan Tindakan Perpaduan Negara 2021-2030**. Pada ketika ini, program-program yang dilaksanakan berdasarkan Pelan Tindakan Perpaduan Negara 2021-2030 adalah berjalan dengan lancar.

5. Majlis Konsultasi Perpaduan Negara (MKPN) dengan kerjasama Institut Kajian Etnik (KITA), Universiti Kebangsaan Malaysia telah **mengadakan 18 siri Dialog Perpaduan di seluruh negara** dari tahun 2014-2015 bagi **mengenal pasti permasalahan, isu dan cabaran** yang wujud yang disuarakan oleh segenap lapisan masyarakat serta aspirasi dan harapan mereka. Hasil daripada siri dialog ini, sebanyak **sembilan (9) Defisit Sosial** telah dikenal pasti seperti berikut:

- a) Etnisiti
- b) Kelas Sosial
- c) Bahasa
- d) Agama
- e) Pendidikan
- f) Jurang Generasi
- g) Gender
- h) Politik Federalisme
- i) Ruang Bandar – Desa

6. Seterusnya, pada tahun 2018, pihak KITA sekali lagi telah mengadakan sesi libat urus di seluruh negara bagi mendapatkan input, pandangan dan pendapat mengenai isu-isu yang boleh menjejaskan penyatuan dan perpaduan nasional ke arah membina bangsa Malaysia yang bersatu. Dalam sesi ini, selain daripada sembilan (9) Defisit Sosial, satu lagi cabaran utama yang dikenal pasti ialah **media**. Justeru, terdapat **sepuluh (10) Defisit Sosial** yang perlu ditangani dengan sewajarnya untuk memastikan tahap perpaduan terus kekal stabil dan terkawal.

7. Dalam IPNas 2022, hanya empat daripada sepuluh kategori Defisit Sosial iaitu **Pendidikan, Agama, Jurang Generasi dan Bahasa** dikesan memberi cabaran dan menggugat pencapaian tahap perpaduan rakyat secara tidak langsung melalui empat faktor kajian ini iaitu **Tahap Keetnikan, Hubungan Sosial Rentas Etnik, Etos Bangsa dan Tadbir Urus dan Pembangunan.**
8. **Indeks Malaysia Negara Rahmah 2022** telah dihasilkan oleh Pertubuhan IKRAM Malaysia (IKRAM) untuk mengukur pencapaian semasa sesebuah negara ke arah menjadi sebuah negara Rahmah pada tahun 2035. 12 ciri Rahmah tersebut adalah:
- a. Kepimpinan yang kompeten dan integriti;
 - b. Sistem pemerintahan yang berasaskan semak dan imbang yang berkesan;
 - c. Tadbir urus yang baik;
 - d. Undang-undang yang adil;
 - e. Masyarakat yang berilmu, berakhlak dan penyayang;
 - f. Institusi keluarga yang kukuh;
 - g. Hubungan etnik dan penganut agama yang harmoni;
 - h. Ekonomi yang mampan;
 - i. Agihan kekayaan yang saksama;
 - j. Pembangunan yang lestari;
 - k. Kebajikan, kesihatan dan keselamatan rakyat yang terpelihara;
dan
 - l. Menerajui usaha keamanan dan kesejahteraan sejagat.
9. Indeks yang dihasilkan ini adalah berkaitan juga dengan tahap kesejahteraan dan perpaduan di negara kita, di mana masing-masing menunjukkan kesepaduan antara kaum di negara kita berada pada

tahap yang baik. Bagaimanapun, usaha berterusan perlu dilakukan bagi memastikan perpaduan yang ada ini terus kekal dan terpelihara.

10. Manakala, Indeks Perpaduan Nasional (IPNas) adalah indeks nasional yang menjadi kayu ukur terhadap keberkesanan pelaksanaan inisiatif dan program oleh Kerajaan untuk memastikan sumbangannya kepada tahap perpaduan dan keharmonian negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' AZMAN BIN NASRUDIN
[PADANG SERAI]**

SOALAN NO. 83:

YB DATO' AZMAN BIN NASRUDIN (PADANG SERAI) minta **MENTERI PERPADUAN NEGARA** menyatakan pendirian Kerajaan terhadap Dasar Perpaduan Negara dan Rangka Tindakan Perpaduan Negara 2021 - 2030 yang telah dilancarkan oleh Kerajaan sebelum ini.

JAWAPAN:

Tuan Yang di-Pertua,

1. Kementerian Perpaduan Negara memainkan peranan sebagai **peneraju agenda perpaduan nasional** yang bersifat inklusif merentasi pelbagai golongan masyarakat demi kemakmuran bersama.

2. **Dasar Perpaduan Negara (DPN)** dan **Rangka Tindakan (Blueprint) Perpaduan Negara 2021-2030** merupakan dokumen utama Kementerian dalam merangka halatuju agenda perpaduan nasional dan dokumen dasar yang dihasilkan adalah **selari dengan Kerangka MADANI** yang **menekankan kepada Perlembagaan Persekutuan dan Rukun Negara** sebagai asas pembentukan negara dan penyatupaduan masyarakat.

3. Program-program yang dilaksanakan oleh Kementerian di dalam Kerangka Perpaduan Malaysia MADANI juga adalah berdasarkan kepada **tiga (3) teras utama Dasar Perpaduan Negara** seperti berikut;
 - (i) Patriotisme dan Demokrasi;
 - (ii) Identiti Nasional; dan
 - (iii) Ekosistem Perpaduan.

4. Dalam masa yang sama, Kementerian juga akan sentiasa membuat semakan terhadap dasar dan pelan tindakan yang dihasilkan untuk tujuan **penambahbaikan dari masa ke semasa**.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : YB DR. HAJAH HALIMAH ALI
[KAPAR]**

SOALAN NO. 162:

YB DR. HAJAH HALIMAH ALI (KAPAR) minta **MENTERI PERPADUAN NEGARA** menyatakan adakah Kementerian sudah membuat kajian terperinci mengenai punca utama wujudnya ketegangan kaum pasca merdeka dan apakah hasil dapatan kajian tersebut.

JAWAPAN

Yang Di Pertua,

1. Majlis Konsultasi Perpaduan Negara (MKPN) dengan kerjasama Institut Kajian Etnik (KITA), Universiti Kebangsaan Malaysia telah **mengadakan 18 siri Dialog Perpaduan di seluruh negara** dari 2014-2015 bagi **mengenal pasti permasalahan, isu dan cabaran** yang wujud yang disuarakan oleh segenap lapisan masyarakat serta aspirasi dan harapan mereka. Hasil daripada siri dialog ini, sebanyak **sembilan (9) Defisit Sosial** telah dikenal pasti seperti berikut:
 - a) Etnisiti
 - b) Kelas Sosial
 - c) Bahasa
 - d) Agama
 - e) Pendidikan
 - f) Jurang Generasi
 - g) Gender
 - h) Politik Federalisme
 - i) Ruang Bandar – Desa

2. Seterusnya, pada tahun 2018, pihak KITA sekali lagi telah mengadakan sesi libat urus di seluruh negara bagi mendapatkan input, pandangan dan pendapat mengenai isu-isu yang boleh menjejaskan penyatuan dan perpaduan nasional ke arah membina bangsa Malaysia yang bersatu. Dalam sesi ini, selain daripada sembilan (9) defisit sosial, satu lagi cabaran utama yang dikenal pasti ialah **media**. Justeru, terdapat **sepuluh (10) Defisit Sosial** yang perlu ditangani

dengan sewajarnya untuk memastikan tahap perpaduan terus kekal stabil dan terkawal.

3. Pada tahun 2018 juga, Jabatan Perpaduan Negara dan Integrasi Nasional (JPNIN) bersama KITA telah membangunkan satu indeks bagi mengukur tahap kesepaduan dalam kalangan masyarakat iaitu **Indeks Perpaduan Nasional (IPNas)**, dengan mengambil kira sepuluh (10) Defisit Sosial tersebut.

4. Pada tahun 2022, Kementerian Perpaduan Negara (KPN) bersama KITA telah menjalankan **kajian IPNas 2022 yang menunjukkan skor 0.629**, bermaksud perpaduan dalam kalangan rakyat Malaysia berada pada **tahap sederhana dan terkawal**. IPNas 2022 menunjukkan **peningkatan sebanyak 0.062** berbanding skor IPNas 2018 iaitu 0.567.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

DARIPADA : YB TUAN AZLI BIN YUSOF [SHAH ALAM]

SOALAN NO. 569:

YB TUAN AZLI BIN YUSOF (SHAH ALAM) minta **MENTERI PERPADUAN NEGARA** menyatakan apakah Kerajaan bersedia untuk menggubal semula Akta Perhubungan Kaum untuk mengawal ketegangan kaum yang semakin meruncing di negara ini.

JAWAPAN:

Tuan Yang di-Pertua,

1. Pada masa ini, **undang-undang sedia ada sudah memadai** dalam memastikan hubungan antara kaum terpelihara. Akta dan perundangan yang berkuat kuasa adalah:
 - I. Subseksyen 4(1) Akta Hasutan 1948 [*Akta 15*] iaitu kesalahan menghasut;
 - II. Seksyen 233 Akta Komunikasi dan Multimedia 1998 [*Akta 588*] iaitu kesalahan penggunaan tidak wajar kemudahan rangkaian atau perkhidmatan rangkaian;
 - III. Seksyen 295 Kanun Keseksaan [*Akta 574*] iaitu kesalahan membencana atau mencemarkan tempat sembahyang dengan niat hendak mengaibkan agama mana-mana golongan;
 - IV. Seksyen 296 Kanun Keseksaan iaitu kesalahan mengganggu perhimpunan yang menjalankan sembahyang;
 - V. Seksyen 298 Kanun Keseksaan iaitu kesalahan menyebut perkataan-perkataan atau melakukan perbuatan-perbuatan lain dengan niat sengaja hendak melukakan perasaan agama seseorang;
 - VI. Seksyen 298A Kanun Keseksaan iaitu kesalahan menyebabkan, atas alasan-alasan agama, suasana tidak harmoni, perpecahan, perasaan permusuhan, benci-membenci

atau niat jahat, atau memudaratkan pemeliharaan keadaan harmoni atau perpaduan;

- VII. Seksyen 504 Kanun Keseksaan iaitu kesalahan dengan sengaja mengaibkan dengan niat hendak membangkitkan pecah keamanan;
 - VIII. Seksyen 505 Kanun Keseksaan iaitu kesalahan mengeluarkan kenyataan-kenyataan yang mendatangkan khianat awam; dan
 - IX. Seksyen 506 Kanun Keseksaan [*Akta 574*] iaitu kesalahan menakutkan secara jenayah.
2. Justeru, Kementerian ini berpendapat **tiada keperluan untuk menggubal atau memperkenalkan suatu undang-undang baharu seperti Akta Perhubungan Kaum** pada masa ini dan penguatkuasaan undang-undang sedia untuk mengawal ketegangan kaum boleh dipertingkatkan lagi.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

**DARIPADA : TUAN MOHD NAZRI BIN ABU HASSAN
[MERBOK]**

TARIKH : 6 JUN 2023 (SELASA)

SOALAN NO. 4

Tuan Mohd Nazri bin Abu Hassan [Merbok] minta **MENTERI PERPADUAN NEGARA** menyatakan Indeks Perpaduan Nasional Negara dan apakah situasi perpaduan negara pada masa ini. Apakah jenis program yang efektif, yang telah dirancang oleh Kementerian untuk mengeratkan lagi perpaduan, persefahaman dan penerimaan rakyat negara ini yang terdiri daripada pelbagai kaum dan agama.

JAWAPAN:

Tuan Yang Di-Pertua,

1. **Indeks Perpaduan Nasional (IPNas)** adalah sebuah indeks nasional yang menjadi kayu ukur terhadap keberkesanan pelaksanaan inisiatif dan program oleh Kerajaan untuk memastikan sumbangannya kepada tahap perpaduan dan keharmonian negara.
2. IPNas dibangunkan Kementerian Perpaduan Negara dengan kerjasama **Institut Kajian Etnik (KITA) Universiti Kebangsaan Malaysia (UKM)**. Pengukuran tahap perpaduan melalui IPNas telah dilaksanakan sebanyak dua (2) kali iaitu pada tahun **2018** dan **2022**.
3. Tahap perpaduan rakyat diukur berdasarkan nilai kumulatif dalam **konstruk kesepaduan sosial** yang disumbang oleh **lima faktor penting iaitu Tahap Keetnikan, Hubungan Sosial Rentas Etnik, Etos Bangsa, Tadbir Urus dan Pembangunan dan Defisit Sosial**.
4. **Skor Indeks Perpaduan Nasional (IPNas) 2022 ialah 0.629** menunjukkan **peningkatan sebanyak 0.062** berbanding skor 0.567 tahun 2018 yang bermaksud perpaduan dalam kalangan rakyat Malaysia berada pada **tahap sederhana dan terkawal**.
5. **Pencapaian** tahap perpaduan ini adalah hasil sumbangan signifikan faktor-faktor berikut iaitu **Tadbir Urus dan Pembangunan, Etos Bangsa dan Hubungan Sosial Rentas Etnik**. Sumbangan Tahap Keetnikan adalah kecil dan tidak signifikan.

6. Dapatan IPNas 2022 pula menunjukkan **dua (2) perkara yang perlu diberi perhatian** bagi mengukuhkan lagi perpaduan di negara ini iaitu **tadbir urus dan pembangunan** serta **aspek hubungan sosial rentas etnik**.
7. Dalam menguruskan perpaduan, perkara yang paling utama adalah usaha-usaha menggalakkan **persefahaman, toleransi dan hormat menghormati** antara masyarakat pelbagai kaum, agama dan budaya. Realitinya perpaduan adalah perkara yang perlu diurus melalui **pelbagai mekanisme** seperti interaksi dan jalinan hubungan sosial secara berterusan pada **peringkat “inter” dan “intra” etnik** dengan penuh berhemah.
8. Berdasarkan dapatan IPNas 2022 inilah, Kementerian telah menyusun program-program di bawah *flagship* **Kembara Perpaduan Malaysia MADANI** bagi terus menyemarakkan perpaduan dalam kalangan masyarakat berbilang kaum, agama dan budaya.
9. Tiga (3) kluster program akan dilaksanakan iaitu:
 - I. **Semarak Kenegaraan**
 - bagi meningkatkan pengetahuan, kefahaman dan penghayatan tentang Perlembagaan Persekutuan dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat. Empat (4) kumpulan sasaran adalah umum, mahasiswa, pelajar sekolah dan komuniti. Program pengisian adalah seperti Dialog Anak Muda, Apresiasi dan pameran Mini Rukun

Negara, *cross culture sharing session*, Bicara Pemikiran Tokoh Negarawan, dan lain-lain.

II. **Semarak Perpaduan**

- bagi menyemarakkan semangat perpaduan dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian ke arah merealisasikan aspirasi Malaysia Madani. Program-program adalah untuk memupuk keharmonian masyarakat melalui detik-detik perpaduan (*moment of unity*) seperti Sambutan Minggu Perpaduan, Galeri Uniti, Uniti walk/run/cycling, liga sukan perpaduan, Uniti Keamatan-Gawai, dan lain-lain.

III. **Komuniti Rahmah**

- untuk membina komuniti yang mampan dan rahmah khususnya dalam KRT yang menjunjung tinggi nilai-nilai kemanusiaan dengan saling menghormati, mengasihi dan menghargai melalui kerjasama semua pihak kementerian, agensi Kerajaan, swasta, NGO dan komuniti. Antara program adalah seperti Bakul Rahmah, Ziarah Rahmah, projek ekonomi KRT, Prog Mesra Jiran, dan lain-lain.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

**DARIPADA : DATUK LARRY SOON @ LARRY SNG WEI
SHIEN [JULAU]**

TARIKH : 6 JUN 2023 (SELASA)

SOALAN NO. 113

Datuk Larry Soon @ Larry Sng Wei Shien [Julau] minta **MENTERI PERPADUAN NEGARA** menyatakan adakah Kementerian mempunyai bantuan dana atau peruntukan khusus buat mana-mana pertubuhan keagamaan selain agama Islam untuk mereka membuat sebarang bentuk aktiviti-aktiviti dan juga program pembangunan agar pertubuhan minoriti di negara turut aktif berkembang.

JAWAPAN:

Tuan Yang Di-Pertua,

1. Bagi meraikan kepelbagaian dan merapatkan jurang perbezaan, pihak Kementerian Perpaduan Negara (KPN) telah diperuntukkan sebanyak RM 50 juta dalam belanjawan tahun 2023 bagi pelbagai program antaranya 'Kembara Perpaduan Malaysia Madani' dan 'Ini Warisan Kita'. Program ini akan menganjurkan pelbagai aktiviti perpaduan dan integrasi sosial antara komuniti seperti liga sukan perpaduan, pertandingan kebudayaan, fiesta perayaan dan cita rasa menu masyarakat Malaysia yang melibatkan semua kaum dan agama di seluruh negara termasuklah selain Islam.
2. Bagi peruntukan pembangunan di bawah belanjawan tahun 2023, peruntukan penyelenggaraan dan baik pulih rumah ibadat bukan Islam di seluruh negara telah diletakkan di bawah penyelarasan Kementerian Pembangunan Kerajaan Tempatan (KPKT).
3. Di bawah Inisiatif Belanjawan 2023, Kementerian Pembangunan Kerajaan Tempatan (KPKT) telah diberikan tanggungjawab untuk menguruskan inisiatif penyelenggaraan Rumah Ibadat Bukan Islam (RIBI) bagi tahun 2023 sebanyak RM50 juta bermula pada April 2023. Objektif inisiatif ini adalah untuk meringankan beban kewangan pihak pengurusan rumah ibadat bukan Islam dalam menanggung kos-kos pembaikan, penyelenggaraan dan kerja-kerja kecemasan di rumah-rumah ibadat Bukan Islam masing-masing.
4. Pada masa kini KPKT sedang dalam tindakan memuktamadkan Garis Panduan Permohonan Inisiatif Penyelenggaraan Rumah

Ibadat Bukan Islam 2023. Garis panduan ini termasuk borang permohonan akan dimuktamadkan sebelum akhir bulan Mei dan KPKT akan memaklumkan tarikh mula dan tutup permohonan dalam tempoh masa terdekat.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS TAHUN 2023**

PERTANYAAN : LISAN

**DARIPADA : DATO' AZMAN BIN NASRUDIN
[PADANG SERAI]**

TARIKH : 6 JUN 2023 (SELASA)

SOALAN NO. 135

Dato' Azman Bin Nasrudin [Padang Serai] minta **MENTERI PERPADUAN NEGARA** menyatakan bilangan Kawasan Rukun Tetangga (KRT) yang ditubuhkan di seluruh negara untuk memperkasa komuniti setempat mengikut negeri, dan apakah usaha Kementerian untuk menggalakkan penyertaan anak muda dalam aktiviti kesukarelawanan di Rukun Tetangga.

JAWAPAN:

Tuan Yang di-Pertua,

1. Kawasan Rukun Tetangga (KRT) telah dilancarkan pada 29 Ogos 1975 sebagai organisasi sukarela dan tonggak perpaduan dalam komuniti. Sehingga kini, terdapat sebanyak **8,348 KRT** ditubuhkan **di seluruh negara. Pecahan KRT mengikut 16 negeri** adalah seperti berikut:

- 1.1 Selangor - 1,077
- 1.2 Sabah - 1,074
- 1.3 Sarawak - 1,064
- 1.4 Johor - 849
- 1.5 Perak - 583
- 1.6 Pahang - 557
- 1.7 Pulau Pinang - 511
- 1.8 Terengganu - 519
- 1.9 Kedah - 510
- 1.10 Kelantan - 470
- 1.11 Negeri Sembilan - 354
- 1.12 WP Kuala Lumpur - 298
- 1.13 Melaka - 252
- 1.14 Perlis - 139
- 1.15 WP Putrajaya - 55
- 1.16 WP Labuan - 36

2. JPNIN telah memperkasakan peranan dan memperluaskan akses komuniti dalam KRT menerusi pewujudan **enam kelompok komuniti** mengikut perkembangan zaman, berimpak tinggi dan

bersasar mengikut umur. Platform ini termasuk penubuhan Jiran Muda, Jiran Wanita, Jiran Warga Emas, Tunas Jiran, Skim Rondaan Sukarela (SRS) dan Skwad Uniti di bawah payung Jawatankuasa KRT.

3. Kerajaan sentiasa memberi perhatian terhadap tahap keaktifan penglibatan dan penghayatan generasi muda dalam program kesukarelawan dalam komuniti setempat. Oleh itu, sebanyak **5,915 Jiran Muda** telah wujud tepat pada masanya sebagai salah satu kelompok yang memperkasakan **komuniti belia**.
4. Antara lain, fokus kewujudan Jiran Muda dalam KRT termasuk:
 - 4.1 Melibatkan golongan muda dalam aktiviti-aktiviti kejranaan dan pembangunan komuniti.
 - 4.2 Memberi latihan kepimpinan dan perkembangan jasmani, rohani, emosi dan sosial.
 - 4.3 Menyediakan peluang kepada golongan muda untuk meningkatkan pengetahuan dan kefahaman mereka tentang kepelbagaian kehidupan dalam masyarakat yang berbeza latar belakang dan budaya.
 - 4.4 Menggalakkan golongan muda untuk melibatkan diri dalam kerja-kerja sukarela.
5. Justeru, berikut adalah pelbagai pendekatan yang telah, sedang dan akan dilaksanakan oleh pihak Kementerian dari semasa ke semasa:

5.1 Beberapa inisiatif telah digariskan dalam **Pelan Pemerkasaan Kepimpinan Komuniti Rukun Tetangga 2021-2030** khususnya untuk golongan muda:

- (i) Penetapan kuota **sekurang-kurangnya 30 peratus anggota dalam Jawatankuasa KRT** dipegang oleh **golongan muda** yang berumur di antara **18 hingga 35 tahun**.
- (ii) **Meningkatkan penglibatan golongan muda sebagai pemimpin pelapis Rukun Tetangga** melalui beberapa program seperti Program Pemimpin Muda Lestari, Pemimpin Muda Prihatin, Program *Young, Effective and Smart (YES)*, Jelajah Pemimpin Muda, *Midnight Adventure for Youngsters* serta Pemikir Muda Inovatif dan Kreatif.
- (iii) Memperkasakan kelompok komuniti Jiran Muda di bawah Teras Kelima dalam pelan ini melalui dua strategi utama iaitu **memperluaskan penubuhan Jiran Muda dalam kawasan kejiranan** serta **menambah baik program dan aktiviti Jiran Muda**. Terdapat **lebih 20 program dan aktiviti** berkaitan Jiran Muda telah dirangka dan akan dilaksanakan dari semasa ke semasa. Ini merangkumi Program Usahawan Muda (*MyPreneur*), Program Jejak Kerjaya, Projek Inovasi Jiran Muda, Program *Internet of Thing (IoT)* dan Program Tuisyen Percuma.

5.2 Memberi **pengiktirafan** kepada ahli-ahli Jiran Muda yang berprestasi tinggi dalam penyampaian perkhidmatan dan

memberi sumbangan pembangunan yang berimpak tinggi kepada komuniti masing-masing menerusi **Majlis Anugerah Perdana Rukun Tetangga** yang dilaksanakan setiap dua tahun sekali. Pengiktirafan ini sekali gus dapat meningkatkan penglibatan aktif golongan muda dalam komuniti.

- 5.3 Mewujudkan kerjasama strategik di antara Kementerian dengan pelbagai agensi luar seperti Agensi Kerajaan lain, Pertubuhan Bukan Kerajaan (NGO), sektor korporat dan pihak swasta dalam usaha memperbanyakkan dan mempelbagaikan program dan pengisian aktiviti kesukarelawan dan kemasyarakatan yang seiring dengan cabaran, keperluan, trend dan minat anak-anak muda masa kini.
6. Kelebihan golongan remaja dengan aura dan usia muda perlu dimanfaatkan sebaiknya. Oleh itu, ahli-ahli Jiran Muda dalam KRT dilihat sebagai denyut nadi dan penggerak kepada pembangunan masyarakat dan perpaduan negara MADANI yang inklusif. Menyedari akan kepentingan ini, Kementerian dan JPNIN akan terus **menyediakan ruang, peluang dan mekanisme yang bersesuaian** agar keterlibatan dan potensi kesukarelawan golongan muda terserlah dan berkembang ke tahap yang sepatutnya.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

DARIPADA : TUAN GANABATIRU A/L VERAMAN [KLANG]

TARIKH : 6 JUN 2023 (SELASA)

SOALAN NO. 159

Tuan Ganabatiru A/L Veraman [Klang] minta **MENTERI PERPADUAN NEGARA** menyatakan saban hari kita mendengar isu rasis dan ekstrem dijadikan modal tuduhan berkaitan perkauman dan agama oleh pihak-pihak tertentu dan ini telah mempengaruhi sentimen sesuatu kaum di negara ini. Adakah dalam masa terdekat Kerajaan akan mengusulkan suatu undang-undang seperti anti perkauman *hate speech* atau undang-undang *minority protection act* dan sebagainya.

JAWAPAN:

Tuan Yang di-Pertua,

1. **Perlembagaan Persekutuan** telah memperuntukkan bahawa semua orang adalah sama di sisi undang-undang dan berhak untuk mendapat perlindungan yang sama rata dan adil. Kecuali sebagaimana yang dibenarkan dengan nyata oleh Perlembagaan Persekutuan, **diskriminasi terhadap warganegara tidak boleh diamalkan** semata-mata atas alasan agama, ras, keturunan, warna kulit, tempat lahir atau jantina.

2. Pada masa ini, undang-undang sedia ada sudah memadai dalam memastikan hubungan antara kaum terpelihara. Sesiapa yang dengan sengaja melakukan apa-apa perbuatan, mencetuskan atau mengeluarkan sebarang kenyataan yang menggugat perpaduan kaum dan agama boleh disiasat dan didakwa, antara lain, di bawah akta-akta yang berikut:
 - I. Subseksyen 4(1) Akta Hasutan 1948 [*Akta 15*] iaitu kesalahan menghasut;

 - II. Seksyen 233 Akta Komunikasi dan Multimedia 1998 [*Akta 588*] iaitu kesalahan penggunaan tidak wajar kemudahan rangkaian atau perkhidmatan rangkaian;

- III. Seksyen 295 Kanun Keseksaan [Akta 574] iaitu kesalahan membencana atau mencemarkan tempat sembahyang dengan niat hendak mengaibkan agama mana-mana golongan;
 - IV. Seksyen 296 Kanun Keseksaan iaitu kesalahan mengganggu perhimpunan yang menjalankan sembahyang;
 - V. Seksyen 298 Kanun Keseksaan iaitu kesalahan menyebut perkataan-perkataan atau melakukan perbuatan-perbuatan lain dengan niat sengaja hendak melukakan perasaan agama seseorang;
 - VI. Seksyen 298A Kanun Keseksaan iaitu kesalahan menyebabkan, atas alasan-alasan agama, suasana tidak harmoni, perpecahan, perasaan permusuhan, benci-membenci atau niat jahat, atau memudaratkan pemeliharaan keadaan harmoni atau perpaduan;
 - VII. Seksyen 504 Kanun Keseksaan iaitu kesalahan dengan sengaja mengaibkan dengan niat hendak membangkitkan pecah keamanan;
 - VIII. Seksyen 505 Kanun Keseksaan iaitu kesalahan mengeluarkan kenyataan-kenyataan yang mendatangkan khianat awam; dan
 - IX. Seksyen 506 Kanun Keseksaan [Akta 574] iaitu kesalahan menakutkan secara jenayah.
3. Justeru, Kementerian ini berpendapat **tiada keperluan untuk menggubal atau memperkenalkan suatu undang-undang baharu** pada masa ini dan memadai dengan **meningkatkan**

penguatkuasaan undang-undang sedia ada. Walau bagaimanapun, kalau keadaan mendesak dan Kerajaan memikirkan bahawa undang-undang sedia ada perlu dibuat semakan semula untuk pindaan bagi mengekang sesetengah percakapan (***hate speech***) atau **perbuatan provokasi** yang boleh menggugat keharmonian, maka Kementerian akan menyokong penuh hasrat tersebut.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

**DARIPADA : TUAN WAN RAZALI BIN WAN NOR
[KUANTAN]**

TARIKH : 12 JUN 2023 (ISNIN)

SOALAN NO. 6

Tuan Wan Razali bin Wan Nor [Kuantan] minta **MENTERI PERPADUAN NEGARA** menyatakan Kementerian Perpaduan Negara terlibat dalam proses pemantauan dan suntingan drama dan filem bagi memastikan nilai-nilai kerukunan dalam karya-karya yang dihasilkan serta tidak menyentuh isu sensitif yang melibatkan sensitiviti kaum dan agama.

JAWAPAN:

Tuan Yang di-Pertua,

1. Kementerian Perpaduan Negara **tidak terlibat** dalam proses pemantauan dan suntingan drama dan filem bagi memastikan nilai-nilai kerukunan dalam karya-karya yang dihasilkan serta tidak menyentuh isu sensitif yang melibatkan sensitiviti kaum dan agama.

2. Urusan yang **berkaitan dengan proses penerbitan dan penggambaran sesebuah filem** dilaksanakan oleh **Perbadanan Kemajuan Filem Nasional Malaysia (FINAS)**, di bawah **Kementerian Komunikasi dan Digital (KKD)**. Manakala setelah sesebuah filem siap, **urusan pemberian kelulusan ke atas kandungan filem sebelum ditayangkan** kepada masyarakat umum pula terletak di bawah **tanggungjawab Lembaga Penapis Filem (LPF)**, Kementerian Dalam Negeri (KDN), kecuali bagi tayangan melalui medium internet berdasarkan kepada Akta Penapisan Filem 2022 [Akta 620]. Dalam melaksanakan penapisan filem, LPF merujuk kepada Garis Panduan Penapisan Filem KDN Tahun 2010 yang mengandungi empat (4) aspek utama iaitu:
 - I. Keselamatan dan Ketenteraman Awam;
 - II. Keagamaan;
 - III. Sosiobudaya; dan
 - IV. Ketertiban dan Ketatasusilaan

Sekian, terima kasih.

Maklumat Tambahan

A. Peranan Kementerian Perpaduan Negara – Sistem e-sepakat

1. Dalam hal ini, peranan Kementerian Perpaduan Negara melalui usaha pemantauan yang dilaksanakan melalui sistem e-SEPAKAT yang dibangunkan sejak tahun 2010. Kementerian mengambil langkah-langkah intervensi sosial berdasarkan isu atau insiden seperti melaksanakan program-program dialog, perbincangan kefahaman antara agama dan sebagainya.
2. Selain daripada program tersebut, dilaksanakan juga sesi mediasi oleh Mediator Komuniti yang ditauliah oleh Kementerian. Bagi kes-kes yang memerlukan tindakan bersepadu antara agensi, isu atau insiden akan dirujuk kepada agensi-agensi yang berkaitan seperti PDRM, MCMC dan PBT.

B. Filem Mentega Terbang

1. Semakan Lembaga Penapisan Filem (LPF) mendapati filem 'Mentega Terbang' tiada dalam rekod penapisan pihak terbabit. LPF dalam satu kenyataan hari ini, memaklumkan filem itu juga didapati ditayangkan secara dalam talian (melalui platform internet).
2. Selain itu, penapisan oleh LPF turut dilaksanakan berpandukan kepada Perlembagaan Persekutuan, Rukun Negara serta dasar-dasar semasa Kerajaan.
3. Malah hasil penelitian Jabatan Kemajuan Islam Malaysia (JAKIM) terhadap kandungan filem 'Mentega Terbang' mendapati, terdapat

pertentangan jelas dengan akidah dan cara kehidupan umat Islam di Malaysia yang beraliran Mazhab Syafie.

4. Menteri di Jabatan Perdana Menteri (Hal Ehwal Agama), Datuk Dr Mohd Na'im Mokhtar, berkata JAKIM memohon Suruhanjaya Komunikasi dan Multimedia Malaysia (MCMC), supaya tindakan dapat diambil berpandukan undang-undang sedia ada.

5. Suruhanjaya Komunikasi dan Multimedia Malaysia (SKMM) memaklumkan, platform penstriman Viu hentikan tayangan filem kontroversi, 'Mentega Terbang' pada 27 Februari lalu.

C. Peranan Finas dan LPF

1. Bagi perkara yang menyentuh isu-isu sensitif yang melibatkan agama atau bangsa, Kementerian Komunikasi dan Digital (KKD) melalui agensi di bawahnya sentiasa menekankan keperluan nilai-nilai murni dan kerukunan didalam sesebuah penerbitan karya kandungan kreatif.

2. Sebagai contoh, KKD melalui agensi di bawahnya seperti **FINAS** telah menetapkan antara **syarat yang untuk menghasil kandungan kreatif oleh penerima Dana Kandungan Digital (DKD)** ialah perlu mendapat **kelulusan Lembaga Penapisan Filem (LPF) serta stesen penyiar** bagi memastikan kandungan kreatif yang disediakan mengikut peraturan yang diperuntukan oleh Kerajaan serta tidak menyentuh isu sensitif melibatkan kaum dan agama.

3. Manakala, **Jabatan Penyiaran Malaysia (RTM)** pula, sentiasa

memastikan konteks penapisan dan kawalan kualiti (QC) kandungan bahan untuk disiarkan dipatuhi dengan **berpandukan kod etika** penyiaran yang didasari oleh tanggungjawab dan kepekaan terhadap kehendak masyarakat, tatanilai dan sosio-budaya negara.

4. Semua bahan yang ditayangkan di saluran TV RTM, perlu melalui proses penilaian kawalan kualiti (QC) berdasarkan **Garis Panduan Siaran TV RTM, Garis Panduan Penapisan Filem oleh Lembaga Penapisan Filem (LPF) dan Garis Panduan Penapisan Kandungan Berunsur Islam (JAKIM)** serta Dewan Bahasa dan Pustaka (DBP) agar bahan kandungan siaran bebas dari unsur-unsur yang bertentangan dengan ajaran agama, tatasusila, adat dan budaya, serta elemen yang boleh mengundang kepada sensitiviti dan keharmonian kaum.

**PEMBERITAHUAN PERTANYAAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

DARIPADA : TUAN LEE CHEAN CHUNG [PETALING JAYA]

TARIKH : 12 JUN 2023 (ISNIN)

SOALAN NO. 118

Tuan Lee Chean Chung [Petaling Jaya] minta **MENTERI PERPADUAN NEGARA** menyatakan apakah Kementerian bercadang untuk mewujudkan Akta Keharmonian Negara bagi memastikan terdapat keseimbangan untuk memupuk keharmonian merentasi pelbagai budaya dan agama, di samping mengawal selia pihak yang tidak bertanggungjawab menyalahgunakan kebebasan bersuara dan menjejaskan suasana harmoni dan sensitiviti perkauman dalam negara.

JAWAPAN:

Tuan Yang di-Pertua,

1. **Perlembagaan Persekutuan** telah memperuntukkan bahawa semua orang adalah sama di sisi undang-undang dan berhak untuk mendapat perlindungan yang sama rata dan adil. Kecuali sebagaimana yang dibenarkan dengan nyata oleh Perlembagaan Persekutuan, **diskriminasi terhadap warganegara tidak boleh diamalkan** semata-mata atas alasan agama, ras, keturunan, warna kulit, tempat lahir atau jantina.

2. Pada masa ini, undang-undang sedia ada sudah memadai dalam memastikan hubungan antara kaum terpelihara. Sesiapa yang dengan sengaja melakukan apa-apa perbuatan, mencetuskan atau mengeluarkan sebarang kenyataan yang menggugat perpaduan kaum dan agama boleh disiasat dan didakwa, antara lain, di bawah akta-akta yang berikut:
 - I. Subseksyen 4(1) Akta Hasutan 1948 [*Akta 15*] iaitu kesalahan menghasut;

 - II. Seksyen 233 Akta Komunikasi dan Multimedia 1998 [*Akta 588*] iaitu kesalahan penggunaan tidak wajar kemudahan rangkaian atau perkhidmatan rangkaian;

 - III. Seksyen 295 Kanun Keseksaan [*Akta 574*] iaitu kesalahan membencana atau mencemarkan tempat sembahyang dengan niat hendak mengaibkan agama mana-mana golongan;

- IV. Seksyen 296 Kanun Keseksaan iaitu kesalahan mengganggu perhimpunan yang menjalankan sembahyang;
 - V. Seksyen 298 Kanun Keseksaan iaitu kesalahan menyebut perkataan-perkataan atau melakukan perbuatan-perbuatan lain dengan niat sengaja hendak melukakan perasaan agama seseorang;
 - VI. Seksyen 298A Kanun Keseksaan iaitu kesalahan menyebabkan, atas alasan-alasan agama, suasana tidak harmoni, perpecahan, perasaan permusuhan, benci-membenci atau niat jahat, atau memudaratkan pemeliharaan keadaan harmoni atau perpaduan;
 - VII. Seksyen 504 Kanun Keseksaan iaitu kesalahan dengan sengaja mengaibkan dengan niat hendak membangkitkan pecah keamanan;
 - VIII. Seksyen 505 Kanun Keseksaan iaitu kesalahan mengeluarkan kenyataan-kenyataan yang mendatangkan khianat awam; dan
 - IX. Seksyen 506 Kanun Keseksaan [Akta 574] iaitu kesalahan menakutkan secara jenayah.
3. Justeru, Kementerian ini berpendapat **tiada keperluan untuk menggubal atau memperkenalkan suatu undang-undang baharu** seperti **Akta Keharmonian Negara** pada masa ini, dan memadai dengan **meningkatkan penguatkuasaan** undang-undang sedia ada. Walau bagaimanapun kalau keadaan mendesak dan Kerajaan memikirkan bahawa undang-undang sedia ada perlu dibuat semakan semula untuk pindaan bagi mengekang sesetengah percakapan (**hate speech**) atau **perbuatan provokasi** yang boleh memecahbelahkan masyarakat dengan sentimen perkauman, maka Kementerian akan menyokong penuh hasrat tersebut.

4. Dalam masa yang sama Kementerian Perpaduan Negara telah dan akan mengadakan pelbagai program dan usaha bagi menyatupadukan dan memupuk keharmonian dikalangan rakyat yang berbilang kaum, bangsa dan agama.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

**DARIPADA : DATO' AZMAN BIN NASRUDIN
[PADANG SERAI]**

TARIKH : 23 MEI 2023 (SELASA)

SOALAN NO. 8

Dato' Azman bin Nasrudin [Padang Serai] minta **MENTERI PERPADUAN NEGARA** menyatakan menyatakan sejauh manakah pencapaian Pelan Tindakan Perpaduan Negara 2021-2030 yang dilancarkan pada November 2021, dan senarai inisiatif yang telah dilaksanakan.

JAWAPAN:

Tuan Yang di-Pertua,

1. **Pelan Tindakan Perpaduan Negara 2021-2030** merupakan pelan induk tindakan perpaduan bagi menterjemahkan Dasar Perpaduan Negara dan Rangka Tindakan Perpaduan Negara 2021-2030 ke dalam bentuk program dan inisiatif bagi memperkasakan agenda perpaduan nasional melalui pelbagai usaha untuk membina dan mengukuhkan tapak integrasi yang lebih terancang dengan penglibatan **pelbagai Kementerian, agensi Kerajaan, badan-badan bukan Kerajaan (NGO), swasta dan masyarakat umum** mengikut peranan dan fungsi masing-masing.
2. Bagi menyokong hasrat Malaysia MADANI, Kementerian ini turut menghasilkan **kerangka dengan konsep Perpaduan Dalam Kepelbagaian** yang akan menjadi rujukan kepada Kementerian Perpaduan Negara bagi melaksanakan program dan aktiviti ke arah melahirkan masyarakat MADANI dalam kalangan rakyat berbilang kaum.
3. **Kembara Perpaduan Malaysia MADANI** merupakan program *flagship* yang menerajui inisiatif di bawah agenda perpaduan nasional dengan matlamat menyebarkan pengetahuan, kefahaman dan penghayatan terhadap usaha-usaha Kerajaan dalam membangunkan Malaysia MADANI.
4. Kembara Perpaduan Malaysia MADANI memayungi tiga **(3) kluster program yang berpaksikan kepada pencapaian objektif Dasar Perpaduan Negara** melalui penglibatan dan kerjasama semua pihak

termasuklah pemimpin, agensi Kerajaan, pihak swasta, NGO, CSO dan masyarakat secara keseluruhannya.

5. Tiga (3) kluster program tersebut adalah seperti berikut:

(i) Semarak Kenegaraan

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat. Program pengisian adalah seperti Dialog Anak Muda, Apresiasi dan pameran Mini Rukun Negara, “cross culture sharing session”, Bicara Pemikiran Tokoh Negarawan, dan lain-lain.

(ii) Semarak Perpaduan

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dgn konsep perpaduan dalam kepelbagaian. Program-program adalah untuk memupuk keharmonian masyarakat melalui detik-detik perpaduan (moment of unity) seperti Sambutan Minggu Perpaduan, Galeri Uniti, Uniti “walk/run/cycling”, liga sukan perpaduan, Uniti Keamatan-Gawai, dan lain-lain.

(iii) Komuniti Rahmah

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan

dengan saling menghormati, mengasihi dan menghargai melalui penggembleran tenaga semua pihak KPN, agensi Kerajaan, swasta, NGO dan komuniti. Antara program adalah seperti Bakul Rahmah, Ziarah Rahmah, projek ekonomi KRT, Program Mesra Jiran, dan lain-lain.

6. Berdasarkan kepada kerangka yang telah dihasilkan, program utama yang telah dilaksanakan baru-baru ini adalah **Sambutan Minggu Perpaduan** yang telah diadakan di seluruh negara pada **20 – 28 Mei 2023** dan telah disempurnakan oleh **Duli Yang Maha Mulia Seri Paduka Baginda Yang Dipertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah** pada **21 Mei 2023**. Program ini melibatkan kerjasama dan penyertaan pelbagai Kementerian dan agensi dengan konsep "*whole government approach*".
7. Kerjasama dan kesepakatan daripada semua golongan masyarakat tanpa mengira fahaman dan ideologi dalam pelaksanaan dasar dan pelan tindakan ini amat penting bagi memastikan usaha memupuk budaya toleransi dan semangat perpaduan dalam kalangan masyarakat dapat dicapai.
8. Dalam masa yang sama, Kementerian juga akan sentiasa membuat semakan terhadap dasar dan pelan tindakan yang dihasilkan untuk tujuan penambahbaikan dari masa ke semasa.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS TAHUN 2023**

PERTANYAAN : LISAN

**DARIPADA : YB DR. HAJAH HALIMAH ALI
[KAPAR]**

TARIKH : 23 MEI 2023 (SELASA)

SOALAN NO. 73:

Dr. Hajah Halimah Ali minta **MENTERI PERPADUAN NEGARA** menyatakan:

- a) **Senarai KRT** di seluruh kawasan Parlimen Kapar; dan
- b) **Senarai Tabika Perpaduan** di Kapar untuk memupuk perpaduan dan mengintegrasikan masyarakat antara kaum sejak usia muda.

JAWAPAN:

Tuan Yang di-Pertua,

1. Penubuhan Kawasan Rukun Tetangga (KRT) dan Tabika Perpaduan secara meluas di serata negara merupakan inisiatif dan Jentera Perpaduan terpenting Kerajaan Perpaduan untuk membina kesefahaman, mempromosikan kesedaran mengenai kesederhanaan, menyuburkan rasa cinta kasih kepada negara dan memperkasakan semangat persaudaraan dalam kalangan rakyat daripada pelbagai peringkat umur, generasi dan kaum yang dapat menolak sebarang ruang perpecahan.
2. Kerajaan Perpaduan menerusi Kementerian Perpaduan Negara sentiasa prihatin terhadap pembangunan integrasi sosial dan peningkatan kualiti perpaduan komuniti setempat termasuk di kawasan Parliman P109 Kapar, Selangor.

JAWAPAN BERKAITAN SOALAN (a) – KRT

3. Sehingga kini, Kementerian menerusi Jabatan Perpaduan Negara dan Integrasi Nasional (JPNIN) telah berjaya mewujudkan sebanyak **8,348 KRT di 16 negeri**.
4. Daripada jumlah tersebut, sebanyak **54 KRT** adalah terletak **di bawah kawasan Parlimen P109 Kapar**. Ini meliputi sepuluh KRT di DUN N42 Meru, 32 KRT di DUN N43 Sementa dan baki 12 KRT di DUN N44 Selat Klang.

JAWAPAN BERKAITAN SOALAN (b) – TABIKA PERPADUAN

5. Seterusnya adalah berkaitan dengan pendidikan awal kanak-kanak kendalian JPNIN. **Jumlah Tabika Perpaduan** di seluruh negara termasuk di kawasan bandar dan luar bandar adalah sebanyak **1,781**.
6. Tabika Perpaduan ini telah dibangunkan untuk menjadi institusi unggul JPNIN ke arah penyediaan pendidikan awal yang berkualiti kepada **kanak-kanak berusia empat sehingga enam tahun** daripada pelbagai latar belakang etnik. Fokus utama Tabika Perpaduan adalah untuk **membentuk kemenjadian murid yang berilmu dan berketrampilan dengan suntikan nilai-nilai murni, perpaduan dan kenegaraan** dalam aktiviti pengajaran dan pembelajaran.
7. Terdapat sebanyak **11 Tabika Perpaduan** beroperasi **di kawasan Parlimen P109 Kapar, Selangor**. Ini termasuk empat Tabika Perpaduan di DUN N42 Meru, tiga di DUN N43 Sementa dan selebihnya empat di DUN N44 Selat Klang.
8. Kementerian Perpaduan Negara telah memperkenalkan **Pelan Pendidikan Awal Kanak-Kanak Tabika Perpaduan 2021-2030**. Pelan ini jelas menggambarkan komitmen Kerajaan dalam menyediakan rangka tindakan dan pembangunan yang menyokong transformasi yang lebih dinamik demi pemantapan kualiti dan kaedah pengurusan institusi pendidikan awal kanak-kanak yang komprehensif, berkesan, teratur dan berstruktur untuk tempoh sepuluh tahun akan datang.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : DR. AHMAD FAKHRUDDIN BIN FAKHRURAZI
[KUALA KEDAH]**

SOALAN NO. 45

Dr. Ahmad Fakhruddin Bin Fakhurazi [Kuala Kedah] minta **MENTERI PERPADUAN NEGARA** menyatakan hasil garis panduan dan hala tuju Majlis Penasihat Perpaduan Negara yang merupakan panduan Kementerian dalam mengurus perdana agenda perpaduan negara.

JAWAPAN:

Tuan Yang di-Pertua,

1. Kementerian Perpaduan Negara telah menubuhkan Majlis Penasihat Perpaduan Negara (MPPN) pada tahun 2020 untuk menasihati Kerajaan dalam:
 - i. Hal-ehwal perpaduan serta membincangkan isu-isu perpaduan;
 - ii. Usaha-usaha penyatuan nasional (*national reconciliation*) dari pelbagai sudut; dan
 - iii. Mencadangkan kaedah penyelesaian terbaik kepada Kerajaan untuk menangani isu dan cabaran perpaduan bagi terus mengukuhkan agenda perpaduan nasional.
2. Ini kerana pengukuhan perpaduan rakyat merupakan asas kepada kestabilan ekonomi, politik dan sosial serta keharmonian negara ini. Bagi tempoh selama dua tahun (2020-2022), seramai 23 orang ahli MPPN yang terdiri daripada tokoh-tokoh masyarakat dengan pelbagai latar belakang telah dilantik bagi membantu Kementerian menerajui agenda perpaduan agar dapat terus memelihara kemakmuran negara dan kesejahteraan rakyat.
3. Dalam tempoh antara 2020 - 2022, MPPN telah bermesyuarat sebanyak dua (2) kali sahaja disebabkan penularan pandemik COVID-19. Melalui mesyuarat tersebut, barisan ahli MPPN telah menjana idea dan mencadangkan beberapa inisiatif baharu dalam mengukuh dan menjulang agenda perpaduan negara. Namun, disebabkan pandemik

COVID-19, Kementerian Perpaduan Negara telah menghadapi banyak kekangan untuk meneruskan cadangan. Walau bagaimanapun, Kementerian berjaya menghasilkan Dasar Perpaduan Negara pada tahun 2021 dengan kerjasama dan komitmen ahli-ahli MPPN.

4. Di bawah pucuk kepimpinan negara yang baharu, Kementerian Perpaduan Negara telah mengemas kini dan menambahbaik struktur dan tadbir urus MPPN serta jawatankuasa-jawatankuasa perpaduan di bawahnya selari dengan aspirasi Membangun Malaysia MADANI. Ekoran dari langkah ini, seramai 18 orang ahli baharu telah dikenal pasti dan dilantik bagi menganggotai MPPN bagi penggal 2023 hingga 2025 bagi membolehkan MPPN terus menggalas tugas mengurus perdanakan agenda perpaduan negara.

i) PENAMBAHBAIKAN KEAHLIAN

Keahlian MPPN yang ditunjangi oleh barisan pakar dari pelbagai sektor termasuk dari Badan Bukan Kerajaan (NGO), pihak swasta dan individu yang berpengalaman akan memastikan mereka dapat menyumbang idea dan kepakaran dalam agar MPPN dapat melaksanakan tanggungjawab yang diberikannya mengikut terma rujukan yang ditetapkan bagi mengukuh dan meningkatkan agenda perpaduan negara;

ii) KEPAKARAN AHLI

Variasi dalam keanggotaan ahli MPPN yang komited terhadap perpaduan negara dan mempunyai kredibiliti, bersifat terbuka,

neutral, berpandangan konstruktif berhubung dengan hal-ehwal perpaduan dan juga merentasi wilayah dapat memastikan bahawa semua komuniti utama dan sektor masyarakat di negara ini diwakili dan kepentingan serta kebajikan mereka tidak ditinggirkan. Ini bertujuan memastikan semua sektor masyarakat dilibatkan dalam agenda perpaduan negara dan tidak tercicir daripada arus pembangunan negara;

iii) **KEPELBAGAIAN KEPAKARAN**

Keanggotaan MPPN yang terdiri daripada pakar-pakar dari pelbagai sektor juga akan membantu Kerajaan dalam mengenalpasti kaedah-kaedah terbaik dalam meningkatkan usaha dan inisiatif perpaduan di samping mengatasi kelemahan sedia ada di pelbagai peringkat agar perpaduan negara terus terpelihara dan masyarakat Malaysia yang berbilang kaum terus bersatu hati dan mempunyai semangat kenegaraan yang tinggi di bawah kepimpinan kerajaan semasa; dan

5. Penubuhan MPPN juga merupakan satu langkah bijak kerajaan dalam mempromosikan Malaysia di peringkat global sebagai model negara *moderate* yang berjaya menjaga keharmonian antara kaum dan agama dan berfungsi sebagai platform untuk percambahan fikiran dan rekonsiliasi antara kaum dan agama sebagai usaha ke arah penyatuan nasional (*national reconciliation*).

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

**DARIPADA : DATO' SERI HAJI AMINUDDIN BIN HARUN
[PORT DICKSON]**

SOALAN NO. 72

Dato' Seri Haji Aminuddin Bin Harun [Port Dickson] minta **MENTERI PERPADUAN NEGARA** menyatakan bagaimana cara Kementerian memperkukuh perpaduan di kalangan rakyat Malaysia yang berbilang kaum dan agama, terutama dalam konteks yang semakin berubah dan kompleks dengan adanya isu-isu sosial dan politik yang sensitif.

JAWAPAN:

Tuan Yang di-Pertua,

1. Peristiwa rusuhan kaum pada 13 Mei 1969 telah membuka mata pelbagai pihak tentang pentingnya usaha-usaha yang lebih serius diberikan tumpuan dalam menguruskan perbezaan serta sensitiviti yang terdapat dalam sebuah masyarakat majmuk seperti Malaysia.
2. **Jabatan Perpaduan Negara yang ditubuhkan pada 1 Julai 1969** untuk menjadi peneraju bagi membina dan mengukuhkan penyatupaduan masyarakat pelbagai kaum. Kemudian, pada **1 Julai 1972, Kementerian Perpaduan Negara** buat pertama kalinya ditubuhkan untuk memperkasakan lagi agenda perpaduan negara.
3. Komitmen Kerajaan dalam menangani cabaran perpaduan dan melihat perpaduan sebagai asas kestabilan masyarakat serta kunci kepada pembangunan dan kesejahteraan negara menyaksikan **Kementerian Perpaduan Negara telah diwujudkan semula pada 10 Mac 2020** setelah dimansuhkan pada tahun 1974 bagi memastikan agenda perpaduan dapat dikendalikan secara bersepadu dan lebih tersusun.
4. Di bawah pentadbiran Kerajaan Perpaduan, konsep Membangun Malaysia MADANI telah menjadi iltizam YAB Perdana Menteri Malaysia dan bertindak **sebagai ikhtiar yang menjelaskan strategi bagi mentadbir negara dengan berkesan.**
5. **Matlamat utama** MADANI adalah untuk mewujudkan sebuah masyarakat maju, terampil dan terangkum dan akhirnya **membentuk**

Malaysia menjadi sebuah negara yang mampan, sejahtera, berdaya cipta, saling menghormati serta bersikap ihsan berdasarkan keyakinan antara satu sama lain.

6. **Empat (4) strategi utama** untuk membina Malaysia MADANI adalah:
 - (i) membina semula ekonomi;
 - (ii) menjamin kesejahteraan insan;
 - (iii) reformasi institusi demokrasi dan perundangan; dan
 - (iv) mewujudkan pentadbiran beramanah.
7. Bagi menyokong agenda membangun Malaysia MADANI, Kementerian ini telah **menghasilkan Kerangka Perpaduan Malaysia MADANI melalui konsep Perpaduan Dalam Kepelbagaian.**
8. Kerangka ini menjadi **rujukan dalam pelaksanaan program dan aktiviti** berteraskan usaha ke arah melahirkan masyarakat MADANI dalam kalangan rakyat berbilang kaum.
9. Kerangka ini disusun **seiring Dasar Perpaduan Negara** dan memperjelaskan dengan lebih komprehensif strategi pelaksanaan serta sasaran yang hendak dicapai.
10. **Program flagship** yang diperkenalkan adalah **Kembara Perpaduan Malaysia MADANI** yang menerajui inisiatif di bawah agenda perpaduan nasional dengan matlamat menyebarkan pengetahuan, kefahaman dan penghayatan terhadap usaha-usaha Kerajaan dalam membangunkan Malaysia MADANI.
11. Tiga (3) kluster program tersebut adalah seperti berikut:

a. Semarak Kenegaraan

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

b. Semarak Perpaduan

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dgn konsep perpaduan dalam kepelbagaian.

c. Komuniti Rahmah

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling menghormati, mengasihi dan menghargai melalui penggemblengan tenaga semua pihak KPN, agensi Kerajaan, swasta, NGO dan komuniti.

12. Dengan penghasilan dokumen dasar, pelan tindakan dan inisiatif program yang dirancang, agenda memperkukuh perpaduan di kalangan rakyat Malaysia yang berbilang kaum dan agama dapat dilaksanakan dengan lebih terancang dan tersusun melalui kerjasama pelbagai pihak di setiap peringkat daripada peringkat Kementerian hingga ke peringkat komuniti.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : BUKAN LISAN

DARIPADA : PUAN TERESA KOK SUH SIM [SEPUTEH]

SOALAN NO. 561

Puan Teresa Kok Suh Sim [Seputeh] minta **MENTERI PERPADUAN NEGARA** menyatakan senarai program-program yang memupuk semangat perpaduan di seluruh negara. Apakah strategi Kementerian untuk mengatasi masalah ketegangan perkauman dan agama dalam kalangan masyarakat kita.

JAWAPAN:

Tuan Yang di-Pertua,

1. Seiring dengan hasrat YAB Perdana Menteri untuk membangun Malaysia MADANI, Kementerian Perpaduan Negara telah mengambil inisiatif menghasilkan **Kerangka Membangun Malaysia MADANI** melalui konsep **Perpaduan Dalam Kepelbagaian** (Unity in Diversity) bagi menyusun agenda perpaduan dengan lebih inklusif dan bersepadu berpandukan Dasar Perpaduan Negara (DPN).
2. *Flagship* program yang diperkenalkan adalah **Kembara Perpaduan Malaysia MADANI** melibatkan tiga (3) kluster program seperti berikut:
 - i. **Semarak Kenegaraan**

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.
 - ii. **Semarak Perpaduan**

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian.
 - iii. **Komuniti Rahmah**

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling

menghormati, mengasihi dan menghargai melalui penggemblengan tenaga semua pihak KPN, agensi Kerajaan, swasta, Badan Bukan Kerajaan (NGO) dan komuniti.

3. Melalui kerangka yang dibangunkan, pelbagai program disusun meliputi peringkat persekutuan sehingga ke akar umbi yang turut melibatkan pemimpin, agensi Kerajaan, pihak swasta, NGO, CSO dan masyarakat secara keseluruhannya bertujuan untuk mempromosi serta memupuk semangat perpaduan dalam kalangan rakyat Malaysia.
4. Antara program-program tersebut adalah seperti berikut:

Kementerian Perpaduan Negara

- i. **Sambutan Minggu Perpaduan** di seluruh negara;
- ii. **Galeri UNITI**;
- iii. **Semarak Perpaduan**;
- iv. **Kejohanan Liga Sukan UNITI**;
- v. **Sumbangan Bakul RAHMAH** kepada rumah Kebajikan;
- vi. **Gotong - Royong** di rumah Kebajikan;
- vii. **Program RAHMAH Mesra** bersama penghuni warga emas dan anak yatim.

Jabatan Perpaduan Negara dan Intergasi Nasional (JPNIN)

- i. Kembara Perpaduan: Gerak Kerja Pasca Banjir;
- ii. **Program Gerak RAHMAH - Jom Sihat** melibatkan lebih **4,800 Komuniti Rukun Tetangga (KRT)**;
- iii. **Program Gerak RAHMAH - Jom Ronda** melibatkan **3,085 Skim Rondaan Sukarela (SRS)**;

- iv. **Program Gerak RAHMAH - Jom Masak Bubur Lambuk;**
- v. **Pertandingan Koir Perpaduan;**
- iii. UNITI SISWA: Pertandingan Seni Warisan dan Silang Budaya Sekretariat Rukun Negara (SRN); dan
- iv. **Kayuhan MAIPS Peduli Menyantuni Asnaf bersama Tuanku Syed Faizuddin Putra Ibni Tuanku Syed Sirajuddin Jamaluddin** dengan kerjasama Kerajaan Negeri Perlis.

JABATAN MUZIUM MALAYSIA

- i. Nostalgia Anak Kampung;
- ii. Festival Kebudayaan Kelantan; dan
- iii. Pameran “Seniman Perak Sepanjang Zaman.

ARKIB NEGARA MALAYSIA

- i. Pameran Eksklusif Seniman Agung Tan Sri P. Ramlee;
- ii. Pameran Pengisytiharan Tarikh Kemerdekaan Tanah Melayu; dan
- iii. Program Bicara Negarawan: Bapa Perpaduan Negara.

PERPUSTAKAAN NEGARA MALAYSIA

- i. Riang Ria Cuti Sekolah di semua perpustakaan; dan
- ii. Bicara Eksekutif.

5. Di samping pelaksanaan program-program bagi memupuk semangat perpaduan, Kementerian Perpaduan Negara juga mempunyai mekanisme untuk mencari penyelesaian terhadap isu yang menggugat perpaduan dengan membawa isu ini ke jawatankuasa-jawatankuasa seperti:

- i. **Jawatankuasa Keharmonian Antara Penganut Agama (HARMONI)** yang melibatkan perbincangan antara pemimpin-pemimpin agama dari Islam, Kristian, Buddha, Hindu, Tao, Sikh dan Baha'li; dan
 - ii. **Majlis Penasihat Perpaduan Negara** yang melibatkan tokoh-tokoh dari pelbagai latar belakang (Akademik, Korporat, NGO, Swasta, Belia)
6. Di peringkat komuniti pula, isu-isu perpaduan diuruskan oleh **Mediator Komuniti** (yang telah ditauliah oleh Kementerian), melalui langkah-langkah intervensi sosial berdasarkan isu atau insiden. Bagi kes-kes yang memerlukan tindakan bersepadu antara agensi, isu atau insiden akan dirujuk kepada agensi-agensi yang berkaitan seperti Polis Diraja Malaysia (PDRM), Suruhanjaya Komunikasi dan Multimedia Malaysia (MCMC) dan Pihak Berkuasa Tempatan (PBT).
7. Dengan penghasilan dokumen dasar, pelan tindakan dan inisiatif program yang dirancang, agenda perpaduan dapat dilaksanakan dengan lebih terancang dan tersusun melalui kerjasama dan kesepakatan daripada semua golongan masyarakat tanpa mengira fahaman dan ideologi bagi memastikan keamanan, keharmonian dan perpaduan dapat dicapai.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
YANG KELIMA BELAS
PENGAL KETIGA, MESYUARAT KETIGA
9 OKTOBER – 30 NOVEMBER 2023**

PERTANYAAN : BUKAN LISAN

DARIPADA : YB DATUK HAJI AWANG BIN HASHIM

SOALAN NO. 212

Datuk Haji Awang bin Hashim minta **MENTERI PERPADUAN NEGARA** menyatakan langkah yang telah diambil bagi memastikan bangsa Siam khususnya tidak tercicir dalam aspek pembangunan mahupun bantuan yang disalurkan Kerajaan.

JAWAPAN

Yang Berhormat,

1. Kerajaan melalui Kementerian Perpaduan Negara telah menyediakan beberapa inisiatif bagi memperkasa agenda perpaduan nasional. Agenda ini dilaksanakan melalui pelbagai usaha untuk membina dan memperkukuh tapak integrasi sebagai landasan hubungan muhibah dalam kalangan rakyat.
2. Penghasilan Dasar Perpaduan Negara dan Rangka Tindakan (Blueprint) Perpaduan Negara 2021-2030 merupakan dokumen dasar yang menjadi kerangka asas dan hala tuju agenda perpaduan negara. Inisiatif ini diperkukuhkan lagi melalui penghasilan Pelan Tindakan Perpaduan Negara 2021-2030 yang merupakan pelan induk tindakan perpaduan bagi menterjemahkan Dasar Perpaduan Negara dan Rangka Tindakan Perpaduan Negara 2021-2030 ke dalam bentuk program dan inisiatif yang lebih terancang dan terangkum tanpa meminggirkan mana-mana pihak.
3. Dengan penghasilan dokumen dasar dan pelan tindakan ini, agenda perpaduan dapat dilaksanakan dengan lebih terancang dan tersusun melalui program-program yang dilaksanakan meliputi semua golongan masyarakat tanpa mengira kaum, budaya dan agama bagi memastikan keamanan, keharmonian dan perpaduan dapat dicapai.
4. Program dan bantuan kewangan yang dikhususkan kepada bangsa Siam oleh KPN adalah:
 - (i) Pelaksanaan **Program Warisan Masyarakat Siam Kelantan 2023** pada 17 Jun 2023 bertempat di Wat Pikhultong Vararam, Tumpat

Kelantan. Objektif program ini adalah untuk memberi pengetahuan kepada masyarakat umum berkaitan bahasa, budaya, adat dan tradisi masyarakat Siam di Negeri Kelantan. Program ini telah dilaksanakan oleh KPN dengan kerjasama Persatuan Seni Budaya Sri Gelam Tumpat, Persatuan Siam Kelantan dan Wat Pikhultong Vararam Tumpat.

- (ii) Bantuan kewangan sebanyak RM500,000.00 kepada Persatuan Siam Malaysia untuk pelaksanaan **Program Pendidikan Bahasa Ibunda, Kebudayaan dan Adat Resam kaum Siam** bagi tahun 2023. Objektif bantuan kewangan ini adalah untuk menyelaras pelaksanaan Kelas Bahasa Thai melalui Sekolah Wat di seluruh Malaysia supaya kaedah pembelajaran Bahasa Thai dapat diseragamkan termasuk adat warisan dan kebudayaan masyarakat Siam.
- (iii) Bantuan kewangan sebanyak RM50,000.00 kepada Persatuan Manora Kedah untuk pelaksanaan **Program Jom Mengenal Etnik** pada 10 Disember 2022 bertempat di Universiti Malaya. Objektif program ini adalah untuk mempromosikan Tarian Manora kaum Siam di samping elemen kebudayaan etnik-etnik lain di Malaysia kepada orang awam khususnya kepada para pelajar di Institusi Pengajian Tinggi.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KELIMA BELAS**

**PERTANYAAN : BUKAN LISAN
DARIPADA : PUAN HAJAH SALAMIAH BINTI MOHD
NOR**

(TEMERLOH)

Soalan No. 236

Puan Hajah Salamiah binti Mohd Nor minta **MENTERI PERPADUAN
NEGARA** menyatakan:

- a) Senarai KRT di seluruh Parlimen Temerloh; dan
- b) Senarai Tabika Perpaduan di Temerloh untuk memupuk perpaduan dan mengintegrasikan masyarakat antara kaum sejak usia muda

JAWAPAN

Tuan Yang Dipertua,

Sejak penubuhan Rukun Tetangga pada tahun 1975, institusi Rukun Tetangga telah memainkan peranannya sebagai pemacu dalam komuniti kejiranan terutamanya dalam membantu membangunkan komuniti setempat dalam aspek pengukuhan semangat kejiranan, keselamatan, pembelajaran sepanjang hayat, ekonomi komuniti serta kesejahteraan hidup komuniti.

Sehingga kini, jumlah Kawasan Rukun Tetangga (KRT) di Malaysia adalah 8,348 KRT. Di Negeri Pahang sahaja, jumlah KRT adalah 557 KRT dan di Parlimen Temerloh adalah berjumlah 42 KRT. Senarai KRT Parlimen Temerloh adalah seperti di **Lampiran**.

Pendedahan tentang perpaduan dan keharmonian kaum turut diterapkan kepada kanak-kanak pelbagai kaum berumur 4 hingga 6 tahun yang mengikuti pendidikan awal di Tabika Perpaduan.

Sehingga kini, Jabatan Perpaduan Negara dan Integrasi Nasional di bawah Kementerian Perpaduan Negara (KPN) mempunyai sebanyak 1,781 buah Tabika Perpaduan di seluruh negara dengan jumlah murid seramai 36,619 orang. Di Parlimen Temerloh Pahang, terdapat 14 Tabika Perpaduan yang mempunyai seramai 245 murid yang terdiri daripada pelbagai kaum.

Jabatan Perpaduan Negara dan Integrasi Nasional sentiasa komited bagi memastikan agenda perpaduan dapat dilaksanakan diperingkat awal usia

lagi dalam membentuk sebuah masyarakat yang harmoni dan bersatu padu.

Sekian, terima kasih.

LAMPIRAN
SENARAI KAWASAN RUKUN TETANGGA BAGI
PARLIMEN TEMERLOH (P088)

BIL.	DAERAH / BAHAGIAN	DUN	NAMA KRT	NAMA TABIKA PERPADUAN
1	TEMERLOH	KUALA SEMANTAN	TAMAN-TAMAN PERUMAHAN BAHAGIA	TABIKA PERPADUAN TAMAN PERUMAHAN BAHAGIA
2	TEMERLOH	KUALA SEMANTAN	BUKIT ANGIN	-
3	TEMERLOH	KUALA SEMANTAN	BANDAR TEMERLOH	-
4	TEMERLOH	KUALA SEMANTAN	TAMAN SRI SEMANTAN	-
5	TEMERLOH	KUALA SEMANTAN	TAMAN SETIA / TAMAN CAHAYA	-
6	TEMERLOH	KUALA SEMANTAN	KG BUKIT KEMUNING	-
7	TEMERLOH	KUALA SEMANTAN	TAMAN SEBERANG TEMERLOH / TAMAN TINAH	TABIKA PERPADUAN TAMAN SEBERANG TEMERLOH
8	TEMERLOH	KUALA SEMANTAN	KUARTERS HOSPITAL TEMERLOH	-
9	TEMERLOH	KUALA SEMANTAN	TAMAN PAMAH KASIH	-
10	TEMERLOH	KUALA SEMANTAN	TAMAN PULAI IDAMAN	-
11	TEMERLOH	KUALA SEMANTAN	TAMAN SEBERANG PERMAI	-
12	TEMERLOH	KUALA SEMANTAN	TAMAN JAYA 1 MALAYSIA	-
13	TEMERLOH	KUALA SEMANTAN	TAMAN JAYA JALAN MARAN	-
14	TEMERLOH	KUALA SEMANTAN	TAMAN SETIA JASA	-
15	TEMERLOH	KUALA SEMANTAN	TAMAN BUKIT TINGKAT	-
16	TEMERLOH	KUALA SEMANTAN	KG PAYA MENGKUANG	-
17	TEMERLOH	LANCHANG	BANDAR LANCHANG	TABIKA PERPADUAN BANDAR LANCHANG
18	TEMERLOH	KUALA SEMANTAN	KG LEBAK SEBERANG	-
19	TEMERLOH	KUALA SEMANTAN	TAMAN JAYA 3 FASA BARU	-

BIL.	DAERAH / BAHAGIAN	DUN	NAMA KRT	NAMA TABIKA PERPADUAN
20	TEMERLOH	LANCHANG	KG BARU PENGKALAN JAYA	-
21	TEMERLOH	LANCHANG	TAMAN SAGA	1.TABIKA PERPADUAN TAMAN SAGA 2. TABIKA PERPADUAN TAMAN SAGA 2
22	TEMERLOH	LANCHANG	TAMAN MENTAKAB INDAH	TABIKA PERPADUAN TAMAN MENTAKAB INDAH
23	TEMERLOH	LANCHANG	TAMAN PERUMAHAN DESA JAYA	-
24	TEMERLOH	LANCHANG	TAMAN SRI LAYANG	-
25	TEMERLOH	LANCHANG	TAMAN SAGA INDAH	-
26	TEMERLOH	LANCHANG	KG SEMPADAN	-
27	TEMERLOH	LANCHANG	TAMAN MURNI LANCHANG	-
28	TEMERLOH	LANCHANG	FELDA LAKUM	-
29	TEMERLOH	MENTAKAB	TAMAN RIMBA	TABIKA PERPADUAN TAMAN RIMBA 1
30	TEMERLOH	MENTAKAB	TAMAN BUKIT BENDERA	1.TABIKA PERPADUAN TAMAN BUKIT BENDERA 1 2.TABIKA PERPADUAN TAMAN BUKIT BENDERA 2
31	TEMERLOH	MENTAKAB	TAMAN TUALANG INDAH	TABIKA PERPADUAN TAMAN TUALANG INDAH
32	TEMERLOH	MENTAKAB	BANDAR MENTAKAB	-
33	TEMERLOH	MENTAKAB	SRI ARA	-
34	TEMERLOH	MENTAKAB	TAMAN PERUMAHAN BANDAR (KSM)	TABIKA PERPADUAN TAMAN KSM
35	TEMERLOH	MENTAKAB	TAMAN SETIA MENTAKAB	-
36	TEMERLOH	MENTAKAB	TAMAN BUKIT CERMIN	-
37	TEMERLOH	MENTAKAB	TAMAN SRI KEMUNING INDAH	-
38	TEMERLOH	MENTAKAB	TAMAN SRI KEMUNING	-
39	TEMERLOH	MENTAKAB	TAMAN TEMERLOH JAYA	1.TABIKA PERPADUAN TAMAN TEMERLOH JAYA 1 2.TABIKA PERPADUAN TAMAN TEMERLOH JAYA 3
40	TEMERLOH	MENTAKAB	TAMAN TEMERLOH MAKMUR	TABIKA PERPADUAN TAMAN TEMERLOH MAKMUR

BIL.	DAERAH / BAHAGIAN	DUN	NAMA KRT	NAMA TABIKA PERPADUAN
41	TEMERLOH	MENTAKAB	TAMAN TEMERLOH JAYA INDAH	-
42	TEMERLOH	MENTAKAB	TAMAN CHENGAL	

**PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KELIMA BELAS**

PERTANYAAN : LISAN

DARIPADA : YB PUAN RODZIAH BINTI ISMAIL [AMPANG]

TARIKH : 7 NOVEMBER 2023 (SELASA)

SOALAN NO.21

Puan Rodziah binti Ismail minta **MENTERI PERPADUAN NEGARA** menyatakan prestasi terkini dan hala tuju semua program dan inisiatif untuk memupuk dan memperteguh perpaduan, permuafakatan, kebersatuan dan kebersamaan di peringkat akar umbi terutama di semua peringkat sekolah, pendidikan tinggi dan dalam komuniti serta strategi penambahbaikan untuk mencapai '*outcome*' yang ditetapkan.

JAWAPAN :

Tuan Yang di-Pertua,

1. Terima kasih diucapkan kepada YB Ampang di atas soalan yang dikemukakan kepada Kementerian.
2. Untuk makluman Yang Berhormat, halatuju program-program dan inisiatif yang dilaksanakan oleh Kementerian adalah untuk mencapai satu matlamat yang cukup besar iaitu mewujudkan masyarakat Malaysia yang bersatu padu. Halatuju ini dinyatakan dengan jelas di bawah Dasar Perpaduan Negara yang telah digubal dan merupakan dokumen asas Kementerian dalam merangka agenda perpaduan nasional.
3. Seiring dengan hasrat YAB Perdana Menteri untuk membangun Malaysia MADANI, Kementerian telah mengambil inisiatif menghasilkan **Kerangka Membangun Malaysia MADANI** melalui konsep **Perpaduan Dalam Kepelbagaian** (*Unity in Diversity*) bagi menyusun agenda perpaduan dengan lebih inklusif dan bersepadu.
4. Di bawah kerangka ini, semua program dan inisiatif Kementerian disepadukan di bawah satu jenama iaitu *Flagship* Kembara Perpaduan. Flagship ini dibahagikan pula kepada tiga (3) kluster utama.
5. Kluster pertama ialah **Semarak Kenegaraan**. Program Semarak Kenegaraan ini bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun

Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat. Antara contoh program di bawah kluster Semarak Kenegaraan yang telah dilaksanakan adalah Program Eksplorasi Rukun Negara yang telah diluncurkan pada 13 Ogos 2023 di MyTown Shopping Center, Cheras dengan penyertaan seramai 10,000 orang.

6. Kluster Kedua ialah **Semarak Perpaduan**. Program Semarak Perpaduan ini adalah untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian. Antara contoh program di bawah Semarak Perpaduan ialah program Sambutan Minggu Perpaduan yang dilaksanakan di seluruh negara pada minggu terakhir bulan Mei 2023 yang melibatkan bilangan pengunjung seramai 200,000 orang seluruh negara.
7. Kajian tinjauan keberkesanan Program Sambutan Minggu Perpaduan 2023 juga telah dilaksanakan di seluruh negara melalui soal selidik bagi mendapatkan maklum balas pengunjung terhadap program yang dilaksanakan. Hasil kajian yang dijalankan mendapati sebanyak 98.2% responden menyatakan program ini mampu meningkatkan tahap perpaduan dan integrasi dalam kalangan rakyat.
8. Selain itu, Kementerian juga melaksanakan Program Ini Warisan Kita yang telah diluncurkan pada 9 Julai 2023 di IOI City Mall, Putrajaya dengan mengetengahkan elemen-elemen kebudayaan pelbagai etnik seperti Baba dan Nyonya, Chetti, Portugis, Mah Meri dan Siam dalam suatu program untuk dikongsikan kepada masyarakat umum. Program ini telah berjaya menarik seramai 10,000 orang pengunjung.

9. Kluster Ketiga ialah **Komuniti RAHMAH**. Program ini dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling menghormati, mengasihi dan menghargai melalui penggemblengan tenaga semua pihak KPN, agensi Kerajaan, swasta, Badan Bukan Kerajaan (NGO) dan komuniti. Antara contoh program yang dilaksanakan di bawah Komuniti RAHMAH ialah program Tuisyen RAHMAH di mana sebanyak 50 lokasi tuisyen dengan seramai 2,450 orang murid telah dilaksanakan.
10. Melalui kerangka yang dibangunkan, **pelbagai program disusun meliputi peringkat persekutuan sehingga ke akar umbi yang turut melibatkan pemimpin, agensi Kerajaan, pihak swasta, NGO, CSO dan masyarakat secara keseluruhannya** bertujuan untuk mempromosi serta memupuk semangat perpaduan dalam kalangan rakyat Malaysia.
11. Di samping itu, usaha menyemarakkan perpaduan oleh Kementerian terus dilaksanakan melalui program-program lain seperti berikut;
 - i. Galeri UNITI;
 - ii. Liga Sukan UNITI;
 - iii. Sumbangan Bakul RAHMAH kepada rumah kebajikan;
 - iv. Program RAHMAH Mesra bersama penghuni warga emas dan anak yatim;
 - v. Kembara Perpaduan: Gerak Kerja Pasca Banjir;
 - vi. Program Gerak RAHMAH;
 - vii. Pertandingan Koir Perpaduan;

- viii. UNITI SISWA: Pertandingan Seni Warisan dan Silang Budaya Sekretariat Rukun Negara (SRN);
 - ix. Nostalgia Anak Kampung;
 - x. Pameran Pengisytiharan Tarikh Kemerdekaan Tanah Melayu;
 - xi. Program Bicara Negarawan: Bapa Perpaduan Negara;
 - xii. Riang Ria Cuti Sekolah di semua perpustakaan; dan
 - xiii. Bicara Eksekutif: Perpaduan Acuan MADANI.
12. Pada tahun ini sehingga bulan September, sebanyak 433 program telah dilaksanakan oleh Kementerian Perpaduan Negara, Jabatan Perpaduan dan Integrasi Nasional, Muzium, Arkib dan Perpustakaan.
13. Keberkesanan inisiatif program yang dilaksanakan di bawah Dasar Perpaduan Negara diukur oleh Indeks Perpaduan Nasional (IPNas). Pengukuran tahap perpaduan melalui IPNas telah dilaksanakan sebanyak dua (2) kali iaitu pada tahun 2018 dan 2022. Nilai Indeks Perpaduan Nasional (IPNas) pada tahun 2018 adalah 0.567. Pada tahun 2022, IPNas mencatatkan peningkatan iaitu dengan skor 0.629 yang bermaksud perpaduan dalam kalangan rakyat Malaysia berada pada tahap sederhana dan terkawal. Melalui Rancangan Malaysia Kedua Belas (RMKe-12), sasaran yang ditetapkan bagi pencapaian tahap perpaduan pada tahun 2025 adalah pada skor 0.7.
14. Bagi memastikan hasrat ini tercapai, kerjasama dan kesepakatan daripada semua golongan masyarakat tanpa mengira fahaman dan ideologi dalam pelaksanaan dasar dan pelan tindakan ini amat penting bagi memastikan usaha memupuk budaya toleransi dan semangat perpaduan dalam kalangan masyarakat.

Sekian, terima kasih.

**PEMBERITAHUAN PERTANYAAN LISAN/ BUKAN LISAN
DEWAN RAKYAT YANG KELIMA BELAS
PENGKAL KETIGA, MESYUARAT KETIGA
9 OKTOBER – 30 NOVEMBER 2023**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 17 OKTOBER 2023 (SELASA)

SOALAN NO. 52

Minta **MENTERI PERPADUAN NEGARA** menyatakan sejauh mana Rukun Negara yang menjadi inti pati Kerajaan Perpaduan berjaya dilaksanakan dan diterapkan dalam masyarakat pelbagai kaum di negara ini supaya menjadi teras Malaysia Madani.

JAWAPAN:

Tuan Yang Dipertua,

1. Kerajaan amat komited untuk melaksanakan pelbagai inisiatif berterusan bagi memastikan keharmonian dan perpaduan dalam kalangan rakyatnya sentiasa terpelihara. Usaha signifikan ke arah itu bermula dengan pembentukan Rukun Negara sebagai satu ideologi untuk menyeragamkan fahaman dalam kalangan pelbagai kelompok etnik di negara ini dengan tujuan utama membentuk perpaduan yang kukuh.
2. Rukun Negara diisytiharkan pada 31 Ogos 1970 merupakan inisiatif awal Kerajaan menangani isu perpaduan kaum rentetan peristiwa pergolakan kaum pada 13 Mei 1969. Rukun Negara menjadi pegangan, panduan serta amalan oleh seluruh rakyat Malaysia ke arah memupuk dan mengukuhkan semangat perpaduan, ketaatan dan kecintaan kepada bangsa dan negara.
3. Selaras dengan amalan sistem demokrasi berperlembagaan, kerajaan telah membangunkan Dasar Perpaduan Negara berasaskan Perlembagaan Persekutuan dan Rukun Negara. Dasar Perpaduan Negara merupakan kerangka asas dan hala tuju agenda perpaduan telah menetapkan tiga (3) Teras Perpaduan negara iaitu:
 - (i) Patriotisme dan Demokrasi;
 - (ii) Identiti Nasional; dan
 - (iii) Ekosistem Perpaduan.

Tuan Yang Dipertua

4. Rukun Negara bukan sekadar dijulung secara simbolik menerusi lafaz ikrar lima (5) prinsip Rukun Negara tetapi sebaliknya prinsip dan cita-cita Rukun Negara hendaklah dihayati dan menjadi panduan kepada semua pihak termasuklah pemimpin negara dan rakyat Malaysia keseluruhannya.
5. Cita-cita dan prinsip Rukun Negara perlu dijadikan asas pegangan dan panduan setiap rakyat di negara ini secara lebih praktikal. Ini kerana Rukun Negara merupakan mekanisme terbaik menyatukan rakyat bukan sahaja dalam konteks ideologi yang sama tetapi juga ke arah membentuk perpaduan sejagat kalangan masyarakat majmuk di negara ini.
6. Kerajaan pada 25 Julai 2023 telah bersetuju usaha berterusan menyemarakkan penghayatan Rukun Negara perlu diperkemaskan dengan menyuntik pendekatan baharu yang lebih jelas dan berkesan. Pendekatan tersebut adalah **pelaksanaan lafaz ikrar penuh Rukun Negara** bermula dengan cita-cita sebagai mukadimah diikuti lima prinsip Rukun Negara dalam program rasmi kerajaan termasuklah semasa majlis perhimpunan di peringkat sekolah.
7. Sebagai rakyat Malaysia kita seharusnya memahami secara menyeluruh hasrat yang dicita-citakan sebagaimana Mukadimah (*preamble*) Rukun Negara dan hendaklah ditanamkan dalam diri setiap rakyat Malaysia. Cita-cita Rukun Negara menterjemahkan kesungguhan rakyat Malaysia:
 - (i) mendukung cita-cita hendak mencapai perpaduan yang lebih erat di kalangan seluruh masyarakatnya;

- (ii) memelihara satu cara hidup demokratik;
 - (iii) mencipta satu masyarakat yang adil di mana kemakmuran negara dapat dinikmati bersama secara adil dan saksama;
 - (iv) menjamin satu cara hidup yang liberal terhadap tradisi kebudayaan yang kaya dan berbagai-bagai corak; dan
 - (v) membina sebuah masyarakat progresif yang akan menggunakan sains dan teknologi moden.
8. Selaras dengan keputusan Jemaah Menteri, Kementerian Perpaduan Negara telah merangka program di bawah *Flagship* Kembara Perpaduan Malaysia MADANI dalam kluster Semarak Kenegaraan iaitu **Eksplorasi Rukun Negara**. Inisiatif ini merupakan usaha untuk memperkasakan pembudayaan prinsip Rukun Negara dalam kehidupan seharian masyarakat.
9. Pelbagai pengisian Eksplorasi Rukun Negara yang bertujuan untuk meningkatkan **pengetahuan, pemahaman, penghayatan dan pengamalan Rukun Negara** dilaksanakan sebagai cetus gerakan berterusan usaha merakyatkan Rukun Negara di semua peringkat.
10. Bermula dengan segmen bersama masyarakat umum, Kementerian Perpaduan Negara telah melaksanakan **Eksplorasi Rukun Negara pada 12hb dan 13hb Ogos 2023 di MyTown** Kuala Lumpur dan peluncurannya disempurnakan pada 13hb Ogos 2023 bersempena bulan kemerdekaan.
11. Seterusnya **Eksplorasi Rukun Negara terus disemarakkan di peringkat Sekolah pada 14 Ogos 2023** yang menyaksikan bacaan lafaz ikrar penuh Rukun Negara di lafazkan serentak di sekolah-

sekolah seluruh negara bermula dengan peringkat pra sekolah, sekolah rendah dan juga sekolah menengah.

12. Kejayaan menyemarakkan Rukun Negara terus dipergiatkan dengan pelbagai pendekatan termasuklah pelaksanaannya melalui kerjasama rakan strategik perpaduan. Kementerian Perpaduan Negara menjayakan kolaborasi rakan strategik ini melalui penganjuran **Eksplorasi Rukun Negara di peringkat Institusi Pendidikan Tinggi pada 2 Oktober 2023** dengan Kerjasama Universiti Putra Malaysia dan juga Majlis Perundingan Pelajar Kebangsaan serta Majlis Perwakilan Pelajar Universiti. Usaha ini diketengahkan dengan pendekatan menyasarkan para mahasiswa menjadi Rakan Eksplorasi Rukun Negara dalam menyemarakkan pembudayaan Rukun Negara di peringkat Institusi Pendidikan Tinggi.
13. Tuntasnya pelaksanaan Eksplorasi Rukun Negara di semua peringkat merupakan satu kejayaan dalam menyemarakkan pembudayaan Rukun Negara dan mengembalikan kesedaran masyarakat terhadap semangat patriotisme dan kenegaraan.
14. Menerapkan pembudayaan cita-cita dan perinsip Rukun Negara sebagai asas pegangan dan panduan setiap rakyat di negara ini secara lebih praktikal merupakan strategi berkesan ke arah merealisasikan hasrat Malaysia menjadi sebuah negara majmuk yang bersatu padu dan makmur sejajar dengan hasrat pembentukan negara MADANI.

Sekian, terima kasih.

**PEMBERITAHUAN PERTANYAAN LISAN DEWAN NEGARA
DEWAN NEGARA MESYUARAT PERTAMA
PENGAL KEDUA
PARLIMEN KELIMA BELAS**

PERTANYAAN : LISAN

TARIKH : 3 APRIL 2023 (ISNIN)

DARIPADA : Tuan Ak Nan A/L Ehtook

SOALAN NO.6

Minta **MENTERI PERPADUAN NEGARA** menyatakan apakah kemajuan yang telah dicapai bagi program dan aktiviti yang terkandung dalam Dasar Perpaduan Negara dan sejauh manakah dasar ini diguna pakai oleh Kementerian/jabatan lain untuk menangani isu perpaduan seperti diskriminasi dalam pelbagai bidang seperti sukan, perkhidmatan awam dan pendidikan.

JAWAPAN:

Tuan Yang di-Pertua,

1. **Dasar Perpaduan Negara (DPN)** yang telah **dihasilkan pada tahun 2021** merupakan dokumen strategik jangka panjang dan usaha berterusan yang dirangka untuk menetapkan hala tuju perpaduan nasional dalam memupuk, mengukuh serta memelihara perpaduan dalam kalangan rakyat.
2. Penghasilan dokumen dasar ini bertunjangkan Perlembagaan Persekutuan yang menjadi tulang belakang kepada Rukun Negara dan pembangunan Malaysia dan seterusnya menjadi asas perpaduan masyarakat.
3. **Dasar Perpaduan Negara** menjadi agenda perpaduan melalui pelaksanaan **tiga (3) teras utama dan strategi** yang inklusif untuk:
 - (i) Melahirkan bangsa Malaysia yang **patriotik, demokratik dan mempunyai jati diri yang tinggi**;
 - (ii) Membangunkan **identiti nasional** yang mempunyai cita-cita sepunya; dan
 - (iii) Mengukuhkan **ekosistem perpaduan** dengan mempelbagaikan tapak integrasi dan interaksi sosial serta pemantapan tadbir urus perpaduan.

4. Maka **Pelan Tindakan Perpaduan Negara (PTPN) 2021-2030** telah dihasilkan dengan menyusun program dan aktiviti yang melibatkan kerjasama pelbagai Kementerian, agensi Kerajaan, badan-badan bukan Kerajaan (NGO), swasta dan masyarakat umum mengikut peranan dan fungsi masing-masing.
5. Program dan aktiviti yang dilaksanakan adalah bagi memupuk semangat cintakan negara dan meningkatkan keharmonian masyarakat melalui detik-detik perpaduan atau '*moment of unity*' (dengan izin).
6. Antara program yang telah dilaksanakan pada tahun 2022 adalah:
 - (i) **Liga Sukan Uniti** dengan kerjasama Kementerian Belia dan Sukan (KBS), Persatuan Bola Sepak Malaysia (FAM) dan Persatuan Bola Jaring Malaysia. Program ini melibatkan penyertaan seramai 12,000 orang yang terdiri daripada pelbagai kaum dari seluruh negara;
 - (ii) **Semarak Uniti** yang merupakan program karnival perpaduan dengan pengisian pelbagai aktiviti bagi menunjukkan kepelbagaian adat dan budaya masyarakat yang berbilang kaum. Program ini dilaksanakan dengan kerjasama pelbagai agensi seperti MOTAC, KKM, Kementerian Pertanian dan Keterjaminan Makanan (MAFS), Kerajaan Negeri dan banyak lagi.
 - (iii) **Pertandingan Koir Perpaduan** dengan kerjasama Dewan Bahasa dan Pustaka (DBP) yang melibatkan penyertaan 130 kumpulan koir dari sekolah-sekolah dan institut pengajian tinggi seluruh negara.

7. Terkini, Kementerian Perpaduan Negara telah menganjurkan **Program Gerak RAHMAH 2023 – Jom Masak Bubur Lambuk** yang diadakan secara serentak di seluruh negara pada 1 April 2023. Program ini melibatkan sebanyak **3,799 Kawasan Rukun Tetangga (KRT)** yang disertai hampir 100,000 ahli jawatankuasa KRT dengan kerjasama Kerajaan Negeri dan Rakan-Rakan Strategik Perpaduan. Lebih 400,000 bungkus bubur lambuk telah dapat disediakan dan diedarkan kepada masyarakat setempat.

8. Manakala, program utama yang akan dilaksanakan pada tahun ini adalah **Sambutan Minggu Perpaduan** yang akan diadakan di seluruh negara pada **20 – 27 Mei 2023** yang akan disempurnakan di Kuching, Sarawak pada 20 Mei 2023 oleh YAB Perdana Menteri. Program ini akan melibatkan kerjasama dan penyertaan pelbagai Kementerian dan agensi dengan konsep “*whole government approach*”.

Sekian, terima kasih.

MAKLUMAT TAMBAHAN

IPNas

1. Bagi mengukur tahap keberkesanan pelaksanaan program dalam mengukuhkan penyatupaduan masyarakat, Kementerian telah melaksanakan **Indeks Perpaduan Nasional (IPNas)**.
2. IPNas telah dilaksanakan sebanyak dua (2) kali iaitu pada tahun 2018 dan 2022. Nilai Indeks Perpaduan Nasional (IPNas) pada tahun 2018 adalah **0.567**.
3. Manakala, sejak Dasar Perpaduan Negara dihasilkan pada tahun 2021, IPNas 2022 telah mencatatkan peningkatan iaitu dengan **skor 0.629**.
4. Berdasarkan dapatan IPNas 2022 inilah, Kementerian telah merangka program-program yang lebih tersusun di bawah 'Flagship' Kembara Perpaduan Malaysia MADANI pada tahun ini bagi menyemarakkan lagi perpaduan dalam kalangan masyarakat berbilang kaum, agama dan budaya.

PROGRAM-PROGRAM

1. Pelaksanaan program di bawah Kementerian Perpaduan Negara diperkukuhkan lagi dengan memasukkan tiga (3) agensi baru iaitu:
 - a) Jabatan Muzium Malaysia (JMM);
 - b) Arkib Negara Malaysia (ANM); dan
 - c) Perpustakaan Negara Malaysia (PNM).

2. Program-program yang melibatkan penyertaan pelbagai agensi, NGO dan pihak swasta turut dilaksanakan bagi mempromosi perpaduan melalui kepelbagaian adat dan budaya.

3. Antara program telah diadakan adalah:

Kementerian Perpaduan Negara

- I. **Galeri UNITI** di Perak, Selangor dan Kuala Lumpur; dan
- II. **Semarak Perpaduan** di UTC Shah Alam, Selangor.

JPNIN

- I. Kembara Perpaduan: Gerak Kerja Pasca Banjir di Johor pada 10 Mac 2023;
- II. UNITI SISWA: Pertandingan Seni Warisan dan Silang Budaya SRN Universiti Tun Hussein Onn di Batu Pahat pada 23 Disember 2023; dan
- III. **Kayuhan MAIPS Peduli Menyantuni Asnaf bersama Tuanku Syed Faizuddin Putra Ibni Tuanku Syed Sirajuddin Jamaluddin** dengan kerjasama Kerajaan Negeri Perlis pada 9 Januari 2023.

MUZIUM

- I. Nostalgia Anak Kampung di Dataran Muzium Negara pada Disember 2022;
- II. Festival Kebudayaan Kelantan di Dataran Muzium Negara pada 24 hingga 26 Februari 2023; dan
- III. Pameran “Seniman Perak Sepanjang Zaman” di Muzium Perak pada Disember 2022 hingga 30 Jun 2023.

ARKIB

- I. Pameran Eksklusif Seniman Agung Tan Sri P. Ramlee di Terminal 1 Lapangan Terbang Antarabangsa Kuala Lumpur (KLIA) pada 21 Mac hingga 31 Mei 2023;
- II. Pameran Pengisytiharan Tarikh Kemerdekaan Tanah Melayu di Dewan Pameran Warisan Eksklusif, Arkib Negara Malaysia pada 7 hingga 28 Feb 2023; dan
- III. Program Bicara Negarawan: Bapa Perpaduan Negara di Memorial Tun Hussein, Kuala Lumpur pada 11 Mac 2023.

PERPUSTAKAAN

- I. Riang Ria Cuti Sekolah di semua perpustakaan pada 10 hingga 29 Disember 2022 dan sesi kedua pada Februari hingga Mac 2023; dan
 - II. Bicara Eksekutif 2022 pada 20 Disember 2022.
4. Kementerian telah menganjurkan **program HARMONI** yang melibatkan penyertaan ketua dan wakil pelbagai agama. Pelbagai **program** telah dilaksanakan di seluruh negara dalam tempoh 17 hingga 28 Februari 2023. Antara pengisian dalam program tersebut adalah:

- I. **Sumbangan Bakul RAHMAH** kepada rumah kebajikan;
 - II. **Gotong - Royong** di rumah kebajikan;
 - III. **Program RAHMAH Mesra** bersama penghuni warga emas dan anak yatim; dan
 - IV. **Forum** kepada wakil-wakil badan agama.
5. Program-program yang dilaksanakan melibatkan jentera-jentera perpaduan di seluruh negara khususnya Kawasan Rukun Tetangga (KRT). Untuk makluman, pada masa ini terdapat sebanyak 8,348 KRT di seluruh negara.
6. Pelbagai **program komuniti di peringkat KRT** yang menjadi **tapak interaksi sosial pelbagai kaum** telah dilaksanakan antaranya adalah:
- I. **Program Gerak RAHMAH Jom Sihat** yang diadakan serentak di seluruh negara pada 25 Februari 2023 yang melibatkan lebih **4,800 KRT** dengan penyertaan melebihi 100,000 komuniti; dan
 - II. **Program Gerak RAHMAH Jom Ronda** yang diadakan serentak di seluruh negara pada 17 Mac 2023 melibatkan **3,085 Skim Rondaan Sukarela (SRS)** dengan penyertaan melebihi 100,000 komuniti.
7. Program mempromosi perpaduan juga melibatkan saluran media khususnya **radio** dan televisyen. Saya sendiri juga telah diwawancara oleh **RTM melalui slot Bicara Naratif: Perpaduan Dalam Kepelbagaian pada 6 Mac 2023.**

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : LISAN

TARIKH : 3 APRIL 2023 (ISNIN)

DARIPADA : TUAN ROBERT LAU HUI YEW

SOALAN NO. 54

Minta **MENTERI PERPADUAN NEGARA** menyatakan apakah langkah-langkah yang diambil oleh Kerajaan dalam usaha bukan sahaja memupuk perpaduan negara, tetapi menangani ekstremisme yang nampak semakin serius dari segi agama dan kaum.

JAWAPAN

Tuan Yang di-Pertua,

1. Kementerian Perpaduan Negara (KPN) telah mengambil inisiatif menghasilkan beberapa dokumen dasar dan pelan tindakan perpaduan bagi memupuk dan mengeratkan perpaduan kaum di Malaysia seperti berikut:
 - I. **Dasar Perpaduan Negara (DPN)** merupakan dasar payung yang julung kali dihasilkan oleh Kerajaan secara khusus bagi memupuk, mengukuh serta memelihara perpaduan dalam kalangan rakyat melalui konsep “Perpaduan Dalam Kepelbagaian”. Dasar ini menetapkan agenda dan halatuju perpaduan nasional berdasarkan tiga (3) teras utama iaitu:
 - a. Patriotisme dan demokrasi;
 - b. Identiti nasional; dan
 - c. Ekosistem perpaduan.
 - II. **Rangka Tindakan (Blueprint) Perpaduan Negara 2021-2030** merupakan dokumen yang menggariskan anjakan strategik bagi mencapai objektif yang terkandung di dalam DPN secara komprehensif. Dokumen ini menetapkan 3 aspirasi, 12 strategi dan 41 anjakan strategi dalam usaha membina dan mengekalkan perpaduan negara dan integrasi nasional.
 - III. Bagi menterjemahkan strategi yang digariskan melalui dokumen DPN dan Rangka Tindakan (*Blueprint*) Perpaduan Negara 2021-2030 ke dalam bentuk pelaksanaan, **Pelan Tindakan**

Perpaduan Negara (PTPN) 2021-2030 juga telah dihasilkan dengan menyusun program dan inisiatif secara khusus, inklusif dan holistik melibatkan kerjasama pelbagai agensi Kerajaan, badan-badan bukan Kerajaan (NGO), swasta dan masyarakat umum.

2. Kementerian Perpaduan Negara juga turut memainkan peranan yang penting bagi membangun Malaysia MADANI dalam konteks sosial, khususnya aspek kemasyarakatan dan kebudayaan selain turut menyumbang kepada aspek pendidikan, institusi, ekonomi dan kewangan, perundangan, bandar dan luar bandar.
3. Bagi menyokong hasrat membangun Malaysia MADANI, Kementerian ini turut menghasilkan kerangka membangun Malaysia MADANI melalui konsep Perpaduan Dalam Kepelbagaian yang akan menjadi rujukan kepada Kementerian Perpaduan Negara bagi melaksanakan program dan aktiviti berteraskan usaha ke arah melahirkan masyarakat MADANI dalam kalangan rakyat berbilang kaum.
4. Kerangka ini disusun seiring Dasar Perpaduan Negara dan memperjelaskan dengan lebih komprehensif strategi pelaksanaan serta sasaran yang hendak dicapai.
5. Antara inisiatif program yang diperkenalkan adalah **Kembara Perpaduan Malaysia MADANI**. Program ini merupakan program '*flagship*' yang menerajui inisiatif di bawah agenda perpaduan nasional dengan matlamat menyebarkan pengetahuan, kefahaman dan penghayatan terhadap usaha-usaha Kerajaan dalam membangunkan Malaysia MADANI.

6. Kembara Perpaduan Malaysia MADANI memayungi tiga (3) kluster program yang berpaksikan kepada pencapaian objektif Dasar Perpaduan Negara melalui penglibatan dan kerjasama semua pihak termasuklah pemimpin, agensi Kerajaan, pihak swasta, NGO, CSO dan masyarakat secara keseluruhannya.
7. Tiga (3) kluster program tersebut adalah seperti berikut:

(i) Semarak Kenegaraan

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

(ii) Semarak Perpaduan

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dgn konsep perpaduan dalam kepelbagaian.

(iii) Komuniti Rahmah

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling menghormati, mengasihi dan menghargai melalui penggembleran tenaga semua pihak KPN, agensi Kerajaan, swasta, NGO dan komuniti.

8. Dengan penghasilan dokumen dasar, pelan tindakan dan inisiatif program yang dirancang, agenda perpaduan dapat dilaksanakan dengan lebih terancang dan tersusun melalui kerjasama pelbagai pihak di setiap peringkat daripada peringkat Kementerian hingga ke peringkat komuniti.
9. Kementerian Perpaduan Negara juga mempunyai mekanisme untuk mencari penyelesaian isu yang menggugat perpaduan dengan membawa isu ini ke jawatankuasa-jawatankuasa seperti:
 - (a) **Jawatankuasa Keharmonian Antara Penganut Agama (HARMONI)** yang melibatkan perbincangan antara pemimpin-pemimpin agama dari Islam, Kristian, Buddha, Hindu, Tao, Sikh dan Baha'i.
 - (b) **Majlis Penasihat Perpaduan Negara** yang melibatkan tokoh-tokoh dari pelbagai latar belakang (Akademik, Korporat, NGO, Swasta, Belia)
10. Di samping itu, di peringkat komuniti pula, isu-isu perpaduan diuruskan oleh **Mediator Komuniti** (yang telah ditauliah oleh Kementerian), melalui langkah-langkah intervensi sosial berdasarkan isu atau insiden. Bagi kes-kes yang memerlukan tindakan bersepadu antara agensi, isu atau insiden akan dirujuk kepada agensi-agensi yang berkaitan seperti **PDRM, MCMC dan PBT**.
11. Bagi menangani ekstremisme yang nampak semakin serius, Kerajaan akan mengambil tindakan ke atas mana-mana pihak yang sengaja mencetuskan atau mengeluarkan sebarang kenyataan yang

mengganggu gugat perpaduan dan mengancam keharmonian rakyat. Oleh itu, Kerajaan berusaha mengekalkan keharmonian antara kaum dengan melaksanakan melalui perundangan sedia ada iaitu:

- (a) **Akta Hasutan 1948 [Akta 15]** iaitu akta bagi mengawal kesalahan menghasut.
 - (b) **Akta Komunikasi dan Multimedia 1998 [Akta 588]** bagi mengawal kesalahan penggunaan tidak wajar kemudahan atau perkhidmatan rangkaian.
 - (c) **Kanun Keseksaan (Penal Code) [Akta 574]** – iaitu akta yang digubal bagi membolehkan seseorang dihukum atas kesabitan jenayah, di mana ia terdapat **7 Seksyen yang berkaitan dengan perpaduan kaum dan keagamaan.**
12. Ini merupakan antara langkah memelihara keharmonian antara kaum dan mendidik rakyat bagi menghormati undang-undang sedia ada. Dengan mewujudkan jawatankuasa keharmonian kaum dan memperketat penguatkuasaan serta mengenakan hukuman setimpal terhadap individu yang mencetus isu perkauman dan keagamaan dapat membuka mata rakyat supaya menghormati undang-undang berkuatkuasa.

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : LISAN

TARIKH : 5 APRIL 2023 (RABU)

DARIPADA : DATO' HAJI HUSAIN BIN AWANG

SOALAN NO. 31

Minta **MENTERI PERPADUAN NEGARA** menyatakan sejauh manakah usaha bagi memupuk perpaduan pelbagai kaum dalam bentuk program atau aktiviti telah berjaya mencapai objektifnya pada setakat ini.

JAWAPAN:

1. Kewujudan semula Kementerian Perpaduan Negara pada 10 Mac 2020 merupakan komitmen Kerajaan dalam melihat perpaduan sebagai asas kestabilan masyarakat dan kunci kepada pembangunan dan kesejahteraan negara.
2. Bagi memastikan agenda perpaduan dapat dikendalikan secara bersepadu dan lebih tersusun, Kementerian Perpaduan Negara telah menghasilkan **Dasar Perpaduan Negara (DPN) dan Rangka Tindakan (Blueprint) Perpaduan Negara 2021-2030** yang menjadi panduan dan halatuju agenda perpaduan nasional.
3. Bagi menterjemahkan dasar tersebut ke dalam bentuk pelaksanaan, **Pelan Tindakan Perpaduan Negara (PTPN) 2021-2030** telah dihasilkan. Pelbagai program telah disusun dan dilaksanakan dengan melibatkan kerjasama pelbagai agensi Kerajaan, badan-badan bukan Kerajaan (NGO), swasta dan masyarakat umum.
4. Pencapaian objektif terhadap usaha-usaha yang telah dilaksanakan oleh Kementerian dalam penyatupaduan rakyat negara ini dinilai melalui **Indeks Perpaduan Nasional (IPNas)**.
5. IPNas merupakan indeks nasional yang menjadi kayu ukur terhadap keberkesanan pelaksanaan inisiatif dan program oleh Kerajaan untuk memastikan sumbangannya kepada tahap perpaduan dan keharmonian negara.

6. IPNas telah dilaksanakan sebanyak dua (2) kali iaitu pada tahun 2018 dan 2022. Pelaksanaan kajian IPNas menggunakan kaedah model struktur (*structural model*) iaitu mengenal pasti dan menguji secara bersama-sama dalam satu acuan model meliputi semua faktor penyumbang yang mempengaruhi pencapaian tahap kesepaduan sosial.
7. Lima (5) indikator yang mempengaruhi **tahap kesepaduan sosial** yang diuji iaitu:
 - i. Tahap Keetnikan;
 - ii. Hubungan Sosial Rentas Etnik;
 - iii. Etos Bangsa;
 - iv. Tadbir Urus dan Pembangunan; dan
 - v. Defisit Sosial (isu dan cabaran).
8. Nilai IPNas pada tahun 2018 adalah **0.567**. Pada tahun 2022, IPNas mencatatkan peningkatan iaitu dengan **skor 0.629**, menunjukkan bahawa tahap kesepaduan masyarakat di negara ini adalah **sederhana dan terkawal**.
9. Dapatan IPNas 2022 menunjukkan **dua (2) perkara yang perlu diberi perhatian** bagi mengukuhkan lagi perpaduan di negara ini iaitu **tadbir urus dan pembangunan serta aspek hubungan sosial rentas etnik**.
10. Berdasarkan dapatan IPNas 2022 inilah, Kementerian telah menyusun program-program di bawah flagship Kembara Perpaduan Malaysia

MADANI bagi terus menyemarakkan perpaduan dalam kalangan masyarakat berbilang kaum, agama dan budaya.

11. *Flagship* program yang diperkenalkan adalah **Kembara Perpaduan Malaysia MADANI** yang **akan diterajui oleh Kementerian Perpaduan Negara** dimana tiga (3) kluster program akan dilaksanakan iaitu:

1. Semarak Kenegaraan

- Bagi meningkatkan pengetahuan, kefahaman dan penghayatan tentang Perlembagaan Persekutuan dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat. Empat (4) kumpulan sasaran adalah umum, mahasiswa, pelajar sekolah dan komuniti. Program pengisian adalah seperti Dialog Anak Muda, Apresiasi dan pemeran Mini Rukun Negara, 'cross culture sharing session', Bicara Pemikiran Tokoh Negarawan, dan lain-lain.

2. Semarak Perpaduan

- Bagi menyemarakkan semangat perpaduan dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian ke arah merealisasikan aspirasi Malaysia Madani. Program-program adalah untuk memupuk keharmonian masyarakat melalui detik-detik perpaduan (*moment of unity*) seperti Sambutan Minggu Perpaduan,

Galeri Uniti, Uniti walk/run/cycling, liga sukan perpaduan, Uniti Keamatan-Gawai, dan lain-lain.

3. Komuniti Rahmah

- Untuk membina komuniti yang mampan dan rahmah khususnya dalam KRT yang menjunjung tinggi nilai-nilai kemanusiaan dengan saling menghormati, mengasihi dan menghargai melalui kerjasama semua pihak kementerian, agensi Kerajaan, swasta, NGO dan komuniti. Antara program adalah seperti Bakul Rahmah, Ziarah Rahmah, projek ekonomi KRT, Program Mesra Jiran, dan lain-lain.

12. Dengan penghasilan Kerangka Perpaduan Malaysia MADANI ini, agenda perpaduan dapat dilaksanakan dengan lebih terancang dan tersusun melalui kerjasama dan kesepakatan daripada semua golongan masyarakat tanpa mengira fahaman dan ideologi bagi memastikan keamanan, keharmonian dan perpaduan dapat dicapai.

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT PERTAMA, PENGGAL KEDUA,
PARLIMEN KELIMA BELAS**

PERTANYAAN : LISAN

TARIKH : 5 APRIL 2023 (RABU)

DARIPADA : DATUK RAZALI BIN IDRIS

SOALAN NO. 45

Minta **MENTERI PERPADUAN NEGARA** menyatakan apakah pelan tindakan kesungguhan Kementerian menyeru rakyat Malaysia yang berbilang bangsa dan agama supaya bersifat damai, mengajak kepada perpaduan dan kesejahteraan.

JAWAPAN

Tuan Yang di-Pertua,

- a. Kementerian Perpaduan Negara (KPN) telah mengambil inisiatif menghasilkan beberapa dokumen dasar dan pelan tindakan perpaduan bagi memupuk dan mengeratkan perpaduan kaum di Malaysia seperti berikut:
 - I. **Dasar Perpaduan Negara (DPN)** merupakan dasar payung yang julung kali dihasilkan oleh Kerajaan secara khusus bagi memupuk, mengukuh serta memelihara perpaduan dalam kalangan rakyat melalui konsep “Perpaduan Dalam Kepelbagaian”. Dasar ini menetapkan agenda dan halatuju perpaduan nasional berdasarkan tiga (3) teras utama iaitu:
 - a. Patriotisme dan demokrasi;
 - b. Identiti nasional; dan
 - c. Ekosistem perpaduan.
 - II. **Rangka Tindakan (Blueprint) Perpaduan Negara 2021-2030** merupakan dokumen yang menggariskan anjakan strategik bagi mencapai objektif yang terkandung di dalam DPN secara komprehensif. Dokumen ini menetapkan 3 aspirasi, 12 strategi dan 41 anjakan strategik dalam usaha membina dan mengekalkan perpaduan negara dan integrasi nasional.
 - III. Bagi menterjemahkan strategi yang digariskan melalui dokumen DPN dan Rangka Tindakan (*Blueprint*) Perpaduan Negara 2021-2030 ke dalam bentuk pelaksanaan, **Pelan Tindakan Perpaduan**

Negara (PTPN) 2021-2030 juga telah dihasilkan dengan menyusun program dan inisiatif secara khusus, inklusif dan holistik melibatkan kerjasama pelbagai agensi Kerajaan, badan-badan bukan Kerajaan (NGO), swasta dan masyarakat umum.

- a. Kementerian Perpaduan Negara juga turut memainkan peranan yang penting bagi membangun Malaysia MADANI dalam konteks sosial, khususnya aspek kemasyarakatan dan kebudayaan selain turut menyumbang kepada aspek pendidikan, institusi, ekonomi dan kewangan, perundangan, bandar dan luar bandar.
- b. Bagi menyokong hasrat membangun Malaysia MADANI, Kementerian ini turut menghasilkan kerangka membangun Malaysia MADANI melalui konsep Perpaduan Dalam Kepelbagaian yang akan menjadi rujukan kepada Kementerian Perpaduan Negara bagi melaksanakan program dan aktiviti berteraskan usaha ke arah melahirkan masyarakat MADANI dalam kalangan rakyat berbilang kaum.
- c. Kerangka ini disusun seiring Dasar Perpaduan Negara dan memperjelaskan dengan lebih komprehensif strategi pelaksanaan serta sasaran yang hendak dicapai.
- d. Antara inisiatif program yang diperkenalkan adalah **Kembara Perpaduan Malaysia MADANI**. Program ini merupakan program *flagship* yang menerajui inisiatif di bawah agenda perpaduan nasional dengan matlamat menyebarkan pengetahuan, kefahaman dan penghayatan terhadap usaha-usaha Kerajaan dalam membangunkan Malaysia MADANI.

- e. Kembara Perpaduan Malaysia MADANI memayungi tiga (3) kluster program yang berpaksikan kepada pencapaian objektif Dasar Perpaduan Negara melalui penglibatan dan kerjasama semua pihak termasuklah pemimpin, agensi Kerajaan, pihak swasta, NGO, CSO dan masyarakat secara keseluruhannya.
- f. Tiga (3) kluster program tersebut adalah seperti berikut:

(i) Semarak Kenegaraan

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

(ii) Semarak Perpaduan

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dgn konsep perpaduan dalam kepelbagaian.

(iii) Komuniti Rahmah

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling menghormati, mengasihi dan menghargai melalui penggemblengan tenaga semua pihak KPN, agensi Kerajaan, swasta, NGO dan komuniti.

- g. Dengan penghasilan dokumen dasar, pelan tindakan dan inisiatif program yang dirancang, agenda perpaduan dapat dilaksanakan dengan lebih terancang dan tersusun melalui kerjasama pelbagai pihak di setiap peringkat daripada peringkat Kementerian hingga ke peringkat komuniti.

Sekian, terima kasih.

**PEMBERITAHUAN PERTANYAAN LISAN DEWAN NEGARA
DEWAN NEGARA MESYUARAT PERTAMA
PENGAL KEDUA
PARLIMEN KELIMA BELAS**

PERTANYAAN : LISAN

TARIKH : 21 MAC 2023 (SELASA)

DARIPADA : TUAN AK NAN A/L EHTOOK

SOALAN NO.30

Minta **MENTERI PERPADUAN NEGARA** menyatakan berapakah jumlah peruntukan yang disediakan untuk kaum minoriti Siam bagi tujuan pembangunan kebudayaan dan pembelajaran bahasa ibunda mereka. Apakah mekanisme yang akan digunakan untuk menyalurkan peruntukan dan syarat yang dikenakan dalam penggunaan peruntukan tersebut.

JAWAPAN:

Tuan Yang di-Pertua,

1. Melalui belanjawan 2023, **sejumlah RM10 juta disediakan bagi menggerakkan program berbentuk pembelajaran adat, budaya dan bahasa ibunda sebagai asas perpaduan, antaranya melalui program Ini Warisan Kita. Program ini disusun bagi mengeratkan lagi penyatupaduan masyarakat tanpa meminggirkan mana-mana kaum atau kelompok masyarakat.**
2. Program **Ini Warisan Kita** merupakan program yang bertujuan untuk **mengekal dan menyemarakkan adat dan budaya masyarakat pelbagai kaum, dan meningkatkan penerimaan masyarakat terhadap perbezaan sekali gus dapat meraikan kepelbagaian**.
3. Antara elemen yang ditekankan di dalam program ini adalah pengajaran dan pengkayaan bahasa ibunda sesuatu kaum kepada komuniti setempat bertujuan untuk **meraikan kewujudan kepelbagaian bahasa dalam masyarakat Malaysia**. Melalui program ini juga, **masyarakat akan lebih memahami sensitiviti sesuatu kaum** melalui penggunaan bahasa ibunda.
4. Program “Ini Warisan Kita” dilaksanakan selari dengan Dasar Perpaduan Negara di bawah Teras 2 iaitu Identiti Nasional. Identiti Nasional merupakan matlamat membina sebuah bangsa yang berjaya perlu seiring dengan usaha memperkukuh perpaduan, penyatupaduan dan kesepaduan sosial dalam kepelbagaian etnik dan agama serta kerencaman budaya dan adat resam. Untuk mencapai matlamat tersebut, tiga (3) strategi telah disusun iaitu:

- (i) Mengukuhkan peranan bahasa sebagai medium integrasi perpaduan;
 - (ii) Mengukuhkan kefahaman agama, budaya dan adat resam pelbagai etnik; dan
 - (iii) Membentuk masyarakat berkeperibadian tinggi, berintegriti dan berakhlak mulia.
5. Perbezaan kaum, agama dan budaya dalam masyarakat di negara ini menjadi satu keunikan dan keistimewaan buat negara kita. Oleh yang demikian, pelaksanaan program oleh Kementerian ini adalah **bersifat terangkum tanpa meminggirkan mana-mana pihak serta tidak fokus kepada kelompok tertentu sahaja.**
6. Program ini membawa prinsip asas memahami, menghormati dan menerima terhadap tiga (3) kluster warisan kita iaitu **budaya, bahasa dan adat.**
- (i) Program **Adat** akan memberi pengetahuan dan pendedahan berkaitan adat resam sesuatu kaum. Contoh Program berkaitan adat adalah:
 - a) Penyatuan Dua Jiwa (kahwin);
 - b) Permata Hatiku (kelahiran);
 - c) Permaisuriku (berpantang);
 - d) Tamu Muhibbah (kunjung & lawat); dan
 - e) Tinggal Kenangan (kematian).
 - (ii) Program **Budaya** akan memberi pengetahuan dan pendedahan kepada budaya yang diwarisi oleh sesuatu kaum. Contoh Program berkaitan budaya adalah:
 - a) Warna-warni Malaysia (tarian);
 - b) Busana Perpaduan (pakaian);

- c) Unity of Spices/ Rencah Rasa/ Dapur Muhibbah (makanan);
- d) Nostalgia Anak Kampung (sukan rakyat);
- e) Kraf Perpaduan (kraftangan dan tulisan); dan
- f) Gengam Bara Api (seni pertahankan diri).

(iii) Program **Bahasa** adalah program pengajaran dan pengkayaan bahasa ibunda sesuatu kaum kepada komuniti setempat. Ia bertujuan untuk meraikan kewujudan kepelbagaian bahasa dalam masyarakat Malaysia dan memahami sensitiviti sesebuah kaum melalui penggunaan bahasa ibunda. Contoh program berkaitan bahasa adalah:

- a) Slanga Perpaduan (percakapan);
- b) Tinta Penaku (penulisan);
- c) Santai Minda (pembacaan);
- d) Super Spontan (kuiz); dan
- e) Memori Alam Kecil (nyanyian).

7. Program “Ini Warisan Kita” dilaksanakan oleh Kementerian Perpaduan Negara dengan kerjasama daripada Komuniti Rukun Tetangga (KRT), agensi Kerajaan seperti Kementerian Pelancongan, Seni dan Budaya (MOTAC) dan juga dengan NGO-*Friends of Unity* (FoU).
8. Kementerian ini percaya, melalui pelbagai program yang akan dilaksanakan, usaha untuk melahirkan masyarakat yang berpegang teguh kepada prinsip perpaduan akan dapat dicapai seiring dengan pembentukan masyarakat Malaysia MADANI.

Sekian, terima kasih.

**PEMBERITAHUAN PERTANYAAN JAWAB LISAN
DEWAN NEGARA
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : LISAN

TARIKH : 23 MAC 2023 (KHAMIS)

DARIPADA : DATUK RAS ADIBA BINTI MOHD RADZI

SOALAN NO. 11:

Minta **MENTERI PERPADUAN NEGARA** menyatakan berapakah jumlah OKU yang terlibat dalam Kawasan Rukun Tetangga serta apakah usaha Kementerian dalam meningkatkan penglibatan OKU di peringkat KRT dan nyatakan program-program yang akan dilaksanakan oleh KRT bagi pembangunan OKU pada tahun ini.

JAWAPAN:

Tuan Yang di-Pertua,

1. Kawasan Rukun Tetangga (KRT) adalah sebuah organisasi sukarela di peringkat komuniti yang meliputi kesemua penduduk dalam kawasan yang telah ditetapkan sebagai KRT, tanpa mengira latar belakang, kaum, agama, umur, jantina dan status sosial seseorang penduduk. KRT merupakan jentera utama Kementerian untuk memastikan keselamatan, kesejahteraan dan keharmonian komuniti terus terjaga.
2. Penglibatan dalam KRT juga terbuka kepada semua termasuk golongan Orang Kurang Upaya (OKU) yang dilihat sebagai kelompok komuniti Rukun Tetangga yang berpotensi untuk menyumbang kepada pembangunan komuniti.
3. Pada tahun ini, seramai **385 OKU** telah terlibat secara langsung dalam program KRT (termasuk yang memegang jawatan sebagai AJK dan penerima bantuan melalui Program Komuniti RAHMAH anjuran Kementerian).
4. Keupayaan dan sumbangan OKU dalam komuniti Rukun Tetangga sentiasa **diberi penghargaan dan pengiktirafan** oleh Kementerian Perpaduan Negara selaras dengan aspirasi Kerajaan untuk memantapkan dan memperkasakan golongan OKU.

5. Untuk makluman Yang Berhormat, golongan OKU juga di bawah tanggungjawab Jabatan Pembangunan OKU, Kementerian Pembangunan Wanita, Keluarga dan Masyarakat (KPWK).
6. Kementerian mengambil usaha-usaha berikut bagi meningkatkan penglibatan OKU dalam program KRT:
 - (i) Memberi kesedaran kepada AJK KRT supaya sentiasa melibatkan OKU dalam mana-mana program yang dianjurkan;
 - (ii) Menitikberatkan pelaksanaan program di lokasi yang selamat dan mudah diakses; dan
 - (iii) Berkolaborasi dengan agensi-agensi Kerajaan, swasta dan badan-badan bukan Kerajaan yang berkaitan dengan OKU untuk melaksanakan program yang bersesuaian.
7. Mulai tahun ini, Kementerian akan melaksanakan program flagship Kembara Perpaduan Malaysia MADANI yang terdiri daripada tiga (3) kluster iaitu:
 - (i) Semarak Kenegaraan;
 - (ii) Semarak Perpaduan; dan
 - (iii) Komuniti RAHMAH
8. Melalui kluster Komuniti RAHMAH, antara program yang akan melibatkan golongan OKU adalah Bakul RAHMAH (*RTCares*), Ziarah RAHMAH Perpaduan dan Gerobok Komuniti RAHMAH.

9. Sempena Sambutan Minggu Perpaduan yang akan berlangsung pada bulan Mei tahun ini, Kementerian turut bekerjasama dengan Majlis Paralimpik Malaysia bagi menggalakkan penyertaan OKU dalam pengisian program.

Sekian, terima kasih.

**PEMBERITAHUAN PERTANYAAN LISAN DEWAN NEGARA
DEWAN NEGARA MESYUARAT PERTAMA
PENGKAL KEDUA
PARLIMEN KELIMA BELAS**

PERTANYAAN : LISAN

TARIKH : 29 MAC 2023 (RABU)

DARIPADA : DATUK DR. DOMINIC LAU HOE CHAI

SOALAN NO. 9

Minta **MENTERI PERPADUAN NEGARA** menyatakan apakah tindakan, pelan dan aktiviti peringkat persekutuan yang telah diadakan oleh Kementerian dalam urusan mempromosikan perpaduan dalam kalangan rakyat Malaysia, dari Disember 2022 hingga kini. Jelaskan secara spesifik.

JAWAPAN:

Tuan Yang di-Pertua,

1. Sebagai peneraju kepada agenda perpaduan negara, Kementerian Perpaduan Negara telah mula melaksanakan perancangan gerak kerja 2023 pada bulan Disember 2022 bagi menyemarakkan semangat perpaduan antara kaum.
2. Seiring dengan hasrat YAB Perdana Menteri untuk membangun Malaysia MADANI, Kementerian Perpaduan Negara telah mengambil inisiatif menghasilkan **Kerangka Membangun Malaysia MADANI** melalui konsep **Perpaduan Dalam Kepelbagaian** (Unity in Diversity) bagi menyusun agenda perpaduan dengan lebih inklusif dan bersepadu berpandukan Dasar Perpaduan Negara (DPN). *Flagship* program yang diperkenalkan adalah **Kembara Perpaduan Malaysia MADANI** yang telah dilancarkan pada 1 Mac 2023 di Muzium Negara.
3. Semenjak bulan Disember 2022, pelbagai program telah dilaksanakan di peringkat persekutuan sehingga ke akar umbi yang bertujuan untuk mempromosi perpaduan dalam kalangan rakyat Malaysia.
4. Pelaksanaan program di bawah Kementerian Perpaduan Negara diperkukuhkan lagi dengan kemasukkan tiga (3) agensi baru iaitu:
 - a) Jabatan Muzium Malaysia (JMM);
 - b) Arkib Negara Malaysia (ANM); dan
 - c) Perpustakaan Negara Malaysia (PNM).

5. Program-program yang melibatkan penyertaan pelbagai agensi, NGO dan pihak swasta turut dilaksanakan bagi mempromosi perpaduan melalui kepelbagaian adat dan budaya.
6. Antara program telah diadakan adalah:

Kementerian Perpaduan Negara

- I. **Galeri UNITI** di Perak, Selangor dan Kuala Lumpur; dan
- II. **Semarak Perpaduan** di UTC Shah Alam, Selangor.

JPNIN

- I. Kembara Perpaduan: Gerak Kerja Pasca Banjir di Johor pada 10 Mac 2023;
- II. UNITI SISWA: Pertandingan Seni Warisan dan Silang Budaya SRN Universiti Tun Hussein Onn di Batu Pahat pada 23 Disember 2023; dan
- III. **Kayuhan MAIPS Peduli Menyantuni Asnaf bersama Tuanku Syed Faizuddin Putra Ibni Tuanku Syed Sirajuddin Jamaluddin** dengan kerjasama Kerajaan Negeri Perlis pada 9 Januari 2023.

MUZIUM

- I. Nostalgia Anak Kampung di Dataran Muzium Negara pada Disember 2022;
- II. Festival Kebudayaan Kelantan di Dataran Muzium Negara pada 24 hingga 26 Februari 2023; dan
- III. Pameran “Seniman Perak Sepanjang Zaman” di Muzium Perak pada Disember 2022 hingga 30 Jun 2023.

ARKIB

- I. Pameran Eksklusif Seniman Agung Tan Sri P. Ramlee di Terminal 1 Lapangan Terbang Antarabangsa Kuala Lumpur (KLIA) pada 21 Mac hingga 31 Mei 2023;
- II. Pameran Pengisytiharan Tarikh Kemerdekaan Tanah Melayu di Dewan Pameran Warisan Eksklusif, Arkib Negara Malaysia pada 7 hingga 28 Feb 2023; dan
- III. Program Bicara Negarawan: Bapa Perpaduan Negara di Memorial Tun Hussein, Kuala Lumpur pada 11 Mac 2023.

PERPUSTAKAAN

- I. Riang Ria Cuti Sekolah di semua perpustakaan pada 10 hingga 29 Disember 2022 dan sesi kedua pada Februari hingga Mac 2023; dan
 - II. Bicara Eksekutif 2022 pada 20 Disember 2022.
7. Kementerian telah menganjurkan **program HARMONI** yang melibatkan penyertaan ketua dan wakil pelbagai agama. Pelbagai **program** telah dilaksanakan di seluruh negara dalam tempoh 17 hingga 28 Februari 2023. Antara pengisian dalam program tersebut adalah:
- I. **Sumbangan Bakul RAHMAH** kepada rumah kebajikan;
 - II. **Gotong - Royong** di rumah kebajikan;
 - III. **Program RAHMAH Mesra** bersama penghuni warga emas dan anak yatim; dan
 - IV. **Forum** kepada wakil-wakil badan agama.

8. Program-program yang dilaksanakan melibatkan jentera-jentera perpaduan di seluruh negara khususnya Kawasan Rukun Tetangga (KRT). Untuk makluman, pada masa ini terdapat sebanyak 8,348 KRT di seluruh negara.
9. Pelbagai **program komuniti di peringkat KRT** yang menjadi **tapak interaksi sosial pelbagai kaum** telah dilaksanakan antaranya adalah:
 - I. **Program Gerak RAHMAH Jom Sihat** yang diadakan serentak di seluruh negara pada 25 Februari 2023 yang melibatkan lebih **4,800 KRT** dengan penyertaan melebihi 100,000 komuniti; dan
 - II. **Program Gerak RAHMAH Jom Ronda** yang diadakan serentak di seluruh negara pada 17 Mac 2023 melibatkan **3,085 Skim Rondaan Sukarela (SRS)** dengan penyertaan melebihi 100,000 komuniti.
10. Program mempromosi perpaduan juga melibatkan saluran media khususnya radio dan televisyen. Saya sendiri juga telah diwawancara oleh **RTM melalui slot Bicara Naratif: Perpaduan Dalam Kepelbagaian pada 6 Mac 2023**.
11. Kementerian Perpaduan Negara akan terus menganjurkan pelbagai program dan aktiviti sehingga ke peringkat akar umbi dalam usaha mempromosi perpaduan pelbagai kaum.
12. Program utama pada tahun ini adalah **Sambutan Minggu Perpaduan** yang akan diadakan di seluruh negara pada **20 – 27 Mei 2023** yang dijangka akan disempurnakan oleh YAB Perdana Menteri.

Sekian, terima kasih.

**PEMBERITAHUAN PERTANYAAN JAWAB LISAN
DEWAN NEGARA
MESYUARAT PERTAMA, PENGGAL KEDUA
PARLIMEN KELIMA BELAS TAHUN 2023**

PERTANYAAN : LISAN

TARIKH : 30 MAC 2023 (KHAMIS)

DARIPADA : DATO' SRI TI LIAN KER

SOALAN NO. 56:

Minta **MENTERI PERPADUAN NEGARA** menyatakan apakah terdapat kenaikan jumlah Geran Rukun Tetangga bagi tahun 2023 untuk setiap Kawasan Rukun Tetangga (KRT) yang berjumlah RM6,000 sebelum ini atau Kementerian mempunyai cadangan alternatif lain bagi terus memperkasa KRT di seluruh negara.

JAWAPAN:

Tuan Yang di-Pertua,

1. Pada tahun 2023, Geran Rukun Tetangga yang diberikan kepada setiap Kawasan Rukun Tetangga (KRT) adalah berjumlah RM6,000. Kementerian Perpaduan Negara **akan sentiasa memohon dengan Kementerian Kewangan supaya Geran ini dinaikkan.**
2. Kementerian ini sentiasa komited untuk memperkasakan KRT di seluruh negara secara berterusan. Justeru, Kementerian telah pun melancarkan **Pelan Pemerkasaan Kepimpinan Komuniti Rukun Tetangga 2021-2030** yang menyediakan **panduan dan hala tuju KRT yang jelas, berstruktur dan komprehensif** untuk memacu keberkesanan agenda perpaduan dalam komuniti.
3. Dalam konteks ini, Pelan Pemerkasaan tersebut telah menfokuskan **lima (5) teras strategik** seperti berikut:
 - (i) Memperkukuhkan kepimpinan Rukun Tetangga sebagai **pemangkin perpaduan;**
 - (ii) Memperkasakan khidmat komuniti sebagai **tapak integrasi nasional;**
 - (iii) Meningkatkan keselamatan dan keharmonian komuniti menerusi **aktiviti kesukarelawanan;**
 - (iv) Memantapkan peranan Rukun Tetangga dalam **meningkatkan kesejahteraan komuniti;** dan
 - (v) **Memperkasakan kelompok komuniti** seperti Jiran Wanita, Jiran Muda, Jiran Warga Emas dan Tunas Jiran.

4. Walau bagaimanapun, Kementerian melalui Jabatan Perpaduan Negara dan Integrasi Nasional (JPNIN) mengambil alternatif menyelaraskan **tindakan kerjasama bersepadu di antara KRT dengan pelbagai Rakan Strategik Perpaduan** yang merentasi Agensi Kerajaan, Pertubuhan Bukan Kerajaan (NGO), pihak korporat, swasta, institusi pendidikan dan masyarakat setempat.

5. Ke arah menterjemahkan dan melancarkan pelaksanaan Pelan Pemerkasaan ini, Kementerian Perpaduan Negara telah menyediakan **Agenda Kerja Komuniti Rukun Tetangga (RT4ALL)** yang mengandungi **empat (4) Gerak Kerja KRT** iaitu:
 - (i) **KRT Sejahtera** (fokus kepada kesejahteraan hidup);
 - (ii) **KRT Selamat** (tanggungjawab menjaga keselamatan bersama komuniti);
 - (iii) **KRT Bersih dan Indah** (fokus amalan penjagaan dan keindahan kawasan); dan
 - (iv) **KRT Sihat** (fokus amalan gaya hidup sihat).

6. Untuk merealisasikan aspirasi Malaysia Madani, **peranan dan impak KRT akan terus diperkukuhkan** melalui **pelaksanaan Program Komuniti RAHMAH** yang merupakan salah satu daripada kluster di bawah **Kerangka Kembara Perpaduan Malaysia Madani** selain daripada **Semarak PERPADUAN** dan **Semarak KENEGARAAN**.

Sekian, terima kasih.

**PEMBERITAHUAN PERTANYAAN LISAN DEWAN NEGARA
DEWAN NEGARA MESYUARAT PERTAMA
PENGAL KEDUA
PARLIMEN KELIMA BELAS**

PERTANYAAN : LISAN

TARIKH : 30 MAC 2023 (KHAMIS)

DARIPADA : PN RITA SARIMAH ANAK PATRICK INSOL

SOALAN NO.7

Minta **MENTERI PERPADUAN NEGARA** menyatakan apakah masalah utama yang mengekang perpaduan di antara kaum di Malaysia dan apakah inisiatif yang akan dilaksanakan oleh Kementerian untuk mengatasi masalah tersebut.

JAWAPAN:

Tuan Yang di-Pertua,

1. Peristiwa 13 Mei 1969 merupakan pencetus kepada beberapa usaha serta komitmen Kerajaan dalam menangani isu perpaduan sehingga Rukun Negara diisytiharkan pada 31 Ogos 1970.
2. Pada peringkat awal, langkah yang telah diambil berupa tindakan segera yang bertujuan untuk mengekalkan kestabilan politik, keselamatan dan keharmonian negara. Pelbagai langkah dan tindakan dibuat pada ketika itu untuk mewujudkan perpaduan rakyat antaranya menggalakkan interaksi sosial yang lebih tertumpu pada penyertaan masyarakat berbilang etnik dalam majlis dan perayaan yang dianjurkan.
3. Kepelbagaian dalam masyarakat di negara ini menjadi satu keunikan. Dalam masa yang sama kepelbagaian ini juga menjadi cabaran untuk diuruskan. Selagi ada perbezaan, sama ada dari segi agama, bahasa, adat dan budaya, selagi itulah ada cabaran yang perlu ditangani dengan penuh hemah.
4. Kerajaan sentiasa memantau isu-isu dan cabaran berkaitan perpaduan yang boleh mencetuskan ketegangan dan menggugat keharmonian masyarakat.
5. Usaha ini sebenarnya telah bermula sejak sekian lama, di mana penubuhan Jabatan Perpaduan Negara pada 1 Julai 1969 membuktikan bahawa Kerajaan benar-benar meletakkan elemen perpaduan ini sebagai agenda utama untuk diuruskan.

6. Pada tahun 2013, Kerajaan telah menubuhkan Majlis Konsultasi Perpaduan Negara atau *National Unity Consultative Council* (NUCC) sebagai satu badan bebas untuk menasihati Kerajaan mengenai hal-hwal perpaduan dan integrasi nasional.
7. Antara isu yang telah dikenal pasti boleh mengundang kepada perpecahan, pergeseran dan pertelingkahan antara kaum telah menyumbang kepada perasaan prasangka, tidak puas hati serta jurang hubungan yang melebar seperti berikut:

a) **Etnisiti**

Kepelbagaian etnisiti di negara ini sering kali dianggap sebagai batasan utama yang menggugat perpaduan.

b) **Agama**

Kurangnya sensitiviti serta kefahaman berkenaan agama yang berbeza memberi kesan kepada hubungan dan interaksi dalam masyarakat.

c) **Pendidikan**

Kewujudan institusi sekolah pelbagai aliran di negara ini (seperti sekolah vernakular, sekolah agama dan sekolah antarabangsa) difahami sebagai kekangan kepada usaha pemupukan perpaduan rakyat.

d) **Politik**

Sistem politik federalisme di negara ini muncul sebagai isu dan cabaran yang cuba mengheret perpaduan apabila isu-isu etnik diperdebatkan dalam konteks hak masing-masing dalam Perlembagaan.

e) Media

Media massa dan digital sekiranya disalahgunakan oleh pihak yang tidak bertanggungjawab boleh menggugat kestabilan dan perpaduan. Oleh itu, komunikasi yang lebih berkesan serta penguatkuasaan undang-undang perlu diperkukuhkan bagi mengimbangi kesan negatif kepesatan teknologi media yang semakin mencabar ruang perpaduan masa kini.

8. Bagi mengatasi tersebut, Kementerian Perpaduan Negara telah menghasilkan **Dasar Perpaduan Negara (DPN) dan Rangka Tindakan (Blueprint) Perpaduan Negara 2021-2030** yang menjadi panduan dan halatuju agenda perpaduan nasional.
9. Bagi menterjemahkan dasar tersebut ke dalam bentuk pelaksanaan, **Pelan Tindakan Perpaduan Negara (PTPN) 2021-2030** telah dihasilkan. Pelbagai program telah disusun dan dilaksanakan dengan melibatkan kerjasama pelbagai agensi Kerajaan, badan-badan bukan Kerajaan (NGO), swasta dan masyarakat umum.
10. Terkini, Kementerian perpaduan Negara telah mengambil inisiatif menghasilkan **Kerangka Perpaduan Malaysia MADANI** berkonsepkan **Perpaduan Dalam Kepelbagaian** yang selari dengan Dasar Perpaduan Negara bagi mencapai agenda membangun Malaysia MADANI. Usaha ini adalah inisiatif yang dilaksanakan bagi terus memperkukuhkan perpaduan antara kaum.
11. **Melalui Kerangka Perpaduan Malaysia MADANI**, *flagship* program yang diperkenalkan adalah **Kembara Perpaduan Malaysia MADANI**

yang akan diterajui oleh Kementerian Perpaduan Negara dimana tiga (3) kluster program akan dilaksanakan iaitu:

a. Semarak Kenegaraan

- Bagi meningkatkan pengetahuan, kefahaman dan penghayatan tentang Perlembagaan Persekutuan dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat. Empat (4) kumpulan sasaran adalah umum, mahasiswa, pelajar sekolah dan komuniti. Program pengisian adalah seperti Dailog anak muda, Apresiasi dan pemeran Mini Rukun Negara, cross culture sharing session, bicara pemikiran Tokoh Negarawan, dan lain-lain.

b. Semarak Perpaduan

- Bagi menyemarakkan semangat perpaduan dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian ke arah merealisasikan aspirasi Malaysia Madani. Program-program adalah untuk memupuk keharmonian masyarakat melalui detik-detik perpaduan (*moment of unity*) seperti Sambutan Minggu Perpaduan, Galeri Uniti, Uniti walk/run/cycling, liga sukan perpaduan, Uniti Keamatan-Gawai, dan lain-lain.

c. Komuniti Rahmah

- Untuk membina komuniti yang mampan dan rahmah khususnya dalam KRT yang menjunjung tinggi nilai-nilai kemanusiaan dengan saling menghormati, mengasihi dan

menghargai melalui kerjasama semua pihak kementerian, agensi Kerajaan, swasta, NGO dan komuniti. Antara program adalah seperti Bakul Rahmah, Ziarah Rahmah, projek ekonomi KRT, Prog Mesra Jiran, dan lain-lain.

12. Dengan penghasilan Kerangka Perpaduan Malaysia MADANI ini, agenda perpaduan dapat dilaksanakan dengan lebih terancang dan tersusun melalui kerjasama dan kesepakatan daripada semua golongan masyarakat tanpa mengira fahaman dan ideologi bagi memastikan keamanan, keharmonian dan perpaduan dapat dicapai.

Sekian, terima kasih.

Soalan Tambahan

Apakah tindakan jangka pendek dan jangka panjang dalam meningkatkan jumlah OKU terlibat sebagai ahli pimpinan KRT melalui sebarang penetapan kuota khas serta apakah langkah memastikan KRT mesra & inklusif?

1. Kementerian ini sentiasa memberi penekanan dan keutamaan dalam aspek pembangunan komuniti yang menyeluruh dengan mengambil kira cabaran dan keperluan semasa untuk meningkatkan kualiti dan kesejahteraan hidup komuniti setempat.
2. Dalam konteks ini, Kementerian telah menyediakan Pelan Pemerkasaan Kepimpinan Komuniti Rukun Tetangga 2021-2030 dan Agenda Kerja Komuniti Rukun Tetangga (RT4ALL) yang menjadi sumber rujukan utama dalam **pembangunan komuniti yang mampan, mesra dan inklusif**.
3. Kementerian sentiasa menggalakkan penglibatan OKU dalam kepimpinan KRT dan juga dalam program yang dilaksanakan. Sebagai langkah jangka pendek, Kementerian akan **meningkatkan promosi dan hebahan** bagi menarik penyertaan OKU dalam kepimpinan dan program KRT.
4. Sebagai langkah jangka panjang, Kementerian akan **menyediakan pangkalan data OKU** dalam komuniti KRT sebagai panduan kepada KRT dalam merangka program-program yang menjurus kepada keperluan OKU.

Sekian, terima kasih.

**PEMBERITAHUAN PERTANYAAN LISAN
DEWAN NEGARA
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 19 JUN 2023

DARIPADA : TUAN JAZIRI ALKAF ABDILLAH SUFFIAN

SOALAN NO. 46

Tuan Jaziri Alkaf Abdillah Suffian minta **MENTERI PERPADUAN NEGARA** menyatakan Indeks Perpaduan Nasional (IPNas) dan apakah situasi perpaduan pada masa ini selepas pelancaran Minggu Perpaduan Negara Malaysia Madani.

JAWAPAN:

Tuan Yang Di-Pertua,

1. **Indeks Perpaduan Nasional (IPNas)** adalah sebuah indeks nasional yang menjadi kayu ukur terhadap keberkesanan pelaksanaan inisiatif dan program oleh Kerajaan untuk memastikan sumbangannya kepada tahap perpaduan dan keharmonian negara.
2. IPNas dibangunkan Kementerian Perpaduan Negara dengan kerjasama **Institut Kajian Etnik (KITA) Universiti Kebangsaan Malaysia (UKM)**. Pengukuran tahap perpaduan melalui IPNas telah dilaksanakan sebanyak dua (2) kali iaitu pada tahun **2018** dan **2022**.
3. Tahap perpaduan rakyat diukur berdasarkan nilai kumulatif dalam **konstruk kesepaduan sosial** yang disumbang oleh **lima faktor penting iaitu Tahap Keetnikan, Hubungan Sosial Rentas Etnik, Etos Bangsa, Tadbir Urus dan Pembangunan dan Defisit Sosial**.
4. **Skor Indeks Perpaduan Nasional (IPNas) 2022 ialah 0.629** menunjukkan **peningkatan sebanyak 0.062** berbanding skor 0.567 tahun 2018 yang bermaksud perpaduan dalam kalangan rakyat Malaysia berada pada **tahap sederhana dan terkawal**.
5. Berdasarkan dapatan IPNas 2022 inilah, Kementerian telah menyusun program-program di bawah *flagship* **Kembara Perpaduan Malaysia MADANI** bagi terus menyemarakkan perpaduan dalam kalangan masyarakat berbilang kaum, agama dan budaya.

6. *Flagship* program **Kembara Perpaduan Malaysia MADANI dilaksanakan oleh Kementerian Perpaduan Negara** dimana tiga (3) kluster program tersebut ialah:

a. **Semarak Kenegaraan**

- Bagi meningkatkan pengetahuan, kefahaman dan penghayatan tentang Perlembagaan Persekutuan dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat. Empat (4) kumpulan sasaran adalah umum, mahasiswa, pelajar sekolah dan komuniti. Program pengisian adalah seperti Dialog Anak Muda, Apresiasi dan pemeran Mini Rukun Negara, “cross culture sharing session”, Bicara Pemikiran Tokoh Negarawan dan lain-lain.

b. **Semarak Perpaduan**

- Bagi menyemarakkan semangat perpaduan dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian ke arah merealisasikan aspirasi Malaysia Madani. Program-program adalah untuk memupuk keharmonian masyarakat melalui detik-detik perpaduan (*moment of unity*) seperti Sambutan Minggu Perpaduan, Galeri Uniti, ‘Uniti walk/ run/ cycling’, liga sukan perpaduan, Uniti Keamatan-Gawai, dan lain-lain.

c. Komuniti Rahmah

- Untuk membina komuniti yang mampan dan rahmah khususnya dalam KRT yang menjunjung tinggi nilai-nilai kemanusiaan dengan saling menghormati, mengasihi dan menghargai melalui kerjasama semua pihak kementerian, agensi Kerajaan, swasta, NGO dan komuniti. Antara program adalah seperti Bakul Rahmah, Ziarah Rahmah, projek ekonomi KRT, Program Mesra Jiran, dan lain-lain.
7. Sambutan Minggu Perpaduan telah diadakan di seluruh negara pada 20 hingga 28 Mei 2023. Seramai 100,000 orang telah menyertai program ini. Program Sambutan Minggu Perpaduan peringkat kebangsaan yang diadakah di Kuching, Sarawak telah dirasmikan oleh Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Al-Marhum Sultan Haji Ahmad Shah Al-Musta'in Billah.
 8. Semasa majlis perasmian, Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Al-Marhum Sultan Haji Ahmad Shah Al-Musta'in Billah telah menitahkan tiga (3) perkara utama yang menjadi elemen perpaduan, iaitu:
 - i. Kita seharusnya menjadikan nilai perpaduan ini sebagai satu aset negara kita demi masa hadapan yang lebih baik;
 - ii. Kita seharusnya mengurangkan perbezaan sesama yang lain, merapatkan jurang kaum, bangsa dan negara; dan

- iii. Pepatah Inggeris ada mengatakan “*charity begins at home*”, oleh yang demikian, sempena program Kembara Perpaduan ini, maka kita sesuainkannya seperti “*unity begins at home*” atau maksudnya perpaduan bermula daripada rumah.

9. Semasa Sambutan Minggu Perpaduan juga, Kementerian telah mencatatkan **dua (2) rekod *Malaysia Book of Record (MBOR)*** iaitu **Program Pemakaian Busana Etnik Teramai** yang melibatkan penyertaan seramai 2,471 orang dan **Penyertaan Kumpulan Etnik Terbanyak Dalam Pameran Kebudayaan** iaitu sebanyak 17 etnik. Semasa program ini juga, terdapat dua (2) buah lagu telah dilancarkan iaitu **Setia Perpaduan** dan **Sama-Sama Kita** bagi meningkatkan pemahaman terhadap **perpaduan dalam kepelbagaian** seiring dengan konsep *segulai sejalai* yang diketengahkan oleh YAB Perdana Menteri semasa Sambutan Hari Gawai 2023.

10. Bagi mengukur impak pelaksanaan program di bawah *flagship* **Kembara Perpaduan Malaysia MADANI**, kementerian dengan kerjasama Pertubuhan IKRAM Malaysia (IKRAM) sedang melaksanakan kajian keberkesanan program yang dijangka dapat diselesaikan sepenuhnya pada awal Jun 2023.

Sekian, terima kasih.

**PEMBERITAHUAN PERTANYAAN LISAN
DEWAN NEGARA
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 19 JUN 2023

DARIPADA : TUAN AK NAN A/L EHTOOK

SOALAN NO. 136

Tuan Ak Nan A/L Ehtook minta **MENTERI PERPADUAN NEGARA** menyatakan langkah yang diambil oleh Kerajaan bagi melindungi seluruh rakyat Malaysia, pelbagai bangsa dan agama daripada dihina oleh mereka yang tidak bertanggungjawab demi kepentingan diri. Adakah Kerajaan bercadang untuk meningkatkan kecekapan penguatkuasaan/pencegahan dengan menubuhkan badan penasihat yang merangkumi pelbagai bangsa dan agama.

JAWAPAN:

Tuan Yang Di-Pertua,

1. Dalam usaha memperkukuhkan penyatupaduan rakyat pelbagai kaum, agama dan budaya, Kementerian Perpaduan Negara telah menghasilkan **Dasar Perpaduan Negara** yang bertunjangkan Perlembagaan Persekutuan dan Rukun Negara. Melalui dasar ini, pelbagai strategi dan program telah dirangka bagi menyemarakkan semangat perpaduan dan membentuk identiti nasional dengan semangat jati diri, patriotik, prihatin, toleransi dan saling menghormati di kalangan rakyat.
2. Sebagai pemantapan tadbir urus perpaduan, Kementerian juga telah mengemas kini dan menyusun semula struktur mekanisme perpaduan sedia ada selari dengan keperluan semasa.
3. Sehubungan itu, **Majlis Penasihat Perpaduan Negara (MPPN)** yang telah ditubuhkan pada tahun 2020 telah diperkukuhkan bagi memastikan ia dapat memainkan peranan dengan lebih berkesan sebagai penasihat kepada Kerajaan dalam menangani isu-isu perpaduan. Keanggotaan Majlis Penasihat Perpaduan Negara telah dikemaskini dengan menambah kepelbagaian bidang kepakaran dan pengalaman ahli-ahli yang dilantik dan dipengerusikan oleh YAB Timbalan Perdana Menteri II.
4. Segala keputusan yang dibuat oleh Majlis ini berhubung isu-isu yang dibincangkan serta cadangan penyelesaian akan diangkat ke peringkat Jemaah Menteri untuk pelaksanaan.

5. Bagi menyokong peranan yang dimainkan oleh MPPN di peringkat federal, **Majlis Mesyuarat Menteri Perpaduan Bersama Menteri Perpaduan Negeri Sabah dan Sarawak serta EXCO-EXCO Perpaduan Negeri atau MExUnity** juga telah ditubuhkan dengan dipengerusikan oleh Menteri Perpaduan Negara.
6. Bagi menangani isu-isu yang berkait dengan keharmonian hubungan antara penganut agama, Jawatankuasa Mempromosikan Persefahaman dan Keharmonian Antara Penganut Agama (JKMPKA) telah ditubuhkan sejak tahun 2010. Jawatankuasa ini telah dijenamakan semula kepada **Jawatankuasa Keharmonian Antara Penganut Agama atau HARMONI** pada tahun 2020.
7. Jawatankuasa HARMONI merupakan platform bagi:
 - (a) meningkatkan kefahaman terhadap pelbagai agama;
 - (b) membincangkan isu-isu yang boleh menggugat keharmonian agama dan ketenteraman awam; dan
 - (c) mencadangkan dasar-dasar kepada Kerajaan berteraskan nilai agama.
8. Seramai 28 ahli mewakili semua Ketua Agama, ahli akademik dan profesional serta tokoh masyarakat dilantik untuk membincangkan isu berkaitan keharmonian agama.
9. Di samping pemantapan mekanisme perpaduan, Kementerian Perpaduan Negara (KPN) juga membuat pemantauan ke atas isu-isu yang boleh menggugat perpaduan dan keharmonian masyarakat seperti ucapan atau penulisan yang berbau penghinaan ke atas

agama dan bangsa melalui **sistem e-SEPAKAT** yang dibangunkan sejak tahun 2010.

10. Hasil laporan daripada sistem e-SEPAKAT, Kementerian mengambil langkah intervensi sosial berdasarkan isu atau insiden seperti melaksanakan program-program dialog, perbincangan kefahaman antara agama dan sebagainya. Selain itu, dilaksanakan juga sesi mediasi oleh **Mediator Komuniti**. Manakala bagi kes-kes yang memerlukan tindakan bersepadu antara agensi, isu atau insiden akan dirujuk kepada agensi-agensi yang berkaitan seperti PDRM, MCMC dan PBT.
11. Dari segi pengawalan dan penguatkuasaan, undang-undang sedia ada pada masa ini sudah memadai dalam memastikan hubungan antara kaum terpelihara. Sesiapa yang dengan sengaja melakukan apa-apa perbuatan, mencetuskan atau mengeluarkan sebarang kenyataan yang menggugat perpaduan kaum dan agama boleh disiasat dan didakwa, antara lain, di bawah akta-akta yang berikut:
 - i. Subseksyen 4(1) Akta Hasutan 1948 [*Akta 15*] iaitu kesalahan menghasut;
 - ii. Seksyen 233 Akta Komunikasi dan Multimedia 1998 [*Akta 588*] iaitu kesalahan penggunaan tidak wajar kemudahan rangkaian atau perkhidmatan rangkaian;
 - iii. Seksyen 295 Kanun Keseksaan [*Akta 574*] iaitu kesalahan membencana atau mencemarkan tempat sembahyang dengan niat hendak mengaibkan agama mana-mana golongan;
 - iv. Seksyen 296 Kanun Keseksaan iaitu kesalahan mengganggu perhimpunan yang menjalankan sembahyang;

- v. Seksyen 298 Kanun Keseksaan iaitu kesalahan menyebut perkataan-perkataan atau melakukan perbuatan-perbuatan lain dengan niat sengaja hendak melukakan perasaan agama seseorang;
- vi. Seksyen 298A Kanun Keseksaan iaitu kesalahan menyebabkan, atas alasan-alasan agama, suasana tidak harmoni, perpecahan, perasaan permusuhan, benci-membenci atau niat jahat, atau memudaratkan pemeliharaan keadaan harmoni atau perpaduan;
- vii. Seksyen 504 Kanun Keseksaan iaitu kesalahan dengan sengaja mengaibkan dengan niat hendak membangkitkan pecah keamanan;
- viii. Seksyen 505 Kanun Keseksaan iaitu kesalahan mengeluarkan kenyataan-kenyataan yang mendatangkan khianat awam; dan
- ix. Seksyen 506 Kanun Keseksaan [*Akta 574*] iaitu kesalahan menakutkan secara jenayah.

Sekian, terima kasih.

MAKLUMAT TAMBAHAN

TERMA RUJUKAN MAJLIS PENASIHAT PERPADUAN NEGARA (MPPN)

- (i) Menjadi forum untuk membincangkan isu dan masalah yang berkaitan dengan perpaduan termasuk suasana perpaduan dan hal integrasi nasional melalui perkongsian maklumat bersama tokoh-tokoh masyarakat;
- (ii) Menjana pemikiran dan idea ke arah menggubal Dasar Perpaduan Negara yang komprehensif dan holistik selaras dengan identiti Malaysia sebagai sebuah negara majmuk;
- (iii) Mengemukakan syor-syor dan langkah-langkah yang wajar diambil oleh kerajaan untuk memupuk keharmonian dan perpaduan negara yang lebih mantap;
- (iv) Melaksanakan strategi komunikasi berkesan untuk menghentikan sebarang penularan isu perkauman dan pergeseran salah faham agama demi kepentingan negara serta kesejahteraan rakyat;
- (v) Meluluskan cadangan dan nasihat tentang bidang-bidang kajian yang diperlukan ke arah mengukuh dan meningkatkan perpaduan negara dan integrasi nasional; dan
- (vi) Meneliti dasar-dasar yang berkaitan dan perundangan sedia ada untuk penambahbaikan ke arah menghormati dan menghargai kepelbagaian, keharmonian masyarakat serta ketenteraman negara.

TERMA RUJUKAN
MAJLIS MESYUARAT YB MENTERI PERPADUAN BERSAMA
MENTERI PERPADUAN NEGERI SABAH DAN SARAWAK SERTA
EXCO-EXCO PERPADUAN NEGERI (MExUnity)

- (i) Forum untuk membincangkan isu dan masalah yang berkaitan dengan perpaduan termasuk suasana perpaduan dan hal integrasi nasional melalui perkongsian maklumat bersama Ahli-Ahli Majlis Mesyuarat Kerajaan Negeri (EXCO) Perpaduan Negeri;
- (ii) Melaksanakan langkah-langkah yang patut dan perlu diambil bagi menyelesaikan sesuatu isu dan masalah yang timbul serta cadangan untuk memupuk keharmonian dan perpaduan negara lebih mantap;
- (iii) Melaksanakan strategi komunikasi berkesan untuk menghentikan sebarang penularan isu perkauman dan pergeseran salah faham agama demi kepentingan negara serta kesejahteraan rakyat; dan
- (iv) Meneliti keperluan menggubal atau membuat pindaan terhadap mana-mana dasar dan perundangan Kementerian Perpaduan Negara ke arah menghormati dan menghargai kepelbagaian, keharmonian masyarakat dan ketenteraman negara.

**TERMA RUJUKAN
JAWATANKUASA TINDAKAN PERPADUAN NEGERI
(PADUNEGERI)**

- (i) Forum untuk membincangkan isu dan masalah yang berkaitan dengan perpaduan termasuk suasana perpaduan dan hal integrasi nasional melalui perkongsian maklumat bersama badan bukan kerajaan (NGO), pihak swasta dan individu;
- (ii) Menjelaskan isu-isu semasa dan menjawab persoalan yang menjadi pertikaian (*contestation*) di peringkat akar umbi yang boleh mencetuskan masalah perhubungan dan ketegangan sosial dalam masyarakat;
- (iii) Mengesyor inisiatif dan program untuk memantapkan perpaduan dan keharmonian masyarakat di peringkat komuniti melalui aktiviti pendampingan sosial (*social outreach*) dan program penggalakan; dan
- (iv) Menjalin kerjasama pintar dan menggembeng sumber-sumber sedia ada agensi kerajaan, sektor swasta, pertubuhan bukan kerajaan (NGO) dan masyarakat sivil dalam menyokong inisiatif membudayakan perpaduan dan meraikan kepelbagaian bagi memastikan perpaduan masyarakat sentiasa terpelihara.

TERMA RUJUKAN
JAWATANKUASA KEHARMONIAN ANTARA PENGANUT AGAMA
(JAWATANKUASA HARMONI)

- (i) memperkukuhkan iklim perhubungan yang baik, mesra dalam kalangan pemimpin dan penganut pelbagai agama berteraskan semangat saling hormat-menghormati serta bekerjasama di semua peringkat;
- (ii) menggalakkan semua penganut agama memahami dan menghormati Perlembagaan Persekutuan;
- (iii) meningkatkan penghayatan semua penganut agama kepada nilai-nilai murni selaras dengan Prinsip Rukun Negara; dan
- (iv) mencadangkan program dan aktiviti bagi meningkatkan kefahaman mengenai kepelbagaian agama, budaya dan adat resam bagi memperkukuhkan keharmonian negara.

Sekian, terima kasih.

**PEMBERITAHUAN PERTANYAAN LISAN/ BUKAN LISAN
DEWAN NEGARA
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 20 JUN 2023

DARIPADA : TUAN AK NAN A/L EHTOOK

SOALAN NO. 15

Tuan Ak Nan A/L Ehtook minta **MENTERI PERPADUAN NEGARA** menyatakan butiran dan berapakah jumlah peruntukan di bawah Belanjawan 2023 yang disediakan untuk pembelajaran bahasa ibunda dan kebudayaan golongan minoriti, termasuk masyarakat Siam. Adakah peruntukan tersebut disediakan dalam bentuk sumbangan kepada Pertubuhan Bukan Kerajaan (NGO) mewakili masyarakat Siam iaitu Persatuan Siam Malaysia sebagai badan pelaksana atau ada kaedah lain yang harus masyarakat Siam lakukan untuk memanfaatkan peruntukan tersebut.

JAWAPAN:

Tuan Yang di-Pertua,

1. Kekuatan negara dibina daripada pelbagai kaum, adat resam, budaya, kepercayaan dan bahasa ibunda. Khazanah dan warisan yang tidak ternilai ini perlu dipelihara tanpa meminggirkan mana-mana kaum untuk diwariskan kepada generasi yang akan datang. Untuk itu, Kementerian Perpaduan Negara memainkan peranan untuk memastikan warisan bangsa ini terus terpelihara dan dilestarikan dalam seluruh masyarakat, sebagai asas pembangunan jati diri mengukuhkan perpaduan.
2. Melalui Belanjawan 2023, Kementerian Perpaduan Negara telah pun memperuntukkan sebanyak RM10 juta bagi tujuan pelaksanaan inisiatif dan program pengekalan warisan tradisi di bawah nama Ini Warisan Kita. Objektif-objektif di bawah Ini Warisan Kita adalah untuk memelihara dan memulihara kepelbagaian warisan negara yang menjadi tunjang kepada perpaduan.
3. Peruntukan yang diluluskan ini tidak menetapkan kadar pembahagian dan agihan mengikut kaum atau mana-mana golongan, sebaliknya ia digunakan bagi pelaksanaan program yang berkaitan pemeliharaan dan pemuliharaan warisan termasuk pembelajaran bahasa ibunda dan kebudayaan yang telah disusun di bawah inisiatif Ini Warisan Kita. Program ini dilaksanakan dengan kerjasama pelbagai pihak termasuk komuniti Rukun Tetangga, institusi pengajian tinggi, NGOs dan agensi swasta.

4. Selain daripada melalui inisiatif Ini Warisan Kita, program-program untuk kesedaran terhadap warisan, adat dan budaya ini turut dilaksanakan oleh Kementerian Perpaduan Negara melalui kluster program yang dinamakan Semarak Kenegaraan, Semarak Perpaduan yang telah disusun di bawah flagship Kembara Perpaduan Malaysia MADANI.
5. Pelaksanaan program ini diperkukuhkan lagi dengan penglibatan tiga buah agensi baharu di bawah Kementerian Perpaduan Negara iaitu Jabatan Muzium Malaysia, Arkib Negara Malaysia dan Perpustakaan Negara Malaysia. Sambutan Minggu Perpaduan yang telah berlangsung selama seminggu pada akhir bulan Mei yang lalu di seluruh negara juga menekankan pengisian program berbentuk warisan, adat dan budaya seperti 'showcase', 'gallery unity', pameran rumah etnik yang memaparkan alat-alat muzik, makanan, pakaian dan permainan tradisi pelbagai etnik.
6. Kementerian juga telah menganjurkan program secara khusus bersama masyarakat Siam iaitu Program Warisan Masyarakat Siam Kelantan yang berlangsung di Wat Siam Tumpat, Kelantan pada 17 Jun baru-baru ini. Program tersebut bertujuan memberi pendedahan dan pengetahuan berkaitan adat resam, budaya seperti pakaian tradisional, makanan, persembahan kesenian serta perayaan kepada masyarakat Siam pelbagai lapisan generasi. Program seumpama ini akan diteruskan dan dibiakkan lagi bagi memastikan khazanah dan warisan budaya setiap kaum di negara ini terus kekal dan dapat diwarisi kepada generasi akan datang.

Sekian, terima kasih

**PEMBERITAHUAN PERTANYAAN LISAN
DEWAN NEGARA
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

DARIPADA : DATUK SERI DR. MUJAHID BIN YUSOF

TARIKH : 22 JUN 2023

SOALAN NO. 22

Datuk Seri Dr. Mujahid bin Yusof minta **MENTERI PERPADUAN NEGARA** menyatakan usaha untuk menggubal Akta Kebencian Agama dan Kaum bagi mengekang usaha memecahbelahkan masyarakat dengan sentimen perkauman.

JAWAPAN:

Tuan Yang di-Pertua,

1. Keharmonian dan perpaduan dalam kalangan rakyat Malaysia yang berbilang bangsa, kaum dan agama dapat dipelihara dengan peruntukan undang-undang sedia ada. Buat masa ini, apa yang kita perlukan bukanlah undang-undang baharu tetapi lebih kepada pemerkasaan penguatkuasaan, pelaksanaan dan pendidikan kesedaran.
2. Dari segi penguatkuasaan, sudah tentunya Kementerian Perpaduan Negara percaya bahawa perkara ini di bawah bidang kuasa pihak Kementerian Dalam Negeri yang akan bertindak tegas melalui penguatkuasaan Polis Diraja Malaysia bagi melakukan tangkapan dan pendakwaan terhadap mana-mana individu yang melakukan kesalahan menghina, mempersendakan atau memainkan isu-isu agama berdasarkan peruntukan undang-undang yang sedia ada seperti Akta Hasutan 1948, Kanun Keseksaan dan Akta Komunikasi dan Multimedia 1998.
3. Selanjutnya, peranan Kementerian Perpaduan Negara pula ialah untuk mengadakan pelbagai program dan usaha bagi menyatupadukan dan memupuk keharmonian dalam kalangan rakyat yang berbilang kaum, bangsa dan agama melalui strategi 5P iaitu penilaian, penggalakan, pencegahan, pencelahan dan pemulihan. Pada masa ini juga, Kerajaan telah menubuhkan beberapa Jawatankuasa bagi menangani isu-isu agama dan perkauman seperti yang berikut:

- A. Majlis Penasihat Perpaduan Negara (MPPN) yang ditubuhkan di peringkat kebangsaan bagi menasihati Kerajaan dalam hal-ehwal perpaduan serta membincangkan isu-isu perpaduan, usaha-usaha penyatuan nasional (*national reconciliation*) dari pelbagai sudut dan mencadangkan kaedah penyelesaian terbaik kepada Kerajaan untuk menangani isu dan cabaran Perpaduan;
- B. Jawatankuasa Perpaduan (MExUnity) ditubuhkan di peringkat kementerian untuk menyokong MPPN;
- C. Jawatankuasa Tindakan Padu Negeri (JKTPN) telah ditubuhkan di peringkat negeri untuk menyokong MPPN dan MExUnity; dan
- D. Jawatankuasa Keharmonian Antara Penganut Agama (HARMONI) yang berfungsi meningkatkan kefahaman terhadap pelbagai agama, membincangkan isu-isu yang boleh menggugat keharmonian agama dan ketenteraman masyarakat, mencadangkan dasar-dasar kepada Kerajaan yang berteraskan nilai agama serta melaksanakan program atau aktiviti kemasyarakatan bersama-sama pihak kerajaan.

Sekian, terima kasih.

**PEMBERITAHUAN PERTANYAAN LISAN DEWAN NEGARA
DEWAN NEGARA MESYUARAT KEDUA
PENGAL KEDUA
PARLIMEN KELIMA BELAS**

PERTANYAAN : LISAN

TARIKH : 22 JUN 2023

DARIPADA : TUAN ABUN SUI ANYIT

SOALAN NO. 94

Tuan Abun Sui Anyit minta **MENTERI PERPADUAN NEGARA** menyatakan adakah Kementerian Perpaduan Negara berhasrat untuk mengembangkan lagi peranannya dalam mengadakan lebih banyak aktiviti dan menambah peruntukan bagi memupuk perpaduan yang lebih baik dalam kalangan rakyat Malaysia yang berbilang kaum seperti mana yang dizahirkan melalui Titah Kebawah Duli Yang Maha Mulia Seri Paduka Baginda Yang di-Pertuan Agong semasa merasmikan Minggu Perpaduan pada 21 Mei 2023 yang lalu bahawa perpaduan adalah aset negara.

JAWAPAN:

Tuan Yang di-Pertua,

1. Kementerian Perpaduan Negara menjunjung kasih ke atas titah Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah semasa majlis perasmian Sambutan Minggu Perpaduan yang menekankan nilai perpaduan yang perlu diterapkan daripada rumah, mengurangkan jurang perbezaan antara kaum serta menjadikan perpaduan sebagai aset negara paling utama demi masa depan.
2. Semenjak bulan Disember 2022, pelbagai program telah dilaksanakan di peringkat persekutuan sehingga ke akar umbi yang bertujuan untuk mempromosi perpaduan dalam kalangan rakyat Malaysia.
3. Pelaksanaan program di bawah Kementerian Perpaduan Negara diperkukuhkan lagi dengan kemasukkan tiga (3) agensi baru iaitu:
 - a) Jabatan Muzium Malaysia (JMM);
 - b) Arkib Negara Malaysia (ANM); dan
 - c) Perpustakaan Negara Malaysia (PNM).
4. Program-program yang melibatkan penyertaan pelbagai agensi, NGO dan pihak swasta turut dilaksanakan bagi mempromosi perpaduan melalui kepelbagaian adat dan budaya.
5. Kementerian Perpaduan Negara telah mengambil inisiatif menghasilkan **Kerangka Perpaduan Malaysia MADANI**

berkonsepkan **Perpaduan Dalam Kepelembagaan** yang selari dengan Dasar Perpaduan Negara bagi mencapai agenda membangun Malaysia MADANI. Usaha ini adalah inisiatif yang dilaksanakan bagi terus memperkukuhkan perpaduan antara kaum.

6. **Melalui Kerangka Perpaduan Malaysia MADANI**, *flagship* program yang diperkenalkan adalah **Kembara Perpaduan Malaysia MADANI** yang **akan diterajui oleh Kementerian Perpaduan Negara** di mana tiga (3) kluster program akan dilaksanakan iaitu:

a. **Semarak Kenegaraan**

Program yang bertujuan untuk meningkatkan **pengetahuan, kefahaman dan penghayatan tentang cita-cita dan prinsip Rukun Negara** serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

Contoh program:

- a) Citra Nusa@Muzium;
- b) Apresiasi Rukun Negara;
- c) Ikrar Setiaku;

Dan lain-lain.

b. **Semarak Perpaduan**

Program ini untuk menyemarakkan semangat perpaduan dalam kalangan masyarakat berbilang kaum, agama dan budaya. Aktiviti yang dilaksanakan untuk **menambah dan mempelbagaikan tapak integrasi dan medium interaksi sosial**.

Contoh program:

- a) Sambutan Minggu Perpaduan;
- b) Galeri UNITI;
- c) Showcase Rumah KAMI;

Dan lain-lain.

c. **Komuniti Rahmah**

Program yang dirangka bagi membina komuniti yang mampan dan rahmah yang menjunjung tinggi nilai-nilai kemanusiaan melalui penggembengan tenaga semua pihak termasuk agensi Kerajaan, swasta, NGO dan komuniti.

Contoh program:

- a) Bantuan Bakul RAHMAH;
- b) Tuisyen RAHMAH;
- c) Gerak RAHMAH: Jom Ronda SRS;

Dan lain-lain.

7. Pelaksanaan program di bawah *Flagship* Kembara Perpaduan Malaysia MADANI ini bukan hanya melibatkan Kementerian Perpaduan Negara dan agensinya sahaja tetapi akan menggunakan ***whole of government approach*** iaitu kerjasama antara agensi Kerajaan merentasi sempadan portfolio organisasi dengan berkongsi tindakan untuk mencapai matlamat pembangunan Malaysia MADANI.
8. Dengan penghasilan Kerangka Perpaduan Malaysia MADANI ini, program-program perpaduan yang dirancang dapat dilaksanakan

dengan lebih terancang dan tersusun melalui kerjasama dan kesepakatan daripada semua golongan masyarakat tanpa mengira fahaman dan ideologi bagi memastikan keamanan, keharmonian dan perpaduan dapat dicapai.

9. Sehubungan itu, Kementerian Perpaduan Negara akan sentiasa memohon sejumlah peruntukan yang besar untuk meneruskan dan mengembangkan lagi peranannya dalam mengadakan lebih banyak program bagi memupuk perpaduan yang lebih baik dalam kalangan rakyat Malaysia yang berbilang kaum seperti mana yang dizahirkan melalui Titah Kebawah Duli Yang Maha Mulia Seri Paduka Baginda Yang di-Pertuan Agong semasa merasmikan Sambutan Minggu Perpaduan pada 21 Mei 2023 yang lalu.

Sekian, terima kasih.

**PEMBERITAHUAN PERTANYAAN LISAN
DEWAN NEGARA
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 22 JUN 2023

DARIPADA : TUAN AMIR BIN MD GHAZALI

SOALAN NO. 98

Tuan Amir Bin Md Ghazali minta **MENTERI PERPADUAN NEGARA** menyatakan adakah Kerajaan bercadang mewujudkan satu Jawatankuasa Tetap Khas yang mengkaji isu-isu berkaitan dengan Agama Islam dan Bukan Agama Islam bagi menangani isu-isu sensitif antara agama agar kekeliruan dalam masyarakat tidak berlaku. Contohnya, isu pembesar suara azan yang pernah berlaku di Selangor tidak lama dahulu dan terbaharu berlaku lagi di Pulau Pinang.

JAWAPAN:

Tuan Yang Dipertua,

1. Menyedari bahawa Malaysia merupakan sebuah negara yang berbilang kaum, maka adalah penting untuk sentiasa memelihara keharmonian dan perpaduan dalam kalangan rakyatnya. Kepelbagaian yang wujud sudah tentu menimbulkan perbezaan yang sedikit sebanyak akan menimbulkan salah faham yang boleh mengganggu gugat keharmonian masyarakat khususnya dalam konteks sensitiviti agama.
2. Oleh itu, Kerajaan melalui Kementerian Perpaduan Negara telah menubuhkan Jawatankuasa Keharmonian Antara Agama (HARMONI) yang memainkan peranan penting dalam menangani dan mengendurkan ketegangan berkaitan isu-isu sensitif khususnya berkaitan agama yang berlaku di negara ini. Jawatankuasa ini bermula sejak 2010 yang pada mulanya dikenali sebagai Jawatankuasa Mempromosikan Persefahaman dan Keharmonian Antara Penganut Agama (JKMPKA).
3. Jawatankuasa HARMONI ini dipengerusikan bersama oleh YB Menteri Perpaduan Negara dan YB Menteri Di Jabatan Perdana Menteri (Hal Ehwal Agama) dan dianggotai oleh pemimpin badan-badan keagamaan dan wakil pertubuhan iaitu sepuluh wakil agama Islam, dua wakil agama Hindu, dua wakil agama Tao, seorang wakil agama Sikh, seorang wakil agama Baha'i dan seorang wakil dari Unit Hal Ehwal Agama-agama Lain (UNIFOR) Sarawak.

4. Fungsi jawatankuasa ini adalah tertumpu kepada meningkatkan kefahaman terhadap pelbagai agama, membincangkan isu-isu yang boleh menggugat keharmonian agama dan ketenteraman masyarakat, mencadangkan dasar-dasar kepada Kerajaan yang berteraskan nilai agama serta melaksanakan program atau aktiviti kemasyarakatan bersama-sama pihak kerajaan.

5. Terma rujukan Jawatankuasa HARMONI adalah seperti yang berikut:
 - (a) Memperkukuhkan iklim perhubungan yang baik, mesra dalam kalangan pemimpin dan penganut pelbagai agama berteraskan semangat saling hormat-menghormati serta bekerjasama di semua peringkat;

 - (b) Menggalakkan semua penganut agama memahami dan menghormati Perlembagaan Persekutuan;

 - (c) Meningkatkan penghayatan semua penganut agama kepada nilai-nilai murni selaras dengan Prinsip Rukun Negara; dan

 - (d) Mencadangkan program dan aktiviti bagi meningkatkan kefahaman mengenai kepelbagaian agama, budaya dan adat resam bagi memperkukuhkan keharmonian negara.

6. Melalui pelbagai aktiviti dan sesi perbincangan diharap objektif untuk memperkukuhkan keharmonian antara agama akan dapat dipelihara.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

**DARIPADA : YBHG. DATUK TEO ENG TEE @ TEO KOK
CHEE**

TARIKH : 26 JUN 2023 (ISNIN)

SOALAN NO. 63

DATUK TEO ENG TEE @ TEO KOK CHEE minta **MENTERI PERPADUAN NEGARA** menyatakan apakah Petunjuk Prestasi Utama (KPI) termasuk pencapaian bagi program Kembara Perpaduan Malaysia MADANI yang telah diperuntukkan jutaan ringgit dalam menggalakkan perpaduan dan integrasi sosial dalam kalangan masyarakat.

JAWAPAN:

Tuan Yang Di-Pertua,

1. Seiring dengan hasrat YAB Perdana Menteri untuk membangun Malaysia MADANI, Kementerian Perpaduan Negara telah mengambil inisiatif menghasilkan **Kerangka Membangun Malaysia MADANI** melalui konsep **Perpaduan Dalam Kepelbagaian** (Unity in Diversity) bagi menyusun agenda perpaduan dengan lebih inklusif dan bersepadu berpandukan Dasar Perpaduan Negara (DPN).
2. Flagship program yang diperkenalkan adalah **Kembara Perpaduan Malaysia MADANI** melibatkan tiga (3) kluster program seperti berikut:
 - i. **Semarak Kenegaraan**

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.
 - ii. **Semarak Perpaduan**

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dengan konsep perpaduan dalam kepelbagaian.
 - iii. **Komuniti Rahmah**

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang

menjunjung tinggi nilai-nilai kemanusiaan dengan saling menghormati, mengasihi dan menghargai melalui penggabungan tenaga semua pihak KPN, agensi Kerajaan, swasta, Badan Bukan Kerajaan (NGO) dan komuniti.

3. Dalam 'Flagship program Kembara Perpaduan', pelbagai program telah disusun yang meliputi peringkat persekutuan sehingga ke akar umbi yang turut melibatkan pemimpin, agensi Kerajaan, pihak swasta, NGO, CSO dan masyarakat secara keseluruhannya bertujuan untuk mempromosi serta memupuk semangat perpaduan dalam kalangan rakyat Malaysia.

4. Antara program yang telah dianjurkan adalah:
 - i. Sambutan Minggu Perpaduan;
 - ii. Ini Warisan Kita;
 - iii. Kejohanan Liga Sukan UNITI;
 - iv. Program Gerak RAHMAH - Jom Bersih dan Indah;
 - v. Program HARMONI;
 - vi. Nostalgia Anak Kampung;
 - vii. Forum Rukun Negara dan Perpaduan; dan
 - viii. Wacana Manuskrip Melayu.

5. Pelaksanaan program-program di atas adalah melibatkan kesemua agensi di bawah Kementerian Perpaduan Negara iaitu:
 - i. Jabatan Perpaduan dan Integrasi Nasional (JPNIN);
 - ii. Jabatan Muzium Malaysia (JMM);
 - iii. Jabatan Arkib Negara (ANM); dan
 - iv. Perpustakaan Negara Malaysia (PNM).

6. Program utama yang telah dilaksanakan pada tahun ini adalah **Sambutan Minggu Perpaduan** yang telah berlangsung di seluruh negara pada **20 – 28 Mei 2023** dan disempurnakan oleh **Duli Yang Maha Mulia Seri Paduka Baginda Yang Dipertuan Agong** pada **21 Mei 2023**. Program ini melibatkan kerjasama dan penyertaan pelbagai Kementerian dan agensi dengan konsep “*whole government approach*” serta mendapat sambutan yang menggalakkan daripada masyarakat tempatan yang melibatkan lebih 200,000 pengunjung.
7. Bagi menilai keberkesanan program yang dianjurkan, Kementerian dengan kerjasama Pertubuhan IKRAM Malaysia (IKRAM) telah melaksanakan kajian tinjauan keberkesanan Program Sambutan Minggu Perpaduan 2023 di seluruh negara melalui soal selidik bagi mendapatkan maklum balas pengunjung yang hadir ke program tersebut.
8. Antara hasil kajian yang dijalankan adalah seperti berikut;
 - a) sebanyak 98.1% responden menyatakan program ini dapat meningkatkan perasaan cintakan tanah air (patriotisme);
 - b) sebanyak 98.2% responden menyatakan program ini mampu meningkatkan tahap perpaduan dan integrasi dalam kalangan rakyat; dan
 - c) sebanyak 98.5% responden menyatakan program ini telah meningkatkan kefahaman mengenai kepentingan memelihara perpaduan dan keharmonian kaum.

9. Keseluruhan hasil kajian menunjukkan program Sambutan Minggu Perpaduan telah mendapat sambutan yang sangat baik dan boleh dijadikan penanda aras bagi program-program perpaduan lain yang bakal dianjurkan oleh Kementerian Perpaduan Negara.
10. Manakala bagi menilai tahap perpaduan semasa perpaduan negara, Kementerian telah melaksanakan **Indeks Perpaduan Nasional (IPNas)** yang juga menjadi kayu ukur terhadap **keberkesanan pelaksanaan inisiatif dan program** perpaduan secara keseluruhan.
11. IPNas dibangunkan oleh Kementerian Perpaduan Negara dengan kerjasama **Institut Kajian Etnik (KITA) Universiti Kebangsaan Malaysia (UKM)**. Pengukuran tahap perpaduan melalui IPNas telah dilaksanakan sebanyak dua (2) kali iaitu pada tahun **2018** dan **2022**.
12. Nilai Indeks Perpaduan Nasional (IPNas) pada tahun 2018 adalah **0.567**. Pada tahun 2022, IPNas mencatatkan peningkatan iaitu dengan **skor 0.629**. Melalui Rancangan Malaysia Kedua Belas (RMKe-12), sasaran yang ditetapkan bagi pencapaian tahap perpaduan **pada tahun 2025 adalah pada skor 0.7**.
13. Melalui penganjuran pelbagai program yang telah disusun sebagai tapak integrasi sosial, diharap tahap perpaduan nasional dapat siperkukuhkan.

Sekian, terima kasih.

**PEMBERITAHUAN PERTANYAAN LISAN
DEWAN NEGARA
MESYUARAT KEDUA, PENGGAL KEDUA
PARLIMEN KELIMA BELAS**

PERTANYAAN : LISAN

TARIKH : 27 JUN 2023

DARIPADA : TUAN MOHD HASBIE BIN MUDA

SOALAN NO. 62

Tuan Mohd Hasbie bin Muda minta **MENTERI PERPADUAN NEGARA** menyatakan apakah langkah-langkah yang diambil oleh Kerajaan untuk memperkasa Tabika Perpaduan dari segi kualiti perkhidmatan dan jumlah bilangan.

JAWAPAN:

Tuan Yang di-Pertua,

1. Kerajaan sentiasa komited dalam memastikan tiada sebarang keciciran bagi kanak-kanak berumur 4 hingga 6 tahun untuk menerima pendidikan separa formal iaitu pendidikan awal kanak-kanak. Sehingga kini Kementerian Perpaduan Negara (KPN) mempunyai sebanyak 1,781 buah Tabika Perpaduan diseluruh negara yang memberikan didikan awal kepada lebih 37,000 orang.
2. Bagi memastikan keberhasilan murid dimaksimumkan, Kementerian Perpaduan Negara juga telah melancarkan Pelan Pendidikan Awal Kanak-Kanak Tabika Perpaduan 2021-2030 pada 24 Julai 2021. Matlamatnya adalah untuk memperkasakan peranan Tabika Perpaduan sebagai institusi pendidikan awal kanak-kanak di samping meningkatkan kemahiran, menanam keyakinan dan membentuk konsep sendiri yang positif pada diri murid agar mereka bersedia untuk menghadapi cabaran dan mengikuti pembelajaran seterusnya
3. Di bawah Pelan Pendidikan Awal Kanak-Kanak Tabika Perpaduan 2021-2030 ini, **10 inisiatif baharu diperkenalkan** selain program-program sedia ada yang diteruskan dengan dibuat penambahbaikan. **Inisiatif baharu yang akan dilaksanakan adalah:**

(i) **Modul Pendidikan Rukun Negara**

Modul Pendidikan Rukun Negara diperkenalkan dalam pengajaran dan pembelajaran Tabika Perpaduan bertujuan memupuk semangat patriotisme dan cintakan negara di peringkat awal usia kanak-kanak.

(ii) **Modul Komunikasi Asas Pelbagai Bahasa**

Kementerian Perpaduan Negara turut memperkenalkan modul Komunikasi Asas Pelbagai Bahasa di Tabika Perpaduan iaitu:

- a. Bahasa Mandarin dan Bahasa Tamil di semua Tabika Perpaduan di Semenanjung Malaysia dan Wilayah Persekutuan Labuan;
- b. Bahasa Kadazan di semua Tabika Perpaduan di Sabah;
- c. Bahasa Iban di semua Tabika Perpaduan di Sarawak; dan
- d. Bahasa isyarat.

(iii) **Modul Kemahiran Jom Urus Diri**

Program ini memberi **pendedahan kepada murid tentang kemahiran asas pengurusan diri di rumah**. Pengajaran program Jom Urus Diri akan membolehkan murid meningkatkan kemahiran, kekemasan dan disiplin dalam pengurusan diri.

(iv) **Buku Aktiviti Tabika Perpaduan Dan Lembaran Kerja**

Kementerian Perpaduan Negara telah menerbitkan **buku khusus** yang akan digunakan kepada semua murid Tabika Perpaduan dalam program Pengajaran dan Pembelajaran di Tabika

Perpaduan. Buku tersebut telah diterapkan dengan elemen kenegaraan, perpaduan dan nilai murni

Bagi memastikan proses Pembelajaran dan Pengajaran (PdP) yang dijalankan mencapai impak yang ditetapkan, pengukuhan dilaksanakan melalui pelaksanaan aktiviti menggunakan Lembaran Kerja yang disediakan bagi setiap mata pelajaran.

(v) **Modul Kursus Dan Latihan Guru Tabika Perpaduan**

Kursus dan latihan bagi peningkatan pengetahuan, kompetensi dan kemahiran yang lengkap merangkumi keseluruhan bidang tugas guru disediakan sebagai usaha memastikan guru Tabika Perpaduan memiliki pengetahuan, kompetensi dan kemahiran yang diperlukan sesuai dengan persekitaran dan kehendak semasa.

(vi) **Buku Panduan Pengajaran Tahunan Mingguan / Harian Tabika Perpaduan**

Buku Panduan Pengajaran Tahunan / Mingguan / Harian Tabika Perpaduan berasaskan kepada Kurikulum Standard Prasekolah Kebangsaan (KSPK) akan menjadi garis panduan kepada guru-guru Tabika Perpaduan untuk merancang dan melaksanakan aktiviti Pengajaran dan Pembelajaran (PdP) dengan lebih teratur dan sistematik di semua Tabika Perpaduan.

(vii) **Buku Pentaksiran Pengajaran Harian / Bulanan Tabika Perpaduan**

Dokumen pentaksiran berasaskan buku panduan Pengajaran Tahunan / Mingguan / Harian turut disediakan sebagai panduan

kepada guru Tabika Perpaduan melaksanakan pentaksiran secara harian dan bulanan.

(viii) Buku Pengurusan dan Pentadbiran Tabika Perpaduan

Buku Pengurusan dan Pentadbiran Tabika Perpaduan bertujuan untuk memberikan maklumat dan panduan pengurusan dan pentadbiran yang jelas kepada guru dan semua yang terlibat dalam memastikan pengoperasian Tabika Perpaduan diurus secara berkesan.

(ix) Unit Naziran Tabika Perpaduan

Unit Naziran telah diwujudkan di peringkat Kementerian bagi memantau dan penilaian kualiti Tabika Perpaduan. Pemantauan dan penilaian adalah berdasarkan kepada tiga (3) dimensi iaitu dimensi kualiti guru, dimensi kurikulum dan dimensi pentadbiran.

(x) Imej Dan Identiti Tabika Perpaduan

Pemantapan imej dan identiti adalah melalui pengenalan logo dan pakaian seragam Tabika Perpaduan serta keseragaman warna bangunan dan kelas Tabika Perpaduan di seluruh negara.

4. Kementerian Perpaduan Negara juga memberi tumpuan kepada usaha meningkatkan enrolmen dengan menambahbaik fasiliti dan infrastruktur Tabika Perpaduan dalam mewujudkan persekitaran pembelajaran yang kondusif. Disamping itu juga, KPN sentiasa mengalu-alukan kerjasama dan kolaborasi bersama pelbagai pihak yang berkaitan dengan

pendidikan awal kanak-kanak dalam usaha meningkatkan kesedaran kepada ibubapa dan masyarakat bagi memastikan kanak-kanak mendapat akses pendidikan prasekolah.

Sekian, terima kasih.

**PEMBERITAHUAN PERTANYAAN BUKAN LISAN DEWAN NEGARA
MESYUARAT KEDUA, PENGGAL KEDUA,
PARLIMEN KELIMA BELAS**

PERTANYAAN : BUKAN LISAN

DARIPADA : DATUK DR. DOMINIC LAU HOE CHAI

SOALAN NO. 73

Datuk Dr. Dominic Lau Hoe Chai minta **MENTERI PERPADUAN NEGARA** menyatakan :-

- a) Apakah langkah-langkah Kerajaan dalam menangani isu-isu berkaitan perkauman yang kian merisaukan; dan
- b) Adakah Kerajaan bercadang mewujudkan sebuah akta/undang-undang sebagai badan penguatkuasa dalam melindungi kepelbagaian serta mengambil tindakan ke atas mana-mana individu yang menggugat perpaduan negara.

JAWAPAN

Tuan Yang di-Pertua,

a) Apakah langkah-langkah Kerajaan dalam menangani isu-isu berkaitan perkauman yang kian merisaukan

1. Kementerian Perpaduan Negara (KPN) telah mengambil inisiatif menghasilkan beberapa dokumen dasar dan pelan tindakan perpaduan bagi memupuk dan mengeratkan perpaduan kaum di Malaysia seperti berikut:

i. **Dasar Perpaduan Negara (DPN)** merupakan dasar payung yang julung kali dihasilkan oleh Kerajaan secara khusus bagi memupuk, mengukuh serta memelihara perpaduan dalam kalangan rakyat melalui konsep “Perpaduan Dalam Kepelbagaian”. Dasar ini menetapkan agenda dan halatujuh perpaduan nasional berdasarkan tiga (3) teras utama iaitu:

- (a) Patriotisme dan demokrasi;
- (b) Identiti nasional; dan
- (c) Ekosistem perpaduan.

ii. **Rangka Tindakan (Blueprint) Perpaduan Negara 2021-2030** merupakan dokumen yang menggariskan anjakan strategik bagi mencapai objektif yang terkandung di dalam DPN secara komprehensif. Dokumen ini menetapkan 3 aspirasi, 12 strategi dan 41 anjakan strategi dalam usaha membina dan mengekalkan perpaduan negara dan integrasi nasional.

iii. Bagi menterjemahkan strategi yang digariskan melalui dokumen DPN dan Rangka Tindakan (*Blueprint*) Perpaduan Negara 2021-

2030 ke dalam bentuk pelaksanaan, **Pelan Tindakan Perpaduan Negara (PTPN) 2021-2030** juga telah dihasilkan dengan menyusun program dan inisiatif secara khusus, inklusif dan holistik melibatkan kerjasama pelbagai agensi Kerajaan, badan-badan bukan Kerajaan (NGO), swasta dan masyarakat umum.

2. Kementerian Perpaduan Negara juga turut memainkan peranan yang penting bagi membangun Malaysia MADANI dalam konteks sosial, khususnya aspek kemasyarakatan dan kebudayaan selain turut menyumbang kepada aspek pendidikan, institusi, ekonomi dan kewangan, perundangan, bandar dan luar bandar.
3. Bagi menyokong hasrat membangun Malaysia MADANI, Kementerian ini turut menghasilkan kerangka membangun Malaysia MADANI melalui konsep Perpaduan Dalam Kepelbagaian yang akan menjadi rujukan kepada Kementerian Perpaduan Negara bagi melaksanakan program dan aktiviti berteraskan usaha ke arah melahirkan masyarakat MADANI dalam kalangan rakyat berbilang kaum.
4. Kerangka ini disusun seiring Dasar Perpaduan Negara dan memperjelaskan dengan lebih komprehensif strategi pelaksanaan serta sasaran yang hendak dicapai.
5. Antara inisiatif program yang diperkenalkan adalah **Kembara Perpaduan Malaysia MADANI**. Program ini merupakan program *flagship* yang menerajui inisiatif di bawah agenda perpaduan nasional dengan matlamat menyebarkan pengetahuan, kefahaman dan penghayatan terhadap usaha-usaha Kerajaan dalam membangunkan Malaysia MADANI.

6. Kembara Perpaduan Malaysia MADANI memayungi tiga (3) kluster program yang berpaksikan kepada pencapaian objektif Dasar Perpaduan Negara melalui penglibatan dan kerjasama semua pihak termasuklah pemimpin, agensi Kerajaan, pihak swasta, NGO, CSO dan masyarakat secara keseluruhannya.
7. Tiga (3) kluster program tersebut adalah seperti berikut:

- i. **Semarak Kenegaraan**

Program kenegaraan yang bertujuan untuk meningkatkan pengetahuan, kefahaman dan penghayatan tentang cita-cita dan prinsip Rukun Negara serta sejarah ketamadunan negara bagi mengukuhkan jati diri dan semangat cintakan negara dalam kalangan semua lapisan masyarakat.

- ii. **Semarak Perpaduan**

Program untuk menyemarakkan semangat perpaduan dalam kalangan masyarakat berbilang kaum, agama dan budaya bersesuaian dgn konsep perpaduan dalam kepelbagaian.

- iii. **Komuniti Rahmah**

Program yang dirangka bagi membina komuniti yang mampan dan rahmah khususnya dalam Kawasan Rukun Tetangga yang menjunjung tinggi nilai-nilai kemanusiaan dengan saling menghormati, mengasihi dan menghargai melalui penggemblengan tenaga semua pihak KPN, agensi Kerajaan, swasta, NGO dan komuniti.

8. Dengan penghasilan dokumen dasar, pelan tindakan dan inisiatif program yang dirancang, agenda perpaduan dapat dilaksanakan dengan lebih terancang dan tersusun melalui kerjasama pelbagai pihak di setiap peringkat daripada peringkat Kementerian hingga ke peringkat komuniti.

b) Adakah Kerajaan bercadang mewujudkan sebuah akta/undang-undang sebagai badan penguatkuasa dalam melindungi kepelbagaian serta mengambil tindakan ke atas mana-mana individu yang menggugat perpaduan negara

1. Kementerian Perpaduan Negara mempunyai mekanisme untuk mencari penyelesaian isu yang menggugat perpaduan dengan membawa isu ini ke jawatankuasa-jawatankuasa seperti:

(a) **Jawatankuasa Keharmonian Antara Penganut Agama (HARMONI)** yang melibatkan perbincangan antara pemimpin-pemimpin agama dari Islam, Kristian, Buddha, Hindu, Tao, Sikh dan Baha'i.

(b) **Majlis Penasihat Perpaduan Negara** yang melibatkan tokoh-tokoh dari pelbagai latar belakang (Akademik, Korporat, NGO, Swasta, Belia)

2. Di samping itu, di peringkat komuniti pula, isu-isu perpaduan diuruskan oleh **Mediator Komuniti** (yang telah ditauliah oleh Kementerian), melalui langkah-langkah intervensi sosial berdasarkan isu atau insiden. Bagi kes-kes yang memerlukan tindakan bersepadu

antara agensi, isu atau insiden akan dirujuk kepada agensi-agensi yang berkaitan seperti **PDRM, MCMC dan PBT**.

3. Bagi menangani ekstremisme yang nampak semakin serius, Kerajaan akan mengambil tindakan ke atas mana-mana pihak yang sengaja mencetuskan atau mengeluarkan sebarang kenyataan yang mengganggu gugat perpaduan dan mengancam keharmonian rakyat. Oleh itu, Kerajaan berusaha mengekalkan keharmonian antara kaum dengan melaksanakan melalui perundangan sedia ada iaitu:
 - (a) **Akta Hasutan 1948 [Akta 15]** iaitu akta bagi mengawal kesalahan menghasut;
 - (b) **Akta Komunikasi dan Multimedia 1998 [Akta 588]** bagi mengawal kesalahan penggunaan tidak wajar kemudahan atau perkhidmatan rangkaian; dan
 - (c) **Kanun Keseksaan (Penal Code) [Akta 574]** – iaitu akta yang digubal bagi membolehkan seseorang dihukum atas kesabitan jenayah, di mana ia terdapat **7 Seksyen yang berkaitan dengan perpaduan kaum dan keagamaan**.
4. Ini merupakan antara langkah memelihara keharmonian antara kaum dan mendidik rakyat bagi menghormati undang-undang sedia ada. Dengan mewujudkan jawatankuasa keharmonian kaum dan memperketat penguatkuasaan serta mengenakan hukuman setimpal terhadap individu yang mencetus isu perkauman dan keagamaan dapat membuka mata rakyat supaya menghormati undang-undang berkuatkuasa.

Sekian, terima kasih.

